

**NATIONAL ASSEMBLY OF
SEYCHELLES**

Tuesday 6th June, 2023

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou bann zofisye Lasanble, bonzour nou bann envite spesyal ki dan Galeri ozordi, bann etidyan *Independent School*, nou kontan ki zot in zwenn Lasanble, e osi bonzour nou piblik ki swiv nou deor. E byenveni zot tou pou nou travay sa semenn.

Madanm Clerk, mon ava apel ou pou prezantasyon dokiman.

MADAM CLERK

Mersi Mr Speaker. Bonzour Mr Speaker. Bonzour tou bann Manm, tou bann *staff Secretariat*, bann marmay ki dan Galeri *from Independent School* e tou dimoun ki pe ekout nou. Bann papye ki pe ganny prezante i;

S.I. 39 of 2023

Immovable Property Tax (Increase in Tax Rate) Order, 2023

S.I. 40 of 2023 Stamp Duty (Exemption) (Amendment) Order, 2023

S.I. 41 of 2023 Accommodation Turnover Tax (Amendment of Schedule) Regulations, 2023.

Seychelles Human Rights Commission – Annual Report 2022. Mersi Mr Speaker.

MR SPEAKER

Mersi Madanm Clerk. Nou a prosede avek *Reading Public Bill*.

MADAM CLERK

This Act may be cited as the Mascarene Plateau Act, 2023. Mersi Mr Speaker.

MR SPEAKER

Mersi Madanm Clerk. Nou a prosede avek nou *Order Paper* pou pran *Private Notice Question*. Madanm reporter mon ava demann ou apel Vis-Prezidan pour *Private Notice Question*.

Bonzour Vis-Prezidan Ahmed Afif e byenveni dan Lasanble ankor enn fwa ozordi, e pou zwenn nou pou *Private Notice Question*. Mon ava apel *Leader* Lopoziyon pou met son kestyon silvouple, Onorab?

HON SEBASTIEN PILLAY

Mersi Mr Speaker. Bonzour Mr Speaker. E bonzour tou koleg Onorab. Byensir en bonzour

pou Vis-Prezidan. E bonzour spesyal pou nou bann envite ki dan Galeri, bann etidyan e bonzour tou dimoun ki a lekout.

Mr Speaker, mon annan en *Private Notice Question* ki lir koumsa;

Akfer ki Gouvernman Sesel in vwar li i neser pou negosye sa senk *Cadillac Escalade Bullet Proof* ki'n arive dan pei le 3 Zen 2023 sa lannen? Mersi Mr Speaker.

MR SPEAKER

Mersi Onorab. Vis-Prezidan, ou repons silvouple?

VICE-PRESIDENT AHMED AFIF

Mersi bokou Mr Speaker. Bonzour Mr Speaker, bonzour *Leader* Biznes Gouvernman, *Leader* Lopozisyon, tou bann Manm Lasanble, tou bann dimoun dan Galeri, bann zanfan, sirtou e pep Seselwa a lekout.

Mr Speaker, Sesel in resevwar - i resevwar plizyer donasyon avek plizyer Gouvernman. I annan serten donasyon ki ou negosye, e son bann bezwen i tre spesifik. I annan serten lezot ki ou prezant zot ou bezwen ek sa donater, e li i swazir sa don ki li i vwar apropriye oubyen ki li i kapab fer pou ou a sa moman letan.

Dan ka sa donasyon ki nou ti resevwar le 3 Zen 2023, sa ti tonm dan kad en laranzman sekirite ant Sesel ek *Abu Dhabi*. Mr Speaker, ti napa negosyasyon spesifik lo sa 5 transpor. Sete en don ki nou ti ganny enformen, in ganny aprouve anba sa laranzman sekirite, e nou ti resevwar sa bann transpor e lezot lekipman ler ti ariv isi le 3 Zen, 2023.

Mon, mon pa dan en pozisyon alors pou al dan en detay spesifik lo akoz sa bann lekipman, ou donasyon lezot lekipman ti ganny fer pou rezon sekirite nasyonal. Mon profite pou dir ki tou bann regleman konsernan lenportasyon sa kargezon ki ti arive le 3 Zen 2023, ti ganny swiv, e sa i enkli regilasyon pou lenportasyon. Mersi bokou Mr Speaker.

MR SPEAKER

Un instant bann Manm. Mersi. Mon war tou bann Manm ki'n lev lanmen. Mon pou fer en komanter avan zot komanse. Mon'n note ki Vis-Prezidan dan son larepons in endike ki i annan serten size sekirite, e i byensir anba *Standing Orders* nou bezwen respekte sa. *Standing Orders* i endike ki Manm pa devret poz okenn kestyon ki enplik sekirite Leta;- sa i enn. Donk, Manm reviz zot kestyon silvouple.

Dezyenm, i annan size ki mon'n adrese dan kestyon semenn pase, e se ki kestyon pa devret ganny servi pou fer en argiman avek Vis-Prezidan oubyen Minis, oubyen fer alegasyon, lapas pou sey dir en keksoz. So, bann Manm silvouple, si zot le zot kestyon i ganny reponn, vey sa bann pwen, e fer sir ki zot kestyon i annord. Mon a bezwen komans avek Onorab Cosgrow.

HON WALLACE COSGROW

Mersi Mr Speaker. Bonzour Mr Speaker. Bonzour Vis-Prezidan. Bonzour tou Manm, tou manm piblik ki pe ekoute, e byensir tou bann etidyan *Independent School* dan Galeri.

Mr Speaker, an vi larepons Vis-Prezidan bomaten, mon ti ava kontan Vis-Prezidan i dir avek sa Lasanble e piblik an zeneral, ler zot ti pe negosye donasyon avek sa pei an partikilye, eski a okenn moman in annan negosyasyon, par egzanp pou rod bann lekipman ouswa bann keksoz ki an se moman ozordi Sesel i bokou pli enportan?

Mon a donn en legzanp Mr Speaker; par egzanp lanbilans. Ozordi nou annan 12 lanbilans, zis 4 ki marse. *It goes to the question*, Mr Speaker.

MR SPEAKER

Non, non Onorab! Eskiz mwan, Onorab, ou kestyon pe al dan en move depar. Ou pa pe demann okenn kestyon lo sa ki la, e Vis-Prezidan in dir ti napa negosyasyon spesifik pou sa - i en laranzman sekirite.

So, size lanbilans pa...Bann Manm, mon pou fer zot kler, si kestyon pa annord mon pou ferm sa kestyon, e nou ava al lo lot keksoz, mersi. Onorab Herminie, si ou kapab reviz ou kestyon?

HON WALLACE COSGROW

Mr Speaker, mon pa ankor fini. Mon pa ankor fini Mr Speaker!

MR SPEAKER

Ou kestyon. Ou kestyon pa akseptab Onorab Cosgrow. Onorab Herminie, ou kestyon?

HON WALLACE COSGROW

(Off-Mic)

MR SPEAKER

Ou'n ti an komans avek sa lot pwen! Onorab Herminie, poz ou kestyon si ou annan?

HON WILBERT HERMINIE

Bonzour Mr Speaker. Bonzour VP, Manm koleg Onorab e tou dimoun a lekout. Mr Speaker, dapre ki nou'n war, sa bann loto i bann loto *left-hand drive*,

e dapre Lalwa, mwan, ni menm VP ouswa okenn endividi pa kapab fer vini loto *left-hand drive*.

VP in dir tou regilasyon in ganny swiv, me mon kestyon i reste, akoz ki Gouvernman in les sa arive? Mersi Mr Speaker.

MR SPEAKER

Mersi Vis-Prezidan. Si ou war i pa adres en kestyon sekirite, ou a reponn silvouple.

VICE-PRESIDENT AHMED AFIF

Non. Mersi bokou Mr Speaker, e mersi Onorab. Onorab mon vwar i drol ou demann en tel kestyon. I kler ki ou pa'n fer ou resers lo Lalwa *Custom*. E Lalwa *Custom* mon a ed ou, i; *Customs Management Act S.I 41 2019 paz 242 - left-hand drive vehicles* i permete dan Sesel avek laprouvasyon Minis Transpor. I en *restricted item*, i pa en *prohibited item*. Mersi bokou Mr Speaker.

MR SPEAKER

Mersi. Onorab Uranie, ou kestyon? Onorab Uranie, ou kestyon?

HON ROCKY URANIE

Mersi-mersi-mersi Mr Speaker. Mr Speaker, ozordi mon krwar konmsi ou'n lev pou nou, en?

(laughter)

HON ROCKY URANIE

Ale, bon, bonzour VP, bonzour tou bann etidyan dan Galeri ek zot ansennyman. Bonzour tou koleg Onorab e byensir en bonzour spesyal pou tou bann zabitan Zil Pros ki a lekout.

VP, sa laranzman sekirite ki ou pe dir la, eski ou pa pe sey anbet nou? Sa bann transpor ti'n vin espesyalman pou bann aktivite nasyonal ki zot pe fer, ki ou pou al fer la, prezan Seselwa in vwar zot. Nou, nou pe demande kan ki zot pou vin kler ek nou pou aret anbet nou isi dan sa Lasanble? Mersi.

MR SPEAKER

Onorab! Onorab Uranie i rekonnet poudir i pa en kestyon, in fer en alegasyon kont Vis-Prezidan, e ankor enn fwa mon dir...Ou konnen, mon pou aret pran kestyon si zot napa kestyon, ok? Si zot napa kestyon, zot napa kestyon! Onorab Loze, ou annan en kestyon?

HON JOHAN LOZE

Byensir mon annan kestyon Mr Speaker! Loze sa, tande ler i koze!

(Interruption)

HON JOHAN LOZE

Vis-Prezidan, e ou ava edik mwan lo Lalwa. Anba Lalwa transpor lo later, en transpor letan i ariv lo son *port of call*, pou li sorti lo sa *port of call* pou al lo son destinasyon ki en garaz, ki landrwa sa rezidansyel son propriyeter, tan ki i pa ankor ganny anrezistre, ganny son plak nimerò, i sipoze pe *sport* en plak rouz *on-test* lo la, ki pa ti leka, klerman pa ti leka pou sa bann veikil.

E mon anvi konnen akòz ki Lapolis Sesel in ed ou Gouvernman, *aiding and abetting* pou zot kas Lalwa e transport sa bann veikil lo semen san en plak *on-test*?

Mr Speaker, apre nou anvi konnen, vi ki *Custom, NDEA*, tou la grap pa'n ganny apele pou verifiye sa bann transpor, ki ti annan ladan? Prezidan dan *meeting* i dir; ou pa konnen lekel ki ou kapab *trust* konmela, ou pa kapab *trust* personn. Ki ti annan ladan, zarm, drog, kwa ki zot pe kasyet dan sa bann *Escalade*? Mersi Mr Speaker!

(APPLAUSE)

MR SPEAKER

Ankor-ankor enn fwa, alegasyon, kwa ki zot pe kasyet? Onorab Cosgrow, mon demann ou pou gard lord silvouple, mersi, e aret kriy ek mwan. Vis-Prezidan, dan son

premye kestyon, eski i annan en keksoz pou ou reponn?

VICE-PRESIDENT AHMED AFIF

Mr Speaker, mersi bokou. Mersi Onorab. Mr Speaker, mon repete ki tou regleman konsernan lenportasyon ti'n ganny swiv. Sa bann lenportasyon in ganny fer dan en kad, en laranzman sekirite.

(laughter)

(Interruption)

MR SPEAKER

Thank you.

VICE-PRESIDENT AHMED AFIF

E, tou regleman ki annan pou fer avek Ladwann in ganny swiv. Mersi bokou Mr Speaker.

(Interruption)

MR SPEAKER

Onorab. Onorab Loze, repons VP.

HON JOHAN LOZE

Mon kestyon pa ti lo lenportasyon, ti lo *transport and conveyance from port of call to destination*, plak rouz *on-test* lo sa transpor ki son Gouvernman in kont...

MR SPEAKER

Onorab Loze, repons Vis-Prezidan in kler, in dir bann regilasyon in ganny swiv. Onorab Gabriel, ou kestyon?

(Interruption)

HON CONRAD GABRIEL

Mersi Mr Speaker, mon *welcome* tou bann marmay anler dan Galeri. Bonzour spesyal zabitan Pointe Larue ki pe ekout nou e *welcome VP*. Mersi. *VP* direkteman, eski ou kapab dir ek sa Lasanble lo sa bann *Cadillac Escalade Bullet Proof*, eski in annan okenn *duty free* ki'n ganny peye? *Duty*. Eski i annan okenn *duty*...

(laughter)

HON CONRAD GABRIEL

Lo sa bann transpor? Si non, akoz, e si wi, konbyen? Mersi.

MR SPEAKER

Vis-Prezidan?

VICE-PRESIDENT AHMED AFIF

Mersi bokou Mr Speaker. Mon trouv i drol ankor en Manm Onorab Lasanble ki fer Lalwa, pa konn Lalwa.

(laughter)

VICE-PRESIDENT AHMED AFIF

Lekipman ki ganny fer vini pou Biro Prezidan i *tax-free*. Mersi bokou.

MR SPEAKER

Thank you. Onorab...

(Interruption)

MR SPEAKER

Order! Order! Bann Manm - bann Manm Lopoziyon, mon pe dir zot ankor enn fwa, si zot le demann kestyon zot bezwen gard lord, si zot le sa sesyon. Mersi. Onorab Gill, ou kestyon?

HON CHURCHILL GILL

Mersi Mr Speaker. Bonzour Mr Speaker, bonzour *VP*. *Welcome* bann etidyan ki anler e tou Manm, e tou dimoun a lekout. Mr Speaker, Prezidan Larepiblik li menm li in dir dan *meeting* ki; napa naryen pou naryen.

Mon kestyon pour *VP* se; Eski an retour, akoz si nou pran stok lakantite donasyon ziske la, i ase sibstansyel, eski an retour i annan serten keksoz ki Gouvernman Sesel li i pe, in agree oubyen i an diskisyon avek Gouvernman *UAE*? Mersi.

MR SPEAKER

Mersi. Vis-Prezidan?

VICE-PRESIDENT AHMED AFIF

Mersi bokou Mr Speaker. Mersi Onorab. Mr Speaker, sa bann lakor ki nou'n fer, i annan plizyer lakor ki nou'n fer kot nou'n ganny don. Sa i en lakor sekirite, napa okenn kondisyon. I annan en lanmitye ant Sesel ek *Abu Dhabi*. E anba sa lanmitye, sa bon relasyon ki egziste ant sa 2 pei, plizyer keksoz in ganny fer dan lefase.

Zot a rapel zot menm nou ti ganny 50mil vaksen avek *Abu Dhabi*. Napa en santimet, en gren disab, en gren later Seselwa ki'n ganny vann, oubyen naryen ki'n ganny vann akoz sa, se en lakor.

I annan pep Seselwa ki ti, zot menm, atraver biznes ek endividi ti donn R78milyon pou *COVID*, eski ti annan okenn kondisyon ek *businessman* ki'n fer sa don? Non! Set en don dimoun in anvi fer.

En lopital konplet, Onorab Uranie La Digue li menm i konnen, R60milyon, eski nou'n fer okenn lakor pou ganny, pou donn zot okenn later oubyen okenn privez akoz sa? Non, ti en don.

Zot ava enpresyonnen ki apre plizyer deseni ki'n ganny promet, sa lavites ki ozordi sa Gouvernman pe fer sa monte. En lekol *NIHSS*, R20milyon investiser lokal in investi, eski ti annan okenn kondisyon

in fer pou li? Non. E i annan plizyer ankor.

2 *oxygen plant* ki nou'n gannyen resaman. Onorab pe demande si i annan okenn keksoz ki nou gannyen, akoz nou ganny en don, nou'n ganny en *oxygen plant*, i fer 3 ozordi, anba zot ladministrasyon ti annan zis 1, mon per pou mazine ki ti arive si sa ti kase, eski nou ti fer okenn kondisyon pou ganny sa bann don? Non.

Lekipman *mammogram* fek gannyen. *Lift* pou lopital Sesel, ankor investiser ki'n mete, e i pe ganny enstale. E lanbilans, mon'n tann nonm lanbilans menm ki kestyon pa ni relevan, selman mon a dir dan kad ou kestyon ki ou'n demande, i annan 2 lanbilans fek arive, e i annan 5 ankor pe arive byento, e tousala don. 5 lanbilans pe arive ankor, e tousala don.

(APPLAUSE)

VICE-PRESIDENT AHMED AFIF

Mr Speaker, si mon pou koz lo don, i annan en kantite ki ganny fer. Napa kondisyon, nou fer sa akoz lanmitye. Semen ki pe fer dan sid Mahe, Onorab Adelaide i konnen, ou sorti dan krwaze semen Les Canelles, ou fer tou dilon dan sid Cap Mason, Maravi, i pou ale ziska lot kote, pas Baie

Lazare. Tousala se bann don ki nou pe gannyen.

Byento pou annan en don 80 *unit* Barbarons, ankor dizon en R80milyon don, eski i annan kondisyon? Non. Onorab, nou ganny sa akoz sa bann pei i travay byen avek nou. Zot apresye sa travay ki Gouvernman Sesel pe fer.

(APPLAUSE)

VICE-PRESIDENT AHMED AFIF

Zis pou zot lenformasyon, Mr Speaker, Onorab *Leader* Lopozisyon ti la semenn pase ler nou ti ouver Lanbasad Ameriken, e si i ti tann parol sa Anbasader, zot, Gouvernman Ameriken in ouver en Lanbasad apre 27an ki i ti fermen anba zot ladministrasyon. E sa i montre bon relasyon, sa sipor, konfyans ki sa bann Gouvernman etranze in annan lo Gouvernman Sesel, e ozordi zot pare pou met en kantite a nou dispozisyon.

(APPLAUSE)

VICE-PRESIDENT AHMED AFIF

Si ou war sa don in vini ozordi i zisteman dan sa laliny, tou sa bann keksoz ki pe arive pou Sesel, mon ti kapab nonm ankor bokou. Annefe Onorab, le 17 Zen, byento nou pou

ganny 4 bato *fast response boat*, ankor don, napa okenn kondisyon. *Fast response boats* pou *Coast Guard*.

(APPLAUSE)

VICE-PRESIDENT AHMED AFIF

E sa i vin dan kad nou langazman, e zot in war sa langazman ki nou annan pou fer sa lalit kont drog ek bann sibstans ilegal. Zot pe donn nou 4 bato. Lasin in promet ankor 1 korvet pou nou e sa pou arive byento.

Mr Speaker, lalis i long, nou pa fer *deal* nou. Mon konpran petet lo zot kote zot toultan annan sa bann, dan zot prop mo, mefyans, me sa Gouvernman en Gouvernman ki travay drwat, e lezot Gouvernman i rekonnet sa travay drwat ki nou pe fer, se sa rezon ki nou pe ganny sa bann kalite don. Mersi bokou.

(APPLAUSE)

MR SPEAKER

Mersi. Kestyon Onorab Aglae?

HON EGBERT AGLAE

Mersi Mr Speaker. Bonzour VP. Mr Speaker, VP fek nonmen la ki nou pou ganny 4 bato, 1 korvet. Mon pou zis demann ou si sa pa pou en rezon sekirite?

(laughter)

HON EGBERT AGLAE

In dir. Prezan mon ti a kontan demann VP, eski 5 transpor, vi ki ou'n dir pou rezon sekirite, i pou defann pei Sesel kont okenn lenmi, ouswa pou protez zis 1 group dimoun? Sa i enn.

Dezyenm, aköz... Parey ou'n anonse la ankor, e bann donasyon ki nou ganyen parey bis, nou'n ganny bato osi dan lepase, nou'n ganny vaksen, tousala zot mont lo medya, i ganny anonse, swa atraver *Foreign Affair*, ouswa atraver en lot departman, aköz sa enn...

Parey ou'n nonmen la i annan 4 bato avek ankor 1 korvet, pa ti kapab anonse pou dir; Leta, pour rezon sekirite, i bezwen 5 transpor *bullet proof*. Aköz pa ti fer sa? Mersi.

MR SPEAKER

Mersi. Vis-Prezidan, san ki ou al lo okenn detay sekirite, ou a reponn *please*.

VICE-PRESIDENT AHMED AFIF

Wi, mersi bokou, Mr Speaker. Mersi Onorab. Mr Speaker, mon pa pou al dan okenn detay sekirite. Mr Speaker, i normal sa, si 5 bato i vini, nou pou dir 5 bato i vini, dan laranzman sekirite menm.

(Interruption)

MR SPEAKER

Onorab Pillay, silvouple, lord.

VICE-PRESIDENT AHMED AFIF

Non-non. Mon pe zis reponn sa kestyon spesifik ki'n demande, son prensip. Son prensip se si i sekirite, nou a dir i annan sekirite, nou pa pou al donn detay ki kalite fizi i annan lo sa bato, ki son grander, ki son kapasite. Nou pa pou donner sa bann detay, be selman nou a dir, parske nou, nou en Gouvernman ki krwar dan latransparans e nou pou donn otan lenformasyon ki nou kapab.

Mr Speaker, kot i konsern, eski nou krwar nou bezwen en transpor pou rezon sekirite dan sa pei? Mon ti a kontan *remind* Onorab ki, ozordi nou pe viv nou anba en klima kot nou pe fer fas avek plizyer diferan menas, i annan en bann ki relye direkteman ek sekirite.

Par egzanp ozordi, nou pe travay avek en group dimoun ki pa anvi travay ek nou. Zot pa anvi travay dan linite.

(APPLAUSE)

VICE-PRESIDENT AHMED AFIF

Zot pa anvi partisip dan la demokrasi, e i vre pou dir zot annan en tas vyolans ki'n kite lo zot parti dan listwar Sesel.

(APPLAUSE)

VICE-PRESIDENT AHMED AFIF

Alors, eski-eski i pa normal pou nou mazin sekirite koman en laspe enportan pou nou pei? Nou pa pe mazin pou nou, Mr Speaker. Annou get nou listwar resan, lesey pou met en *bomb* kot Grand Anse *Petrol Station*, Grand Anse.

(Interruption)

VICE-PRESIDENT AHMED AFIF

Grand Anse Mahe, dan ou distrik, en. O bor kot ou, o bor ou distrik. Dekouver *armoury* ranpli ek zarm kot en lakour prive. *Ok?* Mon pa anvi al dan detay mon. Resaman, de semenn pase, *AK-47* ki ankor in ganny dekouver, mon pa'n akiz person, in ganny dekouver dan en lakour prive, ankor, *ok?* Tousala se bann keksoz ki en realite ozordi.

Ozordi Mr Speaker, ozordi Mr Speaker, nou, nou bezwen annan en responsabilite ler nou resevwar bann dimoun enportan. I annan en kantite dimoun enportan ki vin Sesel ozordi, tel ki Lerwa ek Larenn

La Suède, nou annan Prens *Monaco* ki ti vini, Prezidan Kenyatta, Prezidan Ruto, byento nou pou annan Prezidan Kagame.

E nou tou nou konnen ki nivo sekirite ou bezwen annan ler ou pe anmenn bann dimoun sa nivo. Semenn pase Onorab ti la, nou ti anmenn Depite Sekreter Deta Ameriken, pli o zofisye Ameriken ki'n deza vizit Sesel. Be nou bezwen donn zot sa ki zot ekspekte, sa konfor, sa sekirite ki zot merite.

E eski sa i nouvo dan Sesel? Non, i pa nouvo dan Sesel. Ansyen Prezidan Michel, i ti annan en *BMW*, e parkont *left-hand drive*, blan. Ti anmennen dan zot administrasyon, *ok?*

(Interruption)

VICE-PRESIDENT AHMED AFIF

I annan en lot *BMW* ki ti vin dan son non, *bullet proof*, blende. *Ok?* Ansyen Prezidan Rene, ti annan en *Jaguar*, *bullet proof*. Alor, eski akoz en Prezidan, en Sefdeta i servi en transpor ki blende, eski i annan en keksoz ki mal, zot trouv keksoz mal ladan?

Mon pa trouv keksoz mal ladan mwan. Sa i normal dan nenport ki ladministrasyon, nenport ki pei. Mon trouv drol ki zot pe fer en gran zafer lo en

keksoz normal ki en don, ki en pei in fer avek Sesel dan kad laranzman sekirite, ki nou pe demann sitan kestyon lo la.

Nou pa'n fer naryen mal. Nou pa'n kas okenn Lalwa. Pa'n kout pei naryen. Nou pe met nou alaoter ki Sesel i devret ete. E petet zot pa konnen ki mannyer sa i devret ete, se pou sa rezon Lanbasad in fermen pandan 27an, ler nou'n vini zot in deside reouver, zot war nou, nou annan sa standar. Mersi bokou Mr Speaker.

(APPLAUSE)

MR SPEAKER

Mersi. Onorab Aglae, ou kestyon in ganny reponn. Ou annan en klarifikasyon, kwa?

HON EGBERT AGLAE

En klarifikasyon VP. Eski ou kapab dir ek sa pep Seselwa, parey ou'n dir, eski nou Sefdeta pou servi sa 5 transpor ki'n antre dan pei le 3 Zen?

MR SPEAKER

Mersi Onorab. Mon krwar sa i klerman en size sekirite. Onorab Lemiel, ou kestyon?

HON SYLVANNE LEMIEL

Mersi Mr Speaker. Bonzour VP e tou dimoun ki pe ekoute. Bonzour tou nou bann etidyan ki anler dan Galeri. VP ou'n

enform nou, ou'n inform sa Lasanble ki tou prosedir *Custom* in ganny swiv. Enn, mon ti a kontan konnen si zot *Custom* li menm ti'n donn zot en *waiver* pou zot kapab *clear* sa bann transport?

E dezyenmman, i vremen... Konmsi en dimoun ki mon mon'n swiv en pe politik, mon'n la dan 6em Lasanble, Onorab Ramkalawan ti *LOTO*, e mon rapel pandan sa bann letan toultan i ti dir; si Sesel nou viv lo don?

E ozordi nou vwar avek bon lanmitye ki parey ou pe dir VP, ki ou annan avek sa bann pei zanmi, ki Sesel i annan avek sa bann pei zanmi, pa ou, egzakteman.

(laughter)

HON SYLVANNE LEMIEL

Me, dan sa letan osi mon krwar ler nou ti pe ganny sa bann kantite don osi, mon krwar ki sa relasyon Sesel avek sa bann pei osi ti bon, me selman mon ti a kontan konnen ozordi an tan ki ozordi zot ki dan Gouvernman, zot ti vwar ki nou pe viv zis lo don, mon ti a kontan konnen kwa ki'n sanze prezan, ozordi? Mersi Mr Speaker.

MR SPEAKER

Mersi Onorab. Vis-Prezidan?

VICE-PRESIDENT AHMED AFIF

Mersi bokou Mr Speaker, mersi Onorab. Onorab lo kote Ladwann, mon repete, tou regleman ki annan pou fer avek Ladwann ti ganny swiv. Tou! E sa i, sa mon repete avek ou. An sa ki konsern donasyon, mon krwar napa en pei ki pou refiz donasyon, me sa Gouvernman, nou osi pran *loan*.

Por pou pran *loan* byento pou fer devlopman *extension* por. Plizyer lorganizasyon Gouvernman i prete, Gouvernman toulezour i prete. *Treasury bills* nou pe *issue* toulezour. Toulezour nou annan en det ozordi ki probableman environ R4bilyon, be nou pe prete. Nou pe prete, nou pe rann tou, e byensir ou pa pou zanmen dir non si en dimoun i vin donn ou en don.

IMF in met larzan dekote pour Sesel, i pa en don, i en pre. Me, wi, nou pa en pei ki pou rezet don, me selman kot i nesaser, kot nou pa ekspekte personn pou vin donn nou en don, nou pou prete, nou pa pou viv lo donasyon. Me nou dir mersi tou bann pei ki pe fer nou sa loner e konfyans pou fer bann don avek nou. Mersi bokou Mr Speaker.

(APPLAUSE)

MR SPEAKER

Mersi. Kestyon Onorab Larue?

HON FLORY LARUE

Bonzour Mr Speaker, ou tann mwan? *Ok*. Bonzour Vis-Prezidan, bonzour tou dimoun, bonzour bann zanfan dan Galeri. Vis-Prezidan, eski ou kapab dir nou lo ki non sa bann transpor pou ganny anrezistre, lefe ki ou'n deza dir nou ki i annan en Prezidan, li i ti annan enn ti anrezistre lo son non letan ti vini?

Eski ou kapab dir nou, kekfw si nou ti trouv nou \$50milyon, nou ti kapab pey nou prop keksoz e pa kontinyen demann don? Mersi.

MR SPEAKER

Dezyenm kestyon i *out of order*. Vis-Prezidan ou kapab reponn premye kestyon.

VICE-PRESIDENT AHMED AFIF

Mersi bokou Mr Speaker, mersi Onorab. Premye kestyon, bann transpor pou ganny anrezistre anba *President's Office*. Mersi.

MR SPEAKER

Mersi. Onorab Pillay, ou kestyon siplemanter silvouple?

HON SEBASTIEN PILLAY

Mersi Mr Speaker. Ozordi mon'n tann tou keksoz, *ok*. Mr Speaker, premye kestyon. Vis-Prezidan in sit regilasyon Ladwann, e anba regilasyon Ladwann i osi annan en regilasyon lenportasyon...Pa regilasyon, en Polisi lenportasyon ki *left-hand drive vehicles* ou bezwen, ou pa kapab anmennen dan pei, personn pa kapab anmennen.

Leta in anmenn 5 *left-hand drive vehicles* dan pei, in dir in ganny en *waiver*. Eski nou kapab war sa *waiver* ki Vis-Prezidan i dir zot in gannyen ek Ladwann, eski i avek li la ozordi bomaten dan Lasanble Nasyonal? E akoz i pa avek li bomaten dan Lasanble Nasyonal, premyerman? Sa i premye kestyon.

Mon dezyenm kestyon, Mr Speaker, ler ou'n *rule* kestyon Onorab Cosgrow *out of order*, VP li menm in eksplike ki mannyer lanbilans eksetera. Sa ki mon anvi demann li, ler ou ti pe aksepte sa 4 *Cadillac Escalade*, ou bezwen aksepte...5 *Cadillac Escalade Bullet Proof*.

Ler ou ti pe aksepte sa 5 loto, ou ki'n bezwen aksepte sa 5 loto, be akoz ou pa ti vire poudir mon bezwen lanbilans, mon bezwen zenerater, mon bezwen latizann, mon bezwen sa? Akoz ou pa ti vire pou aksepte sa, me selman ou

aksepte sa 5 loto? Prezan sa 5 loto i vin Sesel, e ou koz lalang devan Lasanble, Mr Speaker.

(Interruption)

MR SPEAKER

Hold on. Onorab! Onorab, ou *retract!* Ou *retract* silvouple, e si ou kontinyen dan menm laliny mon pou koup ou kestyon.

HON SEBASTIEN PILLAY

Mon *retract* Mr Speaker.

MR SPEAKER

Mersi.

HON SEBASTIEN PILLAY

Ou pa dir Lasanble laverite, kan lo sa bann loto ti napa okenn plak *on-test* pou permet zot roule lo semen. Savedir 2 keksoz in arive, Mr Speaker. 1 Lalwa i aplik pou sitwayen ordiner, 1 Lalwa i aplik pou Prezidan Larepiblik. I ganny drwa fer vini 5 *Cadillac Escalade Bullet Proof* san plak *on-test* i mont lo semen, eskorte par gard ki ede pou komet en lofans, i ganny drwa kas regilasyon lenportasyon.

So, mon kestyon pou Vis-Prezidan, akoz alor? Akoz alor ki sa bann loto ti napa sa plak, e akoz dan bann kominike ki'n sorti sa ki Lepep in ganny dir se ki sa bann transpor i pou Departman Lapolis, e non pa pou Biro Prezidan, e la ou vin

dir nou poudir sa bann transpor i pou Biro Prezidan? Sa i mon dezyenm kestyon.

MR SPEAKER

Sa i fer ou 3 kestyon, Onorab!

HON SEBASTIEN PILLAY

Mon trwazyenm kestyon, Mr Speaker.

MR SPEAKER

3 kestyon!

HON SEBASTIEN PILLAY

Mon trwazyenm kestyon, Mr Speaker. Ou'n *allow*, ou'n *allow* Vis-Prezidan pou fer en *statement* lo bann Manm dan mon parti dan sa Lasanble, Vis-Prezidan in dir i annan en tas vyolans lo nou, ou pa'n aret li ou, *ok?* Si i annan en tas vyolans lo nou, i annan en tas vyolans lo Onorab William, i annan en tas vyolans lo Onorab Larue, i annan en tas vyolans lo Onorab Poris...

MR SPEAKER

Onorab!

HON SEBASTIEN PILLAY

Akoz zot tou zot ti dan sa parti. Prezan Mr...

MR SPEAKER

Onorab, ou pe al dan bann size, e ou pe fer bann alegasyon ki *out of order*. Ou annan en kestyon? Si ou

annan en kestyon poz li e terminen silvouple.

HON SEBASTIEN PILLAY

Mr Speaker, mon annan en kestyon, *ok?* Eski Prezidan Larepublik alors i per ki *United Seychelles* pou fer en *attempt* lo son lavi? Se sa ki ou pe dir dan Lasanble. Ou pe koz linite, ou vin koz pli gro mansonz pou kre...

MR SPEAKER

Onorab, mersi. Mersi! Mon'n dir ou, ou pa kapab...Ekout mwan Onorab! Vis-Prezidan i la pou reponn kestyon. Ou bezwen adres li avek kourtwazi e ou bezwen respekte li. Ou pa kapab servi bann mo parey "mansonz", "lalang". Mersi Onorab! Mon a ekout ou *point of order*, selman ou kestyon in fini terminen. Ki ou *point of order?*

HON SEBASTIEN PILLAY

Mr Speaker, mwan mon annan en privez koman en Manm Lasanble pou ganny respe ler mon asiz la. *Respect is given, respect is earned*. Ou le mon donn respe Vis-Prezidan, me eski Vis-Prezidan in donn respe mon kote lataz ozordi bomaten? Larepons i kler, e non.

In *avoid* donn larepons pou en kestyon ki ti senp, in rod tou fason pou kasyet

laverite dan en kestyon ki ti senp, e ou'n les li fer bann...

MR SPEAKER

Mersi. Vis-Prezidan ou a reponn kestyon Onorab Pillay silvouple.

VICE-PRESIDENT AHMED AFIF

Mersi bokou Mr Speaker. Mersi Onorab. Mr Speaker, mon pou repete ki tou reglemantasyon konsernan Ladwann ti ganny swiv. Sa *statement* ki ganny fer par *Leader* Lopozisyon ki transpor ki *left-hand drive* pa ganny drwa anmennen dan Sesel, i fo, kategorikman fo.

Anba *S.I.* 41 2019 paz 242 i montre ou poudir sa i dan *Schedule 2* koman *restricted item*, i pa en *prohibited item*, ou annan drwa anmennen, e i mete dan *fourth column* pou dir; i ganny anmennen *with permission of the Department of the Minister for Transport*. Mon krwar ou pe deside pou ou fer krwar ou pa'n war tousala. Pep Seselwa i kler, regilasyon i *black and white* devan nou, e ou konnen ki manner i ete. Alor...

(Interruption)

MR SPEAKER

Mersi.

VICE-PRESIDENT AHMED AFIF

Si sa pa ti le ka...

(Interruption)

MR SPEAKER

Order!

VICE-PRESIDENT AHMED AFIF

Ki manner Prezidan Michel ti anmenn *left-hand drive*?

(Interruption)

MR SPEAKER

Order silvouple!

VICE-PRESIDENT AHMED AFIF

Be akoz i ti fer li dan en fason legal. Napa naryen mal ladan. Mr Speaker, en lot *statement* fo, e mon bezwen koriz Onorab ler i fer bann *statement* fo, i fer sa ase souvan. I dir pou dir *press release* ti dir pou dir ti anmenn sa bann transpor pou lapolis, ankor i fo, Onorab. I ti dir dan sa *press release*; '*Another batch of equipment for the police force is due in the country soon.*' *Another batch* -, se pa sa, *equipment is due*. I kler lo la in mete; *has received, Seychelles has received a donation...*

(Interruption)

MR SPEAKER

Silvouple! En moman! En moman Vis-Prezidan! Onorab Pillay, silvouple, si ou demann en kestyon ekout repons, e osi Onorab Loze, silvouple aret kriye dan lasal, mersi. Vis-Prezidan, termin ou repons silvouple.

VICE-PRESIDENT AHMED

AFIF

Mersi bokou Mr Speaker. Mon le zis finalman dir ki tou sa ki nou'n mete i korek, napa okenn lekipman ki nou'n dir pe vin pou lapolis apre nou fer krwar konmsi pe al pou Biro Prezidan. I pa korek ditou.

Tousala pe vin... *Press release* in ganny fer par Biro Prezidan. Sa bann lekipman mon pe konfirm avek ou i pou Biro Prezidan, e in ganny fer dan kad en lakor sekirite. Tou regleman Ladwann in ganny swiv. Mersi bokou Mr Speaker.

MR SPEAKER

Mersi, nou a termin kestyon la. Vis-Prezidan nou remersye ou pou ou partisipasyon, e nou swet ou bonn kontinyasyon. Mersi. Mersi Manm pou zot kestyon. Avan nou pas lo lezot kestyon pou lot Minis, i annan 2 Manm ki'n demann mon *matter of privilege*, e mon pou les zot met zot *matter of privilege*. Onorab Herminie?

HON WILBERT HERMINIE

Bonzour Mr Speaker, mersi pou donn mon laparol. Mr Speaker, mon pe *raise* en *matter of privilege* ki mon ti vin war ou bomaten *regarding* sa *Urgent Question* ki mon ti'n mete, rezilta konsiltasyon bann paran avek Minister Ledikasyon Perseverans, e ti annan en *urgency* ki bann paran pa ankor ganny ase klarifikasyon lo ki pou arive avek zot bann zanfan.

Sa rezon ki mon ti'n met sa kestyon, e mon ti ava kontan ki ou ti avan met sa kestyon lo papye pou nou kapab ganny plis leklersisman. Mersi.

MR SPEAKER

Mersi. Wi, Onorab in mete en *Urgent Question* ki mon pa'n mete pou *Order Paper*, e mon rezon i senp, mon pa'n war okenn *urgency* dan sa kestyon ki'n demande ki vreman zis demann Minis rezilta en rankont avek paran. Mon pe envit Manm pou met son kestyon... Onorab, ou'n *state* ou *matter of privilege*, napa diskisyon lo la.

Mon pe envit Manm pou met son kestyon koman en kestyon ordiner, oubyen mon'n osi ofer li posibilite si i pa oule esper Minis vin dan Lasanble ankor pou li met en kestyon pou en *written answer*, e i a kapab ganny en repons. Mersi, Onorab

Cosgrow, ou *matter of privilege?*

HON WALLACE COSGROW

Mersi Mr Speaker pou donn mwan laparol pou mon fer en *matter of privilege* ozordi bomaten. Mr Speaker, anliny avek bann gidans e *Ruling* ki ou'n donner dan Lasanble an sa ki konsern *posting* lo *Facebook*, mon annan en *matter of privilege* an sa ki konsern en *posting* fer par Onorab Henrie, *Deputy Speaker, Leader, I mean* Sekreter Zeneral Parti *LDS*.

E ladan mon pou lir Mr Speaker;

“As a Member of the National Assembly, I’m embarrassed by the US Caucus stance. A public meeting is not a public political meeting, we need to have duty and care for the constituency that we represent. There’s absolutely no reason to be absent-(ce) from the public meeting in our district unless we are simple, bann move dimoun.”

Mr Speaker, dan mon lenterpretasyon mwan, dan lenterpretasyon *simple* ann Angle, i annan detrwa lenterpretasyon *but amongst other interpretation*, mon ti ava kontan konnen si Onorab Henrie pe tret *nou* koman bann dimoun, isi sirtou bann Manm *US*, nou bann dimoun

ki bet, nou bann dimoun ki napa en serten nivo konprenezon, e apre lefe ki i tret nou bann move dimoun?

Pou mwan sa i pa akseptab koman en Manm sa Lasanble, i pa akseptab pou en *Deputy Speaker*, Mr Speaker, met en kalite komanter koumsa lo *Facebook*, e akiz lezot Manm lo kote sa latab *of being simple*, bet, e osi bann move dimoun! So, Mr Speaker, mon ti ava enplore ki Mr Henrie i demann nou en leskiz e i retir sa komanter, mersi.

(APPLAUSE)

MR SPEAKER

Mersi. Bon, mon'n...In ganny met mon latansyon sa *post* ki Onorab Cosgrow in fer referans lo la. Anfen, mon war li petet regretab, be selman mon ti a dir mon pa war sa mo *simple*, e move dimoun ki i en lensilt.

(Interruption)

MR SPEAKER

Mon krwar i ase banal koman langaz, me selman i annan en pwen ki ou'n fer ki mon a met dan latansyon *Deputy Speaker*, se ki koman *Deputy Speaker* i devret evite komant lo travay bann Manm an deor Lasanble. Mersi. Nou pa pou pran okenn diskisyon lo la.

Nou ava...Onorab Pillay, ki ou pe lev lanmen, pou kwa? Ou annan en *matter of privilege*, wi, mon a ekoute.

HON SEBASTIEN PILLAY

Mersi Mr Speaker. Mr Speaker, *Standing Orders* i donn mwan privez pou anmenn en *PNQ*. Ler mon anmenn en *PNQ*, mon demann kestyon, mon sipoze ganny larepons. Si Minis pa donn son larepons, mon pa pou kapab ensiste en larepons.

Be selman mon bezwen met lo rikord Mr Speaker, ki mon santi poudir ozordi bomaten, e i pa fer premye fwa, ki a sak fwa ki nou annan *PNQ* ki poz en serten lanbarasman pou Gouvernman - dan sa konteks Mr Speaker, mon ava refer ou avek Konstitisyon ki, en Minis i bezwen vin reponn en kestyon ki zot responsabilite. E lefe ki Lalwa in ganny kase, an relasyon ek sa kestyon ki mon'n demande, ou pa'n permet nou kapab fer Vis-Prezidan donn nou en *commitment* ki i pou al fer sir ki sa bann keksoz pa repet ankor.

Ou'n plito *allow* bann komanter ganny fer lo repitasyon mon parti, en alegasyon ki nou, nou vyolan in ganny fer kont nou, san ki ou'n anpes *Deputy* Speaker, e la ler en dimoun i tret nou

nenport kwa mal lo nou, ou dir i *ok*, napa naryen ki mal avek.

So, mon le met devan ou Mr Speaker, ki sa i en vyolasyon nou privez koman Manm Lasanble, e ki anba nou *Standing Order* nou Konstitisyon, *the Chair is supposed to be impartial!* Mon met sa devan ou Mr Speaker akoz mon pa konnen kot nou pe ale.

MR SPEAKER

Mersi. *Ok*. Eski Onorab i konpran ladiferans ant demann en kestyon e akiz Vis-Prezidan 'mansonz'?

(APPLAUSE)

MR SPEAKER

Se sa ladiferans pou mwan. Si ou demann ou kestyon, mon napa okenn problem avek demann ou kestyon, me nou bezwen lakourt wazi e nou bezwen en langaz ki respektab e respekte kanmarad. Mersi bokou.

Madam Rapor...Eskiz mwan. I sanbleman nou annan en difikilte, Minis pa ankor arive, mon pa konnen ki'n kapab arive, petet en lanpesman, en aksidan. I pe antre? Bon, si pe antre nou a zis pran en pti *break* teknik, 5 minit pou nou permet Minis fer son antre silvouple.

(technical break)

MR SPEAKER

Byen, Lasanble a rebran. Bonzour e byenveni Minis Billy Rangasamy Minis pour Later e Labita, e egalman Mr Denis Barbe *Principal Secretary* pour Labita, Mr Steve Mussard *Deputy CEO* pour *Property Management Company*. Sa 2 zofisyé i la pou nou premye kestyon. Premye kestyon limero 57 i dan non Onorab Michel Roucou. Onorab?

HON MICHEL ROUCOU

Mersi Mr Speaker, mon a dir *bonjour à tous, bonjour* Minis ek ou lekip. Bonzour spesyal Miss Bernice avek son bann etidyan, e Mr Speaker, zis si mon kapab ganny en pti sans senpatiz avek lafanmir Boniface, espesyalman Mr Georges Boniface ki dan mon distrik, apre ki zot in perdi zot papa dan sa lensidan yer. Mersi.

Minis, mon kestyon i koumsa; An vi ki nou pe vwar bokou aktivite ilegal ek anti-sosyal kot laplipar *housing estate*, eski Minis i kapab dir Lasanble, ki bann mezir ki son Minister pe mazin vin avek pou dekouraz bann tel aktivite? Mersi.

MR SPEAKER

Mersi. Minis, ou a adres kestyon silvouple?

**MINISTER
RANGASAMY****BILLY**

Bonzour Mr Speaker. Bonzour tou Manm Onorab, tou sa ki a lekout lo televizyon, lo radyo, tou dimoun dan Galeri, bann zanfan osi bonzour. Mwan osi mon le profit sa lokazyon, Mr Speaker, pou partaz mon kondoleans ek lafanmir Boniface. Mon konnen douler perdi en pros, sirtou en papa, e mon priy senyer ki Bondye a donn zot kouraz, e Bondye a donn nou kouraz osi bomaten dan nou deliberasyon dan en fason pozitiv. Mr Speaker, mon remerci Onorab Roucou pou son kestyon. Nou bezwen fer resorti ki manda mon Minister se pou konstri bann *housing estate* e bann fasilite lenfrastruktir, dan en fason soutenab dapre kapasite bidzeter Gouvernman.

Bi se pou ofer nou pep, nou frer ek ser Seselwa en meyer landrwa reste ki konfortab, e bann paran i kapab fer grandi zot fanmir dan en lanvironnman ki anpe e an sekirite

Bann lagreman ki sak fanmir i sinyen ek *PMC* avan zot antre dan zot lakaz, la zot byen kontan zot in ganny zot lakaz, souvandfwa apre bokou letan zot pe espere, i kouver sa bann size swivan, tel ki; pa zwe lanmizik for pou *disturb* bann vwazen, pa sonny zannimo dan bann lakaz, pa

fer bann konportman anti-sosyal, pa servi ou lakaz pou fer laboutik, sirtou pou vann bann zartifay ilegal, respekte ou vwazinaz, eksetera, kit landrwa prop.

I malere pou war sa bann kalite konportman anti-sosyal lo bokou nou bann *housing estate*. Sa in ganny re fer sorti avek mon osi par bann Onorab lo tou lede kote latab.

Personnelman, mon leker i seryezman desire, aköz mon konnen ki kantite travay mon Minister i fer pou kapab, e lenvestisman ki Gouvernman i fer pou kapab fer sa bann proze.

Nou war ki i annan problemn drog, vandaliz, dezagreman, kankan ant vwazen, salte ki ganny zete partou kote, lanmizik for ki ganny zwe, zabitan ki gard zannimo lo *estate*, bann loto katyapo i ganny kite dan *parking*. Mr Speaker, bann aktivite sorselri, grigri pe kontinyen ogmante osi dan bann *housing estate*.

Dan peron nou'n tande, menm dan bann deba, bann *meeting* piblik ki nou'n fer, ki dimoun pe pike dan peron e disan pe ganny penn lo miray. *PMC* i ale lannmen i al re penn, i re kontinyen. I douloure Mr Speaker, i sagrinan e i malere.

Mr Speaker, tou sa bann problemn ki mon'n mansyonnen, i relye

direkteman avek sa bon savwarviv e osi sa mank respe, e osi sa respe ki nou manke pou nou vwazinaz. Tousala, mon pa pe vin fer en *lecture* Mr Speaker, me tousala i komans dan lakour.

Zanfan i swiv model paran e sa ki nou pe vwar, nou bann paran, nou pa pe donn bon legzanp nou bann zanfan, e elve zot byen dan lakour.

Anliny avek manda *PMC* koman en *Property Management Corporation*, an relasyon ek sa kestyon ki Onorab in demande, mon pe fer resorti ki bann zefor swivan pe al entansifye.

Nou pe ranforsi lekip *enforcement* pou adres sa bann move konportman lo bann *housing estate* ki pa anliny avek zot lagreman. Nou pe al re anforsi sa *enforcement team*. Deza nou'n komans anmenn bann resours apropiye.

Mon konnen Onorab Roucou ou en *ex* travayer *PMC* e ou ti dan sa lekip, ou konn lenportans sa *enforcement*, e sa nou pa'n met li lo sa standar e menm pli o firamezir ki nou resours i permet nou.

Nou pou fer plis *monitoring* ki enkli bann vizit, sa bann vizit anonim lizour koman aswar lo bann *estate* koman en tim. Ler mon koz en tim, *PMC* fodre pa i vwar li, li tousel dan sa demars.

Nou osi bezwen pran kont serten sekirite nou bann zofisye lo serten sa bann *estate*, kot i annan plis aktivite lavant sibstans ilegal. Nou pe entansifye nou zefor pou travay pros ek Departman Lapolis e Lotorite Distrik osi.

Byento nou pou anons nouvo *Board PMC*, e nou pe fer sir ki sa *Board* pou annan sa bann kapasite dan lekip pou kapab osi adres sa bann problem, pou partaz bann nide e adres sa bann problem anti sosyal.

Plis ledikasyon ki enkli *meeting* lo bann *estate*, *counselling program* lo medya e osi dan bann lekol, nou santi dan bann lekol nou ankor annan en sans pou nou adres sa problemn avek nou bann zanfan, ki la osi mon war bann zanfan i la pe ekout mwan.

E se sa kot nou pou travay pros ek Minister Ledikasyon pou nou fer bann travay dan bann lekol ek bann zanfan depi ler zot zenn. En fason nou kapab ed zot, parske petet dan lakour zot pa pe ganny sa led avek lafanmir.

Bann aksyon legal ki enkli eviksyon, sa nou pou al ranforsi. Mon'n demann *Rent Board* ki tonm osi anba mon Minister, pou *fast-track*, pou rod fason get Lalwa ki mannyer nou kapab *fast-track* sa bann ka *PMC*, kot nou war

serten endividi pe teroriz nou bann zabitan dan bann *housing estate*.

Mou le fer resorti ki malgre en move zimaz i ganny penn lo bokou bann *housing estate*, i pa tou bann zabitan, parfwa i zis en pti group ki pe fer sa bann problem. Alor sa endividi nou konn zot, e travay pou entansifye pou nou antre dan laliny eviksyon, apre ki nou fer tou zefor posibil, nou pou napa swa. Sa i pa normal, e Gouvernman pa pou kapab tolere sa bann move konportman.

Evidaman, lo kote Minister Gouvernman anliny avek *manifesto* nouvo ladministrasyon, nou program lakaz i ganny vize ver responsabiliz nou pep. Mr Speaker, mon krwar zot ava agree avek mwan ki bann dimoun ki'n fini aste zot lakaz, zot in fini pey zot lakaz, i pran pli bon swen ek zot lakour e vwazinaz an zeneral.

Me bann ki pe lwe, pe pey R1,000 par mwan, nou vwar ki zot ki pe fer plis... Malerezman, plis move konportman. Sa i pa normal, parske nou pe travay dir pou ed zot, me parkont se zot ki pe fer plis *disturbance*. Mon pa pe dan okenn fason koz an mal la, me se sa ki nou pe vwar konm *pattern* dan bann *housing estate*, malerezman.

So, alors anliny ek sa, ler mon dir ou bann dimoun ki'n aste zot lakour, se zot ki nou vwar zeneralman i fer bann konportman pli agreab. Se pou sa rezon ki nou'n entrodwi sa prodwi *mid-range condos* osi e nou pe akseler nou bann prosedir pou *convert* bann *housing estate* lo *condominium* o pli vit posibil, en fason ki bann zabitan i a kapab pran responsabilite zot lakaz, e si posibil petet dan bann lezot deba ki nou pe fer, ankouraz sa bann zabitan pou form en lasosyasyon antre zot, en group ki ava kapab *gère* zot *estate*.

Zot a kapab annan en *warden* ki ava donn en koudmen pou zet en koudey letan keksoz pe al mal, pli boner. Parske *PMC* en parti lekip 50 travayer anviron e i enposib avek anviron en 150 *housing estate* dan pei pou kouver tou sa bann *estate*.

Alors *locally* si nou'n met bann dimoun, sa nou krwar i ava ed nou. Be sa i en demars ki nou bezwen fer aköz i en nouvo fason, en nouvo fason atak sa problem, e fer dimoun pran zot responsabilite.

Mon le fer resorti, a lafen mon fer konklizyon lo mon repons sa keston ki demann lakaz abordab i aktyelman plis ki 2mil sote, e lenvestisman ki Gouvernman pe anvizaze fer

dan sa prosen 3an i tre signifikan.

Alor i enportan pou sa bann lenvestisman ganny valorize par tou nou bann frer ek ser Seselwa, e tou nou bann fanmir ki ganny en trwa lo zot latet pou epanouir.

Ou a dakor ek mwan Mr Speaker, ki nou bezwen regard sa bann sityasyon dan en fason pli konpreansiv, aköz pa zis mon Minister e *PMC* ki pou kapab adres tou sa bann problem. I neserer Mr Speaker, pou annan en deba nasyonal lo sa size e met an plas en striktir Nasyonal pou adres sa bann konportman anti-sosyal dan nou kominote, dan nou bann *housing estate*, menm mannyer mon pe tande dan bann *meeting* piblik osi, sa pe penetre agresivman dan nou bann lekol osi.

So, nou lapriyer se ki, tou nou bann zabitan i a ini ansanm e pous bann move konportman anti- sosyal dan nou bann *housing estate* dan en fason kolektif. E mon Gouvernman i reste pozitiv e determinen pou travay ek Lotorite Distrik, lapolis e pou travay for, ki mannyer nou kapab avek resours ki nou annan, pou elimin sa fleo sosyal dan nou bann *housing estate*.

Nou pe pran sa demars vremen serye, e la mon seryezman demann sipor tou

lede kote latab parske zot tou zot annan bann *housing estate* dan zot distrik pou nou ini ansanm lo sa pwen pou byennet nou pei, nou zanfan e nou pti zanfan demen. Ki Bondye i beni nou, i donn nou sa lafors. Mersi Mr Speaker.

MR SPEAKER

Mersi Minis. Onorab Roucou, ou siplemanter?

HON MICHEL ROUCOU

Mersi Mr Speaker. Minis, mersi pou ou larepons ki ou'n donn nou. Mon osi mon le dir mersi bann travayer *PMC* ki nou konnen pou dir sa travay i pa sitan fasil. Minis, parey ou'n dir se ki nou annan nou apepre en 150 *housing estate* ek bann nouvo ki pou vini, e pou zot kapab fer sa travay lo bann *housing estate*, byensir zot pou bezwen led avek bann larestan Lotorite parey lapolis.

Souvandfwa pli gro problem ki annan se ki lapolis i bann *first respondent* lo bann *case* lo bann *housing estate*, be selman problem ki arive se ki *PMC* li menm li, zot pa gannyen sa kominikasyon ek lapolis pou zot kapab pran serten aksyon apre ki bann lagreman in ganny kase.

Apre ou'n dir pou dir se ki nou annan Departman Legal avek *Enforcement*, si ou kapab dir nou, pou zot kapab fer en travay ki vremen

formidab lo bann *housing estate*, konbyen zofisye la zot annan ki pe travay dan sa bann departman, e konbyen zot krwar pou dir zot merite annan ki pou ed zot kapab fer sa travay? Mersi.

MR SPEAKER

Mersi. Minis, nou a sey reponn bann kestyon direk, bref silvouple.

MINISTER

BILLY

RANGASAMY

Wi, Mr Speaker, mersi bokou, pou ou kestyon siplemanter osi Onorab. Mon a reponn premye parti kestyon epi *PMC*, *Deputy CEO* i ava donn detay lo lekip *enforcement*. Lo laspe legal Onorab, sa i en size vremen enportan, e parey mon'n fer resorti dan mon repons, nou pe revwar menm *Board PMC* pou annan en reprezantan kot i konsern Departman Lapolis oubyen en eleman legal, ki kapab lo sa *Board* pou donn gidans kot i neser.

Me parkont avek Departman Lapolis, parey ou konnen, e bokou bann Onorab i konnen letan zot donn mon bann lenformasyon mon partaz sa, e nou fer sir ki nou kapab ganny zot sipor byen boner.

E letan nou pou al fer sa bann, ranforsi nou travay pou al fer sa bann vizit, bann *site*

visit dan en fason anonim, nou pou al ek lapolis osi pou nou annan sa sipor. Parske souvandfwa ki nou vwar osi, i annan ka osi ki i annan en dekoneksyon.

Par egzanp; lapolis i kapab fer serten travay lo son nivo lo enn nou bann *housing estate* en dimoun i ganny atrape avek petet serten sibstans ilegal, e ka pe pas Ankour eksetera dan bann prosedir, me *PMC* pa ganny met okouran.

So sa i en keksoz ki nou pou bezwen met en *database* pou nou anmas sa bann keksoz, lafason ki *PMC* i osi okouran ki i annan en sityasyon ki pe devlope avek en tel lakaz, e tel zabitan dan son bann *estate* ki li i pe okipe.

Alor sa travay i pli pros ek kanmarad. E parey mon dir ou, ti annan en reprezantan osi dan *Board* ki mon pe pouse pou nou kapab gannyen, i ava edan. Akoz parske nou'n vwar fransman verite, annefe i annan plis ki 150. I annan 165 *housing estate* e i annan plis ki nou pe fer, pe met *on board*. Petet dan detrwa zour i ava annan nou pros 200 *housing estate*. So i enportan pou nou kapab ganny sa prezans lapolis etrwat pe travay avek nou. Mersi Mr Speaker pou sa.

MR SPEAKER

Mersi. *Deputy CEO* pou azoute?

DEPUTY CEO STEVE MUSSARD

Bonzour Mr Speaker, bonzour tou dimoun. Mersi Minis pou donn mwan sa sans pou mon reponn sa dezyenm parti kestyon. Onorab, direkteman i annan 8 *staff* pou le moman dan *enforcement* avek dan legal. I annan 5 dan *enforcement* apre i annan 3 dan legal.

E mon pran sa loportinite pou dir ou osi tou nou'n fer en pti sanzman dan nou striktir, ki nou'n apwent en *legal officer*, akoz sa nou ti war pou sa bann letan sirtou ler mon vini sa de dernyen lannen nou'n war poudir i annan en mank swivi lo bann *case* legal.

Nou annan avoka ki nou servi, bann Avoka *external*, e zot ki pran nou bann ka pou anmenn lo *Rent Board* eksetera. E nou ti war ki napa sa swivi, napa sa latansyon ki donnen kot *case* i ganny swivi, repons bann deliberasyon avek nou Avoka pou li al Ankour, sa pa ti pe ganny met...I pa ti ganny konmsi dan en fason striktire.

Avek en *legal officer* nou war poudir li son rol prensipal se pou li annan sa lyezon ant *PMC*, sa bann kliyan, avek nou Avoka avek Lakour. Akoz i osi

i bezwen al reprezant nou osi tou ansanm avek nou avoka dan bann *case*.

Mon le dir ou se ki i pa zis *case* anti-sosyal nou *deal* avek, ou'n travay kot nou ou osi ou konn en pti pe pli byen ki mon. I annan *case* dimoun ki pa peye. I annan bann lezot ka ki relye avek zot *tenancy agreement* ki nou bezwen pran kont. Alors nou'n fer sa *move* kot nou'n apwent en *legal officer* dan *PMC*, kot li i ava fer sa bann swivi. I a ranforsi lo sa bann *case* ki nou met Ankour. E osi zis pou siplemant sa ki Minis in dir, ler nou ganny sa bann *case* ki sorti kot lapolis, ler zot fer zot bann *raid* zot bann travay. Sa osi i a ganny pran kont dan en fason pli striktire.

E mon kontan pou dir ou osi tou se ki nou annan en nouvo *manager enforcement*, e li i en plezir ki i annan en kolaborasyon direk avek lapolis, e nou war poudir sanzman i pe vini. Konmsi i annan sa komitman avek sa nouvo tim, sa nouvo *manager* ansanm avek nou *legal officer* kot nou kapab, nou kapab met lanmen lo bann *case* e pran aksyon en pti pe pli vit ki oparavan.

Apre osi ou bezwen mazine ki *legal officer* osi pou, i bezwen anmas son bann lenformasyon aköz nou pa kapab zis pran en dimoun

anmenn li Ankour, ouswa met li lo *Rent Board*. Nou bezwen annan dokimantasyon ki nou mete.

So, tousala, tousala mon war ki pou annan en diferans. E nou pou kapab pran aksyon en pti pe pli direk, pli vit. E ki petet - pa petet, nou optimis ki keksoz i a *slowly* vire e nou war travay lapolis ki pe fer ki anmenn sanzman ler zot lo teren. E la nou a ganny sa bann lenformasyon ki sorti kot zot, kot nou a pran kontan e nou a pran sa aksyon ki neserer. Mersi Mr Speaker. Mon espere i en pti pe kler Onorab, en?

MR SPEAKER

Mersi. Minis, oule azout keksoz, silvouple?

MINISTER

BILLY

RANGASAMY

Wi, Mr Speaker, mon pou fer li vit. Lo sa pwen mon anvi zis lans sa lapel ek tou bann Onorab dan lasal pou kontinyen les nou okouran bann keksoz ki pe devlope dan zot distrik, zot fer sa byen, kontinyen, e nou, nou a fer sa lefor lo nou kote pou nou adres sa.

Parey mon dir, i pa zis en travay *PMC*. Nou a kapab al pli o profon, parske sa bann *housing estate* la, se la mazorite kot nou bann dimoun pe grandi. Nou

Seselwa pe grandi. Alors i enportan ki sa landrwa i en landrwa *calm*, i en landrwa anpe, an sekirite. E nou, nou bezwen *unite* lo sa pwèn e fer sir nou kapab tir sa bann fleo en fwa pou tou.

E, lo sa pwèn mon osi le demann sa lapel dan bann lekol osi, si bann *teachers* i okouran serten keksoz pou nou ganny sa lenformasyon. E i annan bokou travay ki nou bezwen fer ansanm koman en Lasanble, koman en Gouvernman. E *judiciaire* osi i bezwen *unite* ek tou bann zabitan osi. Mersi bokou Mr Speaker.

MR SPEAKER

Mersi. Mon annan 10 Manm ki'n lev lanmen. Mon pou donn larestan letan ki annan dan sa peryod pou sa kestyon, me selman mon pe demann bann Manm silvouple, si zot kapab gard 1 kestyon e *maximum* 2. Onorab Samynadin, ou kestyon?

HON KELLY SAMYNADIN

Mersi Mr Speaker. Bonzour Minis, *Deputy CEO*, *PS* e tou dimoun a lekout. Minis, nou konnen ki i annan bokou ki *PMC* i fer an term *enforcement* pou kapab anmenn lord ek stabilite dan bann *housing estates*, e ou'n mansyonnen ki eviksyon pou ganny ranforsi.

Mwan, mon ti a kontan konnen kwa ki pou ganny anmennen diferan an konparezon avek ozordi an sa ki konsern eviksyon. Akoz nou pe war ki toultan se bann menm dimoun ki pe fer bann menm lofans lo *housing estates*. E se sanmenm sa ki pe *raise* fristrasyon parmi bann lezot *tenants* kot zot pe dir ou napa naryen ki pe ganny fer. Me toultan se menm dimoun ki pe fer menm keksoz.

Kwa ki pou ganny anmennen diferan? Mon pa pe dir pous dimoun, me selman kwa ki pou ganny anmennen diferan pou kapab *raise* en pti plis *awareness* lo fason ki zot pe konport zot lo bann *housing estates*? Mersi.

MR SPEAKER

Mersi. Minis, oubyen *panel*? Nou a fer li bref silvouple.

MINISTER BILLY RANGASAMY

Wi. Mr Speaker, *allow* mwan pou mwan avek ou permisyon, Mr *Deputy* i ava donn en pti pe plis leklersisman lo sa pwèn, en? Mersi bokou.

MR SPEAKER

Mersi. *Deputy CEO*?

DEPUTY CEO STEVE MUSSARD

Mersi Mr Speaker. Mersi Onorab pou ou kestyon. *Ok*, kwa ki diferan? Kwa ki pou diferan? Zis pou mwan... Mon a tourn en pti gin lo repons Minis ki'n donner oparavan.

In fer kler poudir nou pou entansifye en kantite nou bann aktivite. Sa i enn, en? E Minis osi in fer kler ki nou pe ganny aproz ek *Rent Board* pou nou kapab ganny sa latansyon pli direk.

Lezot plandaksyon ki nou pe fer ki pou, nou krwar ki pou anmenn sanzman, nou pe vin avek en kantite bann program edikasyonnel.

E ki nou war, se ki, se ki ler *estate* i ouver, bann lakaz i ganny donner, dimoun i vini, nou bann zabitan i vini, son bomaten nou fer en pti *meeting*, nou annan en pti *meeting* rankont, nou zwenn zot, nou koz ek zot e apre *that's it*, ou konnen, zot ganny zot lakle, apre zot ale apre *finished*, napa sa enteraksyon ankor.

E nou'n dir non, nou bezwen kontinyen *at least* dan sa premye 3 a 6 *mois* kot nou kontinyen reste ek sa bann dimoun, nou tim *enforcement* sirtou en, nou kontinyen reste ek sa bann dimoun, kontinyen annan sa koneksyon direk ek zot konmsi pou *at least*...

Akoz ou konnen, bokou dimoun zot antre dan *housing estate*, zot pa ankor, *you know*

lafason viv dan *housing estate* i bokou, bokou diferan, *you know*, i pa parey, i pa parey ler nou... Ou konnen deor la ler nou dan lakaz tousel.

So, mon war sa koman petet en dimoun i dir ou i *common sense*, nou sipoze war, ou pe reste pres ek ou kanmarad, ou pa sipoze zwe lanmizik for, ou pa sipoze sonny zannimo, i *common sense*. *Yes, its common sense*, be eski dimoun pe fer li? Non! Non!

Ok. Petet lo kote ledikasyon, nou a kontinyen travay ek zot, nou bann program ki pe vini lo televizyon, nou bann *leaflet*. Menm nou pe prepar en program pou nou al kot Minister Ledikasyon pou nou al dan lekol, akoz ki nou war?

Pa zis granmoun ki fer bann aktivite anti-sosyal lo *estate*, se bann marmay tou, akoz zot groupe lo *staircase*, menm i anmenn drog lo *estate*.

So, nou dir nou bezwen al dan lekol, akoz lekel ki grandi lo *estate*? Se bann marmay, e oli sa ankadreman pou bann marmay konpran poudir nou pe viv, nou *style living* ozordi, se lo *housing estate*. Minis in dir nou ki plis *housing estate* pe fer, nou bezwen fer li pou nou bann dimoun, be oli sa ankadreman pou bann zanfan? Nou bezwen sa, napa pou le moman.

So, sa i en programm agresif ki nou determinen pou nou ale, nou pou tap laport Minister Ledikasyon pou nou antre dan lekòl, fer sa bann aktivite, fer sa bann programm avek lezot programm sansibilizasyon ki nou pe anvizaze fer, e bezwen fer sa pou nou kapab anmenn sa sanzman.

E avek nou *legal officer* ki'n ganny apwente, la nou bann *case* a ganny striktire pli byen, akòz bokou fwa ou war ki ou napa ase sibstans pou anmenn en *case*. Wi, dimoun i konplent parey ou pe dir, ki i tou kou i menm dimoun, be ler ou al dan *file* sa dimoun la, napa naryen!

Petet ou a war en let, napa bokou keksoz ki i ase, ou konnen, i ase *enough* pou ou konmsi fer en *case* eviksyon, akòz eviksyon mazine ou, eviksyon letan ou fer eviksyon, nou pe *evict* en fanmir antye, *you know*, sa i en keksoz ki pa vreman...

Si nou bezwen fer li, *sorry*, si nou bezwen fer li nou ben fer li, selman i pa en keksoz ki nou dir, ale eviksyon, nou bezwen fer eviksyon. Non.

Pou en eviksyon nou bezwen *compile* nou, sa dosye byen, fer sir poudir parey ou pe dir, i tou kou menm dimoun, e ler pou al dan sa *file*, ou pou ouver sa *file*, ou

pou remarke poudir vre tou kou menm dimoun, e la nou kapab pran sa, ale fer li koman en *case* eviksyon.

Nou'n deza fer li dan lefase, e i pa nou swe, selman nou pou bezwen fer li akòz problem pe agrave e dimoun pa pe konpran, kantmenm ou pe ale ou pe kriy zot.

Nou fer en kantite travay pou dir ou Onorab, en, en kantite travay lo term kriy sa bann dimoun, *counselling*, koze, donn en notis, donn en *warning*, donn en *first warning*, e tousala pa telman abouti dan naryen akòz ou war poudir i menm zafer.

Be la avek nou *legal officer*, kot nou kapab anmas sa bann lenformasyon, *compile* li, annan keksoz pou nou kapab dir en eviksyon, akòz eviksyon ou pa kapab zis ale dir, *evict* sa dimoun akòz i pe fer serten keksoz. Nou bezwen annan en...

Akòz i en *case* Ankour, en *case* Lakour sa, so nou bezwen annou nou ase bagaz pou nou ale, met sa *case* devan poudir vreman pa kapab fer naryen ek sa dimoun ki la. Nou bezwen pran dernyen resours se nou bezwen fer en eviksyon, malgre. *Ok*, Onorab? Mersi, Mr Speaker.

MR SPEAKER

Mersi *Deputy CEO*. Pa bliye, annou sey reste direk lo kestyon. Onorab Naidu, ou kestyon?

HON SATHYA NAIDU

Bonzour Mr Speaker. Bonzour Minis ek ou delegasyon e tou zanfàn ki dan Galeri. Mr Speaker, Minis, an relasyon avek bann ka eviksyon, konbyen ki relye avek drog, akòz nou tou nou konnen ki problem nou annan, e si zot annan statistik lo lakantite *housing estate*, zot annan apepre 165, konbyen *estate* ki ou kapab dir problematik?

E eski in annan en analiz ki *PMC* in fer... Mon konnen i pou annan en kou, kot zot pe regard vizavi enstalasyon bann *CCTVs* e osi dan bann *housing estate*, aletranze nou war kot i annan en *gated community*, i annan en sekirite ki an plas, par legzanp *Harrison*, lafason keksoz pe ale, mon, mon le teren, i pa ok pou en dimoun viv dan lafreyer ozordi...

MR SPEAKER

Ok, Onorab.

HON SATHYA NAIDU

E les en lot pran kominote antye otaz. I pa akseptab. Fodre ki nou kapab fer en keksoz ver sa. Mon swe se ki Minis i kapab angaz avek Minis Fonseka pou nou kapab

remedye sa sityasyon, akòz Kordgard Santral i pa lwen. *Barrel...*

MR SPEAKER

Onorab, ok.

HON SATHYA NAIDU

Barrel - ler zot dir gard i al *Barrel* i vin en problem. Alors mon swete ki i ganny pran an konsiderasyon. Mersi.

MR SPEAKER

Ou kestyon, nou'n note, mersi. Minis? Minis oubyen *panel*, silvouple?

MINISTER

BILLY

RANGASAMY

Mersi Mr Speaker. Onorab, mon santi ou annan en pasyon. Mon *share* ou pasyon lo sa size, bokou, e ou konnen lo bann statistik. Les mwan mon a ganny byen mon bann *facts* pangar mon ava - mon pa les *mislead* Lasanble. Mon a ganny byen, mon a partaz sa lenformasyon, me tou *housing estate* preski tou ou kapab dir nou annan problem.

I annan bann detruwa pti legzanp *in between* be selman lamazorite sa problem i egziste, la mazorite. E sa bann mank responsabilite par nou bann, nou bann *tenants*, nou bann zabitan ki pa pe respekte zot kontra ki zot ti'n sinyen zour zot ti'n ganny zot lakaz,

nou bezwen *deal* avek. Sa nou napa swa.

E mon apresye ou konsey ki ou'n don mwan kot mon bezwen ranforsi sa travay etrwat avek Minister Fonseka par egzansp, ek son lekip pou nou adres sa problem e vwar ki mannyer nou kapab *tighten up* lo sekirite, parey ou pe dir sirtou *Harrison* i zis la de pa avek *police headquarters*. So, i en langazman agresiv, entansifye avek lapolis, i neserer. Mersi Mr Speaker.

MR SPEAKER

Mersi Minis.

MINISTER **BILLY**
RANGASAMY

Deputy i anvi azout en pti parol, en pti mo Mr Speaker, si i posib.

MR SPEAKER

Ok. Deputy, en pti mo.

DEPUTY **CEO** **STEVE**
MUSSARD

Mersi Mr Speaker, mon pa pou long. Vre, Onorab, mon toutafe dakor ek ou, kot nou bezwen annan sa kolaborasyon direk avek lapolis. Akoz parey re fer sorti *Harrison Street Estate*. E ou konn byen, nou fek fer en gran travay renovasyon anler, konmsi laba, kot nou'n met tou lede blok; 2 blok laba kot nou'n met sa 2 blok annord.

Zot zoli *staircase* byen prop byen penn, aranze partou.

Ozordi ki ou war? Mon pase, mon pase, pa tou lede blok en, 2 blok selman 2 blok byen diferan. 1 blok ou war li i annord, dimoun i respekte kanmarad e zot viv byen, e i montre ou poudir nou kapab viv ek kanmarad, nou kapab viv byen ek kanmarad, nou kapab viv dan en kominote lo term *housing estate*.

Be ler ou get sa lot blok, i fatig ou, i trakas ou, konmsi i sagrinan ler ou war ou'n depans sa kantite larzan, ki nou napa. I annan en kantite *housing estate* ki nou bezwen fer en bon pe travay e ou war dimoun i...Ou menm ou'n war, mon kapab krwar ou'n war. Mersi Mr Speaker.

MR SPEAKER

Mersi. Onorab Labrosse, ou kestyon?

HON RICHARD LABROSSE

Mersi Mr Speaker. Bonzour Mr Speaker, bonzour Minis ek ou delegasyon. Minis zot in koz en pti pe for lo *enforcement* kot *PMC*. Mon kestyon i se ki mon konnen *enforcement* zot bezwen travay avek serten dokiman, parey nou dir, serten Lalwa, serten *Act*.

Eski dan sa *monde* ki nou pe viv ozordi la ek bann kantite problem ki pe ogmante, eski i annan en

konversasyon zot in ganny fer prevwar sa *Act* oubyen Lalwa, ki konsern *enforcement*, sirtou konsernan *housing estate*? Mersi.

MR SPEAKER

Thank you. Minis?

MINISTER **BILLY RANGASAMY**

Mersi Mr Speaker. Prezantman koman mon pe koze la, avek *AG's Office*. Nou pe travay lo revwar en kou sa *PMC Act*. E osi parey mon'n dir boner, *Rent Board* son *Act* osi, pou nou vwar bann fason ki manner nou kapab entansifye, donn nou plis fleksibilite, pou nou adres bann problem - en fason pli vit. Parey zot dir *fast-track* bann ka *PMC*. Par egzanp, nou pe sey travay avek, pa dir nou pe seye. Nou pe travay avek Biro *Attorney Zeneral* pou nou adres sa.

Pli boner ti annan en lot pti kestyon lo *CCTV installation*. I en keksoz nou pou met devan avek *Board PMC* ki pou ganny apwente byento, pou zot revwar sa dan zot kapasite bidzeter, si i posib.

Me zeneralman lo size bann Lalwa, nou bezwen moderniz en pe sa bann Lalwa ki byento i ava vin kot zot dan Lasanble, e mon asire tou lede kote latab i a donn sipor pou

nou kapab met sa bann fasilite legal an plas. Mersi Mr Speaker.

MR SPEAKER

Mersi Minis. Onorab Bastienne, ou kestyon?

HON DESHEILA BASTIENNE

Mersi Mr Speaker. Bonzour Mr Speaker. Bonzour Minis. Bonzour zanfandan Galeri. Minis, dan bann blok *flat*, la mon pou montre spesifikman Perseverans 1, sirtou, i annan bokou problem kot i konsern *staircase*, eski i akseptab pou en group dimoun dir avek bann lokater ki lwe lakaz, ki zot napa drwa met lord dan *staircase*?

Zot lwe lakaz, *staircase* i reste propriyete *PMC*. E apre ki aksyon ki *PMC* pe mazin pran avek serten lokater ki zot menm zot anmenn bann group dimoun dan *staircase*, ek zot, blok akse. Zot blok akse bann lezot lokater ki pe pey zot lakaz. Zot pa kapab antre dan zot lakaz, zot bezwen al rod parfwa, al rod lasistans lapolis pou zot kapab ganny semen pase.

Mersi.

MR SPEAKER

Mersi. Minis, repons?

MINISTER **BILLY RANGASAMY**

Mersi Mr Speaker. Larepons, i pa akseptab, Onorab. I seryezman pa akseptab, e sa pe pran en *pattern* ki pe fransman verite pe *out of control*. Alors enn sa kalite aksyon ki nou bezwen pran atraver *PMC*, atraver *Enforcement Unit* ek led lapolis, nou bezwen netwaye dan sa bann peron, ki sa i pa landrwa pou dimoun asize, blok e teroriz zot kanmarad. I pa normal.

E byensir, *Deputy CEO* kekfwa i ava annan lezot keksoz pou azoute. Me lo nou kote - lo kote Gouvernman, i pa en keksoz ki nou pou pran alalezer. E mon ankouraz, parey mon'n demann sa lapel oparavan, ed nou ganny sa lenformasyon lo sa bann kalite blok kote sa pe arive. E mon lans sa lapel osi ek bann zabitan sa bann landrwa, pou fer konnen.

E parfwa, ennler zot fristre, zot fer konnen zot pa vwar naryen ki pe ganny fer, me avek sa lenerzi ki nou pe lanse lo sa laspe, e nou pou bezwen ranforsi e pran aksyon, e *clean up* sa bann peron o pli vit posibil. Mersi Mr Speaker.

MR SPEAKER

Mersi. Onorab Romain, ou kestyon?

HON GEORGES ROMAIN

Mersi Mr Speaker. Minis, bonzour avek ou delegasyon. Minis, ansanm avek *PMC* e lapolis, nou ti fer en vizit lo tou blok flat Dan *Café*. E nou ti koz ek tou zabitan la. Be i paret mwan ki bann zabitan - parey nou bann koleg osi in fer resorti - zot pe viv en pti pe dan lafreyer. Menm zot zanfan pa kapab al deor pou zwe dan sa gran *parking* ki *available* avek a bann flat.

E nou'n vwar bokou bann dimoun ki sorti an deor ki vremen ki pe fer en pe *disturbance* kot sa landrwa. Zot kas lalimyer. Mon konnen Depite *CEO* i konn tre byen, nou'n kominik lo la plizyer fwa.

E alors Minis, mon krwar enn fwa pou tou, merit annan en mezir ki ganny pran o pli vit posibil. Mon ti a kontan demann ou sa kestyon Minis; ki nou kapab fer, oubyen ou Minister pou fer pou evit sa problem? Espesyalman parey mon pe dir Dan *Café*. Akoz sa bann dimoun pe viv en pe dan lafreyer.

Mersi Mr Speaker.

MR SPEAKER

Mersi. Minis, nou a sey bref silvouple?

MINISTER

BILLY

RANGASAMY

Wi, wi, mersi Mr Speaker. I kler ki problem i grav, bann

ka i grav e parey mon'n dir boner, nou pou...Nou napa swa la kot in arive. Nou'n koze, nou'n amelyore, nou'n eksplike, nou'n dyaloge, be i pa pe ganny ekoute. Alors nou pou bezwen pran aksyon. E mon priye letan nou pran aksyon personn pa sot anler dir ki zot pe ganny bate, abize, vyole, *whatever*. Me keksoz i a ganny pran dan en fason drwat e onnet. Me selman pa pou kapab tolere.

Sa i vre sa ki ou pe dir, i pa toultan sa bann dimoun ki pe reste la ki pe fer sa bann problem. I annan dimoun ki vini i *park* la, zot ki zwe lanmizik for, zot ki fer *disturbance*. I pa akseptab dan nou bann *housing estate*. I en landrwa kot nou...En *housing*, kot nou reste, nou viv nou dan lape ek sekirite, non pa pou ganny sa bann teroris vin *disturb*.

E mon krwar poudir, eskiz mwan mon servi sa mo, bann, zot pe dan en fason, imilye bann ki pe sey viv byen trankil, akoz zot fer bay zot fer dominer. E lo kot i konsern lapolis sirtou, dan bann prosis normal, nou bezwen *deal* ek sa bann ka vreman agresivman.

E petet lenportans ki nou bezwen pran se *capture* tou sa bann lenformasyon ki zot pe partaz ek nou. E met bann travay neser en pe parey

Prezidan ti donn lord dan enn bann *meeting* piblik letan i ti ganny met okouran ki pe pase Dan Tol, dan distrik Les Mamelles. Nou pou bezwen antre dan sa laliny, me tou keksoz i bezwen ganny fer dan en fason byen, me kot i mal nou bezwen *clean up*.

Sa i enportan Mr Speaker, parske nou bann zanfand ki pe viv dan sa bann vilaz, landmen bomaten i pe leve i pe al lekol, zot bezwen...I pa en landrwa normal pou war sa bann kalite aktivite.

Alors, tou zefor pe ganny fer lo kote Gouvernman. Me nou bezwen ki kominote i donn nou koudmen. E letan zot vwar bann keksoz, zot brav pou partaz lenformasyon avek nou osi. E nou osi nou bezwen protez zot. Parske parfwa zot per pou koze. Parske zot petet zot santi zot lavi i kapab an danze apre.

Me tou zefor i dan sa laliny pou nou met en lord dan nou bann *estates*. Mersi Mr Speaker.

MR SPEAKER

Mersi Minis. Onorab Lemiel, ou kestyon?

HON SYLVANNE LEMIEL

Mersi Mr Speaker. Bonzour Minis avek ou delegasyon. Minis nou tou nou konnen par egzanp, i annan bann nouvo konstriksyon ki ganny fer, en?

Annou pran legzanp Anse Royale zot in fer *STP*, ou'n fer lakaz li menm, me parfwa ou war i annan serten keksoz ek lakaz ki petet i soutir sa bann dimoun pou zot vin *harbour* dan sa landrwa pou fer bann keksoz ilegal.

Eski zot pe mazin fer okenn modifikasyon *in terms of* ler zot pe...Par egzanp la, kot ki annan sa bann *issues*, eski zot pe mazin vin fer serten modifikasyon ek sa bann *housing estate* pou anpese ki sa bann dimoun sorti *wherever* zot sorti, ki zot vini, zot anmenn zot matla, zot vin dormi la? Oubyen koman in war en matla sal o bor *bin*, i vini i pran i anmennen i met anba kot en *STP* in ganny fer. I dormi, i vini, i pran i met dan en landrwa - nenport ki landrwa kot i war ki i kapab, zis fer antre sa matla pou li dormi. E la kot ki annan sa bann keksoz ilegal ki pe arive?

E an menm tan, ki bann aksyon ki ziska ozordi, apart *eviction*, ki bann lezot aksyon ki *PMC* zot, zot in pran avek bann dimoun ki pe fer bann keksoz ilegal lo *housing estate*. Akoz par egzanp i annan defwa, mwan, mon dan sa *housing estate* ki pa mwan ki pe fer, me en dimoun ki vin fer.

Eski zot in pran aksyon avek sa dimoun, ki sa dimoun ilegal i vin kot li, *or* zot pe pran aksyon ek sa lot dimoun ki pe

fer sa bann aksyon ilegal? Mon pa tro konpran byen. Mersi.

MR SPEAKER

Mersi Onorab. Nou les Minis reponn. Minis?

MINISTER **BILLY RANGASAMY**

Mr Speaker, avek ou permisyon, vi ki *Deputy CEO* li pli etrwatman enplike dan sa bann travay modifikasyon eksetera, mon a demann li, ek ou permisyon, pou ed mwan reponn sa kestyon.

MR SPEAKER

Deputy CEO, wi?

CEO STEVE MUSSARD

Mersi, Mr Speaker. Mersi Onorab pou ou kestyon. Mon kontan ou kestyon ki ou'n demande, akoz i zisteman en keksoz ki ti manke dan lepase se ki, sa kolaborasyon avek dimoun ki fer lakaz ki Minister, la konmela i *SIA* e *PMC*.

E tou dernyerman, i annan sa rankont *interface* ki nou fer avek *SIA*, pou nou kapab war bann serten defayans dan konstriksyon. E parey ou'n dir, i annan kantite landrwa dan nou bann *estate* kot i annan bann pti gap, bann pti trou kot, en pti trou, ou war en matla in ganny aparet, parey ou pe dir.

E bann vye *estate*, nou pe fer serten travay, menm avek *SFRSA*, kot nou kapab met bann laport *common* ki parey ou war Langleter kot i annan sa *exit*, kot...Ou konnen en bann depans ki nou bezwen fer.

E bann nouvo *estate*, nou zwenn ek *SIA* lo en baz regilye, kot nou met sa bann problem, sa bann defayans dan zot latansyon. Pou zot kapab fer zisteman modifye serten modifikasyon dan konstruksyon; ki nou pa ganny sa - sa problem pa vin la. Akoz *once* ki ou'n fini fer la, parey konmela, anba *staircase* nou'n met bann *meter*.

Bann *meter* nou ti met laport dibwa lontan, e dimoun i kase laport dibwa, zot al dormi dan *meter room* kantmenm i danzere, nou'n sey met baro aprezan. So, i annan serten keksoz ki nou kapab in fer ankor plis.

So, i annan bann dyalog ki nou fer avek *SIA* pou zot pran kont nou problem ki nou pas ladan, e modifye, fer serten modifikasyon ki *at least* omwen nou elimin sa bann loportinite kot bann...

Sirtou bann *outsiders*, en, akoz pa bann dimoun ki viv la, en, e pou zot pa ganny sa loportinite pou zot vin fer sa bann delegans la dan sa bann *estate*.

MR SPEAKER

Ok, mersi Minis pou azoute?

MINISTER

BILLY

RANGASAMY

Wi, mersi Mr Speaker. *Deputy CEO* in kouver preski tou lo sa size. Parey bann kestyon ki mon vwar pe ganny partaze dan lasal, e parey mon dir ziska konmela tou sa bann *meeting* dan distrik, sa bann pwen i leve, e i kler ki nasyonalman i annan en gro problem dan nou bann *housing estate*. I kler.

E ti'n konmans en program ki Minis Fonseka ti'n lanse; "Respe ou vwazinaz", e mon krwar koman *next step* nou bezwen al repous sa travay, sa kanpany. Parske si nou kapab fer sa mon krwar ansanm nou kapab *unite* ansanm, e fer en zefor kolektif lo en baz nasyonal pou nou adres sa problem.

Parske dan tou distrik, parey mon repet mon lekor, i annan sa problem. Dan tou *housing estate* i annan sa problem.

E alor, eskiz mwan, lo en baz nasyonal nou bezwen al repous sa Program 'Respekte ou vwazinaz'. E en fason ki nou kapab...I pa zis Minister *PMC*, petet lapolis, i annan Ledikasyon, Sosyal, Lafanmir, diferan sekter i enplike.

Alors nou bezwen rod en fason ki mannyer nou kapab adres sa problem. Pa zis solve bann solisyon. Konmsi bann problem ki la, me rod *the root cause of* sa bann problem. E sa i komans dan lakour, dan lafanmir. E fason ki paran i konport zot lekor, marmay i anmas sa, i *mirror* konportman zot paran. Alors i annan en ta travay pou nou fer.

Mr Speaker, mon krwar nou kapab pran en zournen antye debat lo la, me i kler parey mon ti fer resorti dan mon larepons, nou bezwen en deba nasyonal, parske sa ban problem i preokip nou tou, i preokip nou pei, i preokip lavenir nou bann zanfan ek pti zanfan.

Alors, lo mon kote mon pou travay, mon komet mon lekor pou mon al re angaz agresivman, pli agresivman ankor avek bann lezot Lotorite, e lans sa Program 'Respe nou vwazinaz' e pran aksyon pa zis koze, me pran aksyon. Mersi Mr Speaker.

MR SPEAKER

Mersi Minis. Bon mon regrete mon bezwen termin sa sesyon kestyon la. Mon annan en *full* lalis kestyon pou larestan letan ki nou annan. Nou a pran poz la e nou a rebran 11er. Mersi.

(BREAK)

MR SPEAKER

Nou a kontinyen avek kestyon, e nou annan en nouvo group zofisye, e mon annan plezir dir bonzour e byenveni Mr Gerard Hoareau *Acting Principal Secretary* pour Later, Mr Jitesh Shah *CEO Seychelles Infrastructure Agency*, ki'n zwenn Minis avek Mr Barbe pou kestyon. E nou kontinyen avek kestyon numero 58.

Mon a zis averti bann Manm, mon annan 7 kestyon lo lalis, apepre 15 minit par kestyon. Zot a konpran mwan, letan i zis pa elastik, me selman i annan plizyer bann kestyon ki lo proze spesifik, so petet i pa pou tro mal. Onorab Uranie, ou kestyon?

MR SPEAKER

Mersi Mr Speaker. Bonzour Minis ankor en fwa avek nouvo delegasyon, e byensir ankor en fwa en bonzour spesyal pou tou zabitan Zil Pros ki a lekout. Mon kestyon i lir koumsa; Eski Minis i kapab eksplik nou Lasanble kan eski proze konstrikasyon lakaz afordab pou konmanse lo La Digue? Mersi.

MR SPEAKER

Mersi. Minis ou repons?

MINISTER **BILLY**
RANGASAMY

Mersi bokou Mr Speaker. Mr Speaker, pou La Digue, Minister pe al enplimant proze lakaz abordab, 24 *unit*, an tou, an 2 faz. Parey ou okouran Onorab, nou ti pe fer en demars pou aste en morso later, fer en lesanz, e sa in mars byen e in donn nou en bon teren kot nou kapab fer premye faz proze, 12 *unit*.

Sa nou'n propoze dan Bidze pou boner lannen 2024, e balans 12 *unit* lo dezyenm faz proze pou demare ver kar 2025 e nou anvi anvizaze konplet sa proze an 2026.

So, an tou, nou pou annan 24 *unit* pou nou zabitan La Digue. Mon krwar i annan omwen en, dapre lenformasyon ki mon annan i annan apepre 25ka - 25 ka bann aplikan ki aktiv e 59 ka bann aplikan ki pa aktiv. Alors, pou nou proze lakaz abordab, nou panse seryezman avek sa proze 24 *unit* nou a kapab vreman tap for pou regle sa problem, sirtou pou bann zabitan ki pe pey zot HSS e zot lo lalis demann pou en pe letan. Sa leta proze pou le moman.

Nou annan osi lespwar pou nou kontiny proze, vi ki

ou'n demann sa kestyon Onorab pou okouran. Nou annan enn de bann aplikan, annefe kont anviron 18 aplikan ki'n montre lentere dan *mid-range condo*. So, nou anvi osi travay pou demar sa konponan *mid-range condo* osi lannen prosenn si resours finansyer i permet nou. Mersi bokou.

MR SPEAKER

Mersi. Onorab Uranie, ou siplemanter?

HON ROCKY URANIE

Mersi Mr Speaker. Vi ki mon tann Minis pe nonm si zot ganny ase finans, me akoz plizyer fwa mon pe tann pe dir nou pe fer en kantite profi, en kantite *savings*, so mon swete ki nou pou annan finans pou sa.

Minis, sa bout later ki nou'n fer lesanz, eski dan bann prosen lannen ki pe vini, zot annan nide kontakte bann lezot biznes prive ankor, bann dimoun prive ki annan bann later pou kapab osi fer lezot lesanz pou nou ganny landrwa pou fer konstriksyon later...Lakaz lo La Digue, *sorry?* Mersi.

MR SPEAKER

Mersi Onorab. Minis, ou repons?

MINISTER **BILLY RANGASAMY**

Mersi Mr Speaker, wi, sa dezyenm pwen ki ou'n fer resorti, Onorab, anefe i en lapel ki nou pe pas...Mon pa pe fer okenn politik, me ler nou pe pase dan bann *meeting* piblik kot i konsern sak distrik, kot petet dan la sa i annan serten propriyeter, nou pe lans sa lapel, sirtou bann landrwa ki later i limite, par egzanp La Digue i enn, Praslin osi i lot.

Plen lezot distrik par egzanp Bel Air, enn ki vin dan mon latet, kot later i limite, later Gouvernman ki nou kapab devlope. Nou pe lans sa lapel ek bann propriyeter prive, apros nou. Me pou osi foudre zot rezonnab ek bann lof ki nou pe negosye lo bann pri. E si later i annan potansyel, parske nou program lakaz i vremen entansiv, i vremen enteresan osi.

E akoz nou stratezi se pou debourye al dan tou distrik pou nou ed nou bann zabitan, e bann ki nou'n vwar, sirtou pe espere en ta letan, me later i limite pou nou kapab fer bann proze e ed zot ganny en landrwa pou epanouir zot fanmir.

Alors sa lapel avek bann propriyeter prive i enn ki reste for e aktiv, e Gouvernman pe deza angaze dan plizyer negosyasyon ek serten propriyeter an se moman. So, mon kontinyen lans sa lapel. Mersi bokou Mr Speaker.

MR SPEAKER

Ankor kestyon Onorab Uranie? Klarifikasyon silvouple?

HON ROCKY URANIE

Wi, mersi Mr Speaker. Mersi Minis pou ou repons. Minis, eski tou sa bann *unit*, nou pou reste lo sa ki ou ti koze 3 lasanm? Tou sa bann apartman pou 3 lasanm parey nou ti'n diskite avan dan bann *meeting*? Mersi.

MR SPEAKER

Mersi. Minis, ou a reponn sa?

MINISTER **BILLY RANGASAMY**

Onorab, mon'n pran ou pwen, ou kontribisyon ki ou'n partaz ek nou. Nou pou osi analiz dapre demann. Nou ava analiz sa bann kliyan ki nou pe target ek sirtou sa bann ki'n espere en kantite letan, e ki pe pey zot *HSS*, zot kalite demann ki zot annan. Si i 3 lasanm,

nou a balanse nou a pran sa desizyon apropiye.

Me tou, mon stratezi, e permet mwan Mr Speaker akoz mon konnen bokou kestyon pou vin lo sak distrik, byento lo zot bann proze ki stratezi Gouvernman se, *match* sa ki nou pe al konstri avek demann sa distrik.

Se annan en - konmsi pa zis fer lakaz 2 lasanm, be si i annan plis demann pou 3 lasanm nou balanse. E nou pou dyalog avek Lotorite Distrik avek zot *MNA* lo en baz rezyonal, parey nou ti fer letan nou ti mont Praslin. Nou ti zwenn 3 Onorab Baie Ste Anne, Grand Anse e La Digue, pou nou diskit bann program lakaz e later dan zot rezyon, dan zot distrik.

Nou pou fer sa osi partou dan tou bann rezyon tre byento, en fason ki tou bann Onorab i a kler lo zot bann proze ki annan dan program Gouvernman. Mersi Mr Speaker.

MR SPEAKER

Mersi Minis. Onorab Cosgrow?

HON WALLACE COSGROW

Mersi Mr Speaker. Bonzour tou bann nouvo manm ki'n zwenn nou. Minis mon annan 2 problem la, en?

Mon premye problem i lefe ki nou ankor an Zen, e proses Bidze fek komanse, e ou pe dir nou, lakaz pou komans 2024. So nou pa ankor asire si pou annan larzan dan Bidze pou sa premye 12 *unit*. E nou pa ankor asire. Minis pa pe donn nou lasirans akoz Bidze fek komanse.

E *let alone* 2015, akoz Bidze 2025, menm si Bidze i fer dan en program 3an, napa garanti.

Mon dezyenm problem Mr Speaker, i sa ki konsern sa dernyen kestyon Onorab Uranie. Ler Onorab Uranie i dir ti annan en diskisyon pou 3 lasanm, e Minis ou larepons sete ki nou ava get bezwen spesifisite sa distrik, bann aplikan.

Be sa i donn mwan lenpresyon Minis, ki ni menm lo *drawing board* pa ankor ale sa. Si ou pe al get bezwen spesifisite, savedir zot pa ankor komans *plan*, e ozordi nou Zen - e si nou le komans lot lannen konmsi, nou napa Bidze, nou pa ankor fer plan, i paret mwan i pa lo *drawing board*.

Minis donn sa bann dimoun La Digue en lasirans ki lakaz afordab parey ti'n ganny promet, pou ganny fer La Digue, e i a sorti lo

computer parey bokou bann proze kot Minister ki ankore lo *computer*, zot ava al lo teren e dimoun a benefisyè. So, Minis, donn nou sa lasirans. Mersi.

MR SPEAKER

Mersi. Minis-Minis, annou reste lo proze lakaz afordab pou La Digue silvouple, pou kekyon letan, pou nou pa debord dan tou direksyon. Ou repons pour Onorab Cosgrow?

MINISTER BILLY RANGASAMY

Mr Speaker, mon pou donn laparey avek ou permisyon, Mr Denis Barbe PS pour Lakaz pou li eklersi bann konsern Onorab Cosgrow. Mersi bokou.

MR SPEAKER

Mersi. PS?

PS DENIS BARBE

Mr Speaker, bonzour. Onorab, mersi pou ou kekyon. Nou preparasyon bidzeter nou'n komanse nou depi an Fevriye. Nou'n esper zis *ceiling* avek Minister Finans ki donn nou e *ceiling* pou 3an. E avan nou ti antre dan preparasyon Bidze, Minister an menm tan avek SIA, ti'n fini fer en *mapping in terms of* tou bann proze ki nou pou fer dan sa prosen 5an. So

nou pe zis aliny li avek resours finansman ki Minister Finans pe antisipe anmase. E nou, nou pe met li lo nou *budget calendar in terms of* nou *proposal* ki mannyer nou pe al depans larzan Gouvernman, dan lenstans pour investisman kapital dan sa prosen 3an.

So, i la, e sa bann plan i pa zis lo en *computer* Onorab. I bann plan tanzib ki nou pe al met li anmars *provided* ki nou *ceiling* bidzeter i reste parey i ete. E sa i en prosedir ki tou le lannen i pou koumsa. Tou le lannen i ete.

Minister Finans i kominik son premye *ceiling* avek nou, nou fer nou serten propozisyon, milye e atraver lannen zot aziste *ceiling*, apre nou fer nou *final submission*.

So, leksperyans in montre nou poudir lapliparditan nou bann premye *submissions* nou tant pou al avek. E nou konfidan poudir nou bann plan ki nou pe met an mars pou distrik La Digue, i pou materyalize.

An sa ki konsern bezwen 3 lasanm. Nou ti fer proze lakaz lo La Digue 2019. Mon panse, tou sa bann lakaz ti 3 lasanm. Nou ti pe ganny nou pa mal difikilte baze lo demann a sa letan, pou nou kapab ranpli sa bann lakaz avek bann dimoun ki zot bezwen 3 lasanm.

Ti annan bokou zot ki'n antre avek en bezwen 2 lasanm dan en lakaz 3 lasanm. Menm si Onorab in fer sa demann avek Minister, nou bezwen osi aliny li avek profi nou bann kliyan ozordizour, ki pe esper en lakaz. E zis bann ti *tweak* final. Akoz ler nou pe fer nou bann Bidze i baze lo kou aktyel pou konstri lo La Digue, konbyen i pou koute pou konstri en 2 oubyen 3 lasanm, *cost per unit*.

I pa pou difisil pou nou kapab fer en pti modifikasyon baze lo bann blok egziste, pou nou *convert* en blok 2 lasanm dan 3 lasanm. Mersi Mr Speaker.

MR SPEAKER

Mersi PS. Onorab Esparon?

HON REGINA ESPARON

Mersi Mr Speaker. Bonzour Minis ek ou delegasyon. Mr Speaker, dan repons Minis letan i ti pe reponn kestyon lo La Digue, in dir pou dir i annan proze ki pou demare dan lezot distrik. Mon ti zis anv i konfirm avek nou si sa i pou enkli osi sa 12 *unit ex-Ferrari*, Glacis, si pou komanse sa lannen? Mersi.

MR SPEAKER

Mon pe... Minis, si ou'n dir i annan proze dan lezot distrik, mon a zis les ou reponn kestyon Onorab Esparon. Si ou'n entrodwi sa size, *yeah*.

MINISTER **BILLY RANGASAMY**

Wi, avek tou konfidans mon le enform Onorab Esparon, wi.

MR SPEAKER

Ok.

MINISTER **BILLY RANGASAMY**

Proze *ex-Ferrari* 12 *unit* pe demare, annefe kontrakter i deza lo *site*. Ti en proze ki ti pe ganny en *funding by Qatar*. Ti annan en pti lazistaz final nou ti pe fer akoz en moman donnen zot ti enterese pou vin fer premye pyer avek nou ler nou pe lans proze. Be apre zot in dir nou be zot annan bann lezot konplikasyon. Alors nou *go ahead* les proze konmanse. Depi mon krwar 2 semenn pase kontrakter in fini mobilize e nou pe al demar proze agresivman, Onorab.

E mon ankor enn fwa, akoz mon konnen tou Onorab pou annan bann kestyon. I annan en plan konpreansiv an plas. PS in fer resorti, nou'n respekte (Onorab Cosgrow in sorti dan lasal) bann *ceiling* ki nou'n gannyen ek Minister

Finans, Gouvernman in envestir agresivman dan son program.

E parkont - mon pa le fer politik - me si nou ti'n ekout bann onorab, petet nou pa ti ann demare pou serten proze. Akoz ti pe demande pou koup proze kapital, me nou'n toultan reste dapre nou resours, nou'n kontinyen fer nou bann proze.

Detrwa vilaz nou'n kapab ouver resaman. E la koman firamezir ki lekonomi pe amelyore, mon annan gran lespwar ki dan tou distrik nou pou sey nou *level best* pou nou enplimant en proze, sirtou pou nou adres bann ka.

E letan mon pe fer sa bann vizit distrik e *meeting*, mon pe ganny bann o profon bann ka, e mon soke pou vwar i annan bann anviron 15, 20enn ka dan sak distrik kot aplikasyon i date plis ki 15 a 20an.

So, e sa i nou bann priyorite pou nou amelyor lavi kondisyon sa bann dimoun ki pe espere, ki pe pey zot *HSS*, mon kontinyen repet sa pwen. E firamezir ki lekonomi i amelyore, e Minister Finans i donn nou serten lendikasyon lo bann serten *ceiling*. Nou pe travay dan nou *ceiling*, nou pe

enplimant sa bann proze dan en fason planifye.

Letan nou ti dan letan *COVID*, nou'n pran sa letan - mon'n deza reponn sa dan Lasanble - nou'n pran sa letan pou lekip *SIA* analiz byen bann santye, fer byen bann plan, fer bann *survey*, tyek byen bann konplikasyon, en fason la tou travay teknik zeneralman in ganny fer.

Nou annan en bon lalis proze pou nou kapab enplimante, e tou distrik san eksepsyon nou pe sey fer nou mye pou ed zot tou.

Mersi Mr Speaker.

MR SPEAKER

Minis, permet mwan, mon krwar ou'n reponn kestyon. Permet mwan pas lo lot kestyon akoz letan. Onorab Pillay?

HON SEBASTIEN PILLAY

Mersi Mr Speaker, mersi pou ou...Mon'n war ou'n note an pasan, mon'n note an pasan ki ou'n dir ek Minis li ki'n ouver sa deba, ou'n les sa kestyon pase. Bomaten malerezman, Vis-Prezidan ti ouver kestyon lo *waiver* nou ti demann li, ou pa ti les pase.

MR SPEAKER

Ale, ou kestyon Onorab?

HON SEBASTIEN PILLAY

Wi, be nou bezwen dir sa bann keksoz Mr Speaker. An relasyon avek proze La Digue, Minis, mon ti a kontan konnen, konbyen i pou koute an total pou ou fer sa proze. E dezyenmman, ler mon pe swiv bann *statement* ki ou pe fer tou le swar dan bann *meeting*, ou lir en pa mal lalis bann proze. Mon konsern mon annan se ki, *by the time* nou fini, ou annan bann proze ki deza lo *drawing board* ki ou'n fer bann *commitment*.

I annan bann proze ki ou pe met lo *drawing board*. Realistikman Minis, eski ou krwar ou pou kapab delivre lo sa proze La Digue dan dele letan ki ou ti'n agree lo komansman?

E bann lezot proze ki ou pe dir, eski ou pa krwar poudir sa pou met en presyon lo ou Minister, pou zot kapab abzorb sa kantite proze? Par lefe ki zot *completion rate* lannen pase pa ti alaoter ki nou ti ekspekte, nou ti war dan Bidze?

Mersi Mr Speaker.

MR SPEAKER

Mersi Onorab. Minis, nou kapab fer sa dan 2 minit?

**MINISTER
RANGASAMY****BILLY**

Mersi Mr Speaker. Avek ou permisyon, vi ki teknikman se Lazans Lenfrastriktir ki pe egzekit e fer *design*, egzekit nou bann proze, mon a profite demann avek ou permisyon, *CEO SIA* pou eksplik nou en pti pe.

MR SPEAKER

Tre byen, *CEO*?

CEO JITESH SHAH

Bonn apre midi Mr Speaker, tou Manm Onorab. Mersi Onorab pou ou kestyon. Lo kote kou sa proze, nou annan en *estimate*, parey Minis in reponn, lo kote egzaktaman konbyen 2 lasanm nou pe fer 3 lasanm, nou pe fer, sa pa ankor ganny etabli.

Nou konnen baze lo bann diskisyon ki nou'n ganny avek distrik, avek *Housing*, nou pa pe fer bann lakaz *semi-detached* lo La Digue parey nou'n fer dan lefase. Nou'n koze pou nou fer bann apartman parey en pti pe parey nou pe fer Mahe, selman pa sitan o, akoz lo La Digue i annan serten imitasyon.

So, nou annan nou bann *standard designs* ki nou pe servi ki nou konn son pri, son kou lo Mahe. Nou annan nou *margin* ki nou mete ki nou konnen La Digue konstriksyon i en pti pe pli ser, selman i pa

pou apropriye pou mwan donn en sonm egzakt.

Akoz i pou en proze ki pou al lo *tender*, mon pa le etabli en *benchmark* la dan Lasanble. Nou ti a prefere ler nou *tender*, nou pou konnen egzaktman konbyen i pou arive. Selman nou annan nou *internal estimate* ki nou servi *for budgeting purposes*.

Epi lo kote lenplimantasyon proze, lo kote bann proze lakaz *actually* i, sa i enn bann Minister ki nou war poudir lo kote legzekisyon depi lannen pase, *it's not been too bad*. I annan –

Espesyalman ler nou pe koz bann *housing estate*, i annan serten proze, enn de proze spesifik ki'n en pti pe an retar. Sa lannen nou pe war poudir laplipar proze pe ganny enplimante *within* nou *expected time frame*. Nou annan serten proze ki nou sipoze pe demare sa lannen. Tou i *on track* dapre finansman ki nou annan sa lannen. Nou pe ekspekte en *high rate of execution* lo bann proze lakaz.

Definitivman baze lo Bidze ki finalman i ganny aprouve, ki finalman i ganny prezante epi aprouve, i pou tou depan kote plis larzan pe ganny mete lo kote bann proze kapital. Enn bann rezon aköz SIA ti ganny kree is ti pou nou

kapab bouz resours kot nou war poudir i annan plis lenvestisman ki bezwen ganny fer.

E *accordingly* baze lo lakantite larzan i ganny bidzete pou proze kapital, nou, nou annan nou louvraz pou nou kapab ogmant nou kapasite lo kote resours imen pou nou kapab sey nou mye pou nou delivre lo sa ki pe ganny bidzete dan Bidze. Mersi.

MR SPEAKER

Thank you. Nou a bouz lo prosen kestyon. Onorab...Onorab Pillay, mon annan en kantite kestyon silvouple, si ou annan en pti klarifikasyon pou demande, me pa nouvo kestyon.

HON SEBASTIEN PILLAY

Non, Mr Speaker, mon napa nouvo kestyon. Mon pe zis *press* Minis pou aksyon. Mon pe *regard budget allocation* dan *budget book* la. Mon war li en pe drol ki devan *panel* pe dir ek nou koumsa poudir zot napa en *costing*. Aköz zot bezwen met en sif dan Bidze pou nou *quantify capital expenditure*.

E ek serten *statement* pe ganny fer. Serten *commitment* pe ganny fer avek zabitan La Digue ki nou ti a kontan war i

ganny materyalize. So Gouvernman i bezwen annan en sif konbyen zot in met a kote pou sa proze.

Se sa ki nou pe rode, oli sa sif ki zot in met a kote. Akoz Mr Speaker, pou ou lenformasyon i annan en sirkiler ki Minister Finans in sirkile vizavi larzan ki pa pe ganny depanse. Vizavi larzan ki pa pe ganny servi. E si sa sirkiler pou afekte bann proze lenfrastruktir, sa osi nou bezwen konnen?

Mersi Mr Speaker.

MR SPEAKER

Panel, zot annan en sif pou donn Onorab?

MINISTER BILLY RANGASAMY

Mr Speaker, mon krwar Mr CEO in eksplike, vi ki sa proze pe al lo *tender*, i en pe, i pa profesyonnel pou nou donn sa sif la dan Lasanble, akoz i kapab *prejudice* sa pri ki nou gannyan finalman.

So, se sa rezon ki nou pou a pey, e sa lenformasyon si Onorab i bezwen nou kapab partaz ek li, lendikasyon pri i annan, estimasyon in ganny fer, en proze ki serye.

E parey mon'n dir, nou program pou nou fer nou bann konstruksyon lakaz, i entans. E Minister li lo son

kote - e malgre ki SIA i tonm anba mwan, me mon met bokou lanfaz pou swivre progre proze. E PS Lakaz osi a kote mwan, nou pe fer sir ki tou nou bann proze ki'n ganny planifye i *follow* dapre program egzekisyon.

Mersi Mr Speaker.

MR SPEAKER

Mersi. Onorab Pillay, mon bezwen *move on*. Yes?

HON SEBASTIEN PILLAY

Mr Speaker, i pa ki Minis in refize donn mon en larepons, i ki Minis in donn mon en larepons. Mon annan devan mwan la *Seychelles Infrastructure Agency Financing* pour 23/25, par egzanp; ler nou koz *Ex Zelia land bank* i annan en *local financing* ki'n met 4.9milyon.

So, ki mannyer Minis i kapab dir mwan ki i annan *in-house estimate*, ki la konmsi i vin en nespes sekre Leta ki zot pa kapab donn nou?

Sa ki mon pe rode, mon pe rod sa larzan ki zot in sipoze aporsyonnen dan Bidze, akoz zot *estimate then i work within* sa larzan ki Bidze i donnen.

Mon a donn ou en lot legzanp; *Carana Land Bank Extension Phase 1*, 3.8million,

lot Disaster Project following, 5.679million ti Revised Budget 2022. I dan Bidze, i bann dokiman ki Minis i bezwen kapab reponn Mr Speaker. Mersi.

MR SPEAKER

Mersi, Onorab, Minis in fini donn nou en larepons, nou a bouz lo lot kestyon. Onorab Sandy Arissol, ou kestyon?

HON SANDY ARISSOL

Mersi Mr Speaker, bonzour Minis avek ou lekip, tou zabitan Bel Ombre ki pe ekoute. Mr Speaker mon kestyon i lir;

Eski Minis i kapab eksplik Lasanble ki zistans konsiltasyon, planifikasyon e realizasyon Semen *Carpin* dan distrik Bel Ombre in arive? Mersi Mr Speaker.

MR SPEAKER

Mersi. Minis. Semen *Carpin* silvouple?

MINISTER BILLY RANGASAMY

Mersi Mr Speaker. Semen *Carpin*. Semen *Carpin* i tonm dan kad proze kominoter, en proze semen dan kominote ki benefisye plis ki 5 lakaz. Sa i en pe partou dan diferan

distrik e Semen *Carpin* i enn sa bann semen.

I fer plizyer lannen ki diskisyon travay pe ganny fer anver sa proze. Parey ou konnen Onorab, menm depi ler ou'n pran sa pozisyon koman Onorab pou distrik Bel Ombre, mon a pe pouse pou sa semen.

Progre in tre limite an vi konstrent *wayleave* e mank kordinasyon e korporasyon par diferan propriyeter. En size ki mon'n koz lo la ase agresivman pandan ler mon'n ganny loportinite dan bann *meeting* dan bann distrik, se sa korporasyon ki'n manke, e kolaborasyon.

Tar lannen pase - pou reponn ou kestyon Onorab - Minister ti fer en resers e analiz detay lo sa dosye, e nou'n vwar ki ti annan bokou resours ki ti'n ganny mete dan diferan letap, mon panse depase 15an pase pe seye menm, me malerezman in ankor annan bokou konplikasyon.

Ou menm Onorab ou a pe pouse pou sa semen. Bann akter prensipal tel ki Minister Later ek Lakaz, Lazans Lenfrastriktir, Minister Gouvernman Lokal, menm Manm Onorab, e bann zabitan - mon repete bann zabitan i

bezwen inifye, nou bezwen inifye avek menm lobzektif afen ki nou a kapab progres sa proze semen en fwa pou tou.

Sa pa'n touzour leka sirtou avek serten propriyeter parey mon'n mansyonnen, me mon annan lespwar ki nou pou kapab fer li. Nou annan en solisyon akseptab ki pou byennet sa kominote.

I pou sa rezon ki mon Minister koman en fasiliter I sanz lapros e stratezi. Boner dezyenm kar lannen dan sa dernyen detrwa mwan, bann antite Gouvernman dan sa mayon in tonm dakor lo en plandaksyon. Parske nou anvi fer sa keksoz avek lozik. I annan en plan, i annan en dele letan akseptab pou sak letap. E pou nou kapab ariv lo en staz avanse e deklans sa proze.

Koman Government, setadir sa bann antite ki mon'n mansyonnen, Minister *Local Government* Kominoter, SIA e Minister Later ek Lakaz, nou pou bezwen pas dan sa bann letap swivan ki enkli en peryod konsiltasyon, planifikasyon e finalman egzekisyon.

Premye letap, nou pe determin meyer alinyman semen ki deservi sa kominote dan en fason pli efikas. Nou pa pe zis pran sa ki nou annan ki

ti la pou tou sa letan. Nou pe get sa alinyman dan en fason pli efikas, enkli nenport alternativ, si posibil an Praslin. Labitid i annan detrwa propozisyon, detrwa plan, ou kapab dir, serten plan pa marse.

Nou pe rekonsilye bann *wayleave* ki nou'n deza ganny permisyon, e ki bann zabitan in tonm dakor lo la. E letan nou'n evalye tou sa bann konponan, nou pou kapab - ki mon fek mansyonnen - nou anvizaze ki sa premye letap pou ganny konplete pli tar lafen Zilyet 2023. Savedir mwan prosen.

Dezyenm letap, nou pe angaz kominote pou regle tou bann dezakor pandan mwan Out e Septanm. Sa dan sa 2 mwan ki nou pe donner, pou nou kapab regle tou sa bann eleman kot bann propriyeter pa'n tonm dakor. Asiz ek zot, negosye ek zot, anmenn zot ansanm avek nou, pou nou vwar benefis sa proze pou zot osi.

E trwazyenm letap se sa staz desizyon. Sa i pou en letap enportan ki avan ki plis resours- I pe pran bokou resours pou le moman pou nou kapab fer sa travay. Onorab, avan ki plis resours i ganny mete dan sa proze, kominote e Gouvernman pou bezwen pran en desizyon enformen lo bann

lenformasyon, ki sak faz in prezant devan nou. La nou a kapab bouz devan apre.

Katriyenm letap, travay detay, *design* detaye. Nou pe target pou nou *tackle* sa dan bann mwan Novanm 2023 ziska premye kar 2024. Sa ki pou enkli travay detaye par seksyon *survey*, nou bann lekip *survey* pou bezwen al lo santye, re analiz tou bann detay final.

Semen ganny *design by* lekip lenfrastriktir. E dernyen lesey negosyasyon, si nesaser, mon espere pou napa sa problemm ler nou'n ariv sa letan apropiye. Me si i annan, nou pou bezwen fer bann dernyen lesey negosyasyon lo en baz endividyel, avek sak propriyeter ki pa ankor agree pou donn *wayleave*.

Finalman, lenplimantasyon proze, nou anvi ki sa i materyalize, be fodre fer resorti ki korperasyon e kolaborasyon bann zabitan e kominote i tre enportan. Bann propriyeter, nou bezwen korpore, si non nou pou rankontre retar baze lo programm travay ki nou'n met devan.

Parey Prezidan in fer resorti an plizyer *meeting* distrik, bon kolaborasyon i tre enportan pou byennet nou kominote. Nou kont lo zot tou,

e osi tou bann dimoun ki pe servi sa semen dan fitir, fodre ki nou respe sa kominote.

E silvouple, enn bann defi, enn bann *challenge* ki met retar se lenkyetid serten zabitan ki letan semen in ganny fer pas kot zot, dimoun i pase dan zot gro transpor, *blast* zot gro lanmizik e *disturb*, e sa souvandfwa i kree sa lenkyetid.

Alors, nou pe priye ki tousala i a ganny regularize dan en fason organize, e nou a kapab vwar en laklerte pou nou enplimant sa proze lannen prosenn, dapre nou resours bidzeter ki permet nou fer sa proze en fwa pou tou, vin en realite. Mersi Mr Speaker.

MR SPEAKER

Mersi Minis. Siplemanter Onorab Arissol?

HON SANDY ARISSOL

Mersi Mr Speaker. Mon ti a kontan dir Minis mersi pou ou larepons byen detaye, e mon swete tou bann dimoun ki pe ekoute zot in ganny ou mesaz an relasyon avek korperasyon kot nou kapab realiz sa proze.

Mon anvi zis demann ou en kestyon, Minis, anvi ki tou bann lezot keksoz in ganny reponn dan ou larepons. I annan bann dimoun ki,

annefe sa i en proze ki date plis ki 18an, 20an pase.

Mon ti a kontan demann ou; an vi ki ti annan bann propriyeter ki ti'n deza donn akse zot propriyete, kot menm taso ti'n ganny mete pou demarkasyon sa bout semen, ki zistans in arive an relasyon avek konpansasyon ki zot ti ganny promet zot pou ganny peye? E i annan pa ankor gannyen. Oubyen ki zistans in arive ek sa bann negosyasyon pou peyman. Me larestan lenformasyon i kler Mr Speaker?

Mersi bokou.

MR SPEAKER

Thank you. Minis, konpansasyon?

MINISTER **BILLY RANGASAMY**

Mr Speaker, mersi. Mersi Onorab pou sa kestyon. Pou le moman, parey mon'n fer resorti, la ki nou pe re analiz tou sa bann ki ti'n tonm dakor, nou a kapab repas lo tou sa bann Lagreman ki ti annan, e pli byen plase pou nou adres sa size konpansasyon.

Pou le moman napa okenn konpansasyon parske nou ti pou bezwen get li dan son proze o konplet, inital ou fer en bout apre lot bout i annan en blokaz.

Nou pe get li dan son totalite, epi nou ava dan en pli bon plas - pli bon pozisyon pou nou progres ek laspe konpansasyon kot i neserer.

Be parkont mon priye ki kominote i a konpran poudir sa i en proze ki benefisye zot tou. E zot ava donn sipor, donn sipor Gouvernman, donn sipor pou sa proze vin en realite, e pa fer sa size konpansasyon vin enn ki konplike.

Mersi Mr Speaker.

MR SPEAKER

Mersi Minis. Mon krwar Onorab in ganny tou lenformasyon ki i ti pe rode dan sa kestyon. Mon a pas lo prosen kestyon, Onorab Esparon, ou kestyon numero 60?

HON REGINA ESPARON

Mersi Mr Speaker. Mr Speaker; Eski Minis i kapab don en kont randi Lasanble, lo bann nouvo devlopman son Minister lo Machabee e *Carana land bank?* Mersi.

MR SPEAKER

Mersi. Minis, ou repons?

MINISTER **BILLY RANGASAMY**

Mersi Mr Speaker. Onorab, i en bon kestyon, Machabee i en

proze ki'n ase *challenging*, e an se moman nou'n fini fer tou enstalasyon enfrastruktir mazer lo *land bank* Machabee, Minister in nobou tir e *allocate* 8 kare later an total.

Nou ankor pe *explore* posibilite pou nou tir plis kare parske nou'n investi, nou anvi sey tir plis kare, me ki pou ganny deservi par bann pti *feeder roads*.

An se moman, nou pa kapab pronons nou lekor lo lakantite kare, anvi ki sa teren i ase agresiv. Me parkont, tou dezir i la, nou pe rod tou bann posibilite pou nou sey ed plis dimoun, e ouver ankor en pe kare later.

An sa ki konsern *utilities*, Minister ek *PUC* in resaman agree lo 2 lokasyon pou nou kapab enstal en stasyon laponp en pe o milye letan ou pe monte, epi en tenk delo pli o pou nou kapab deservi sa landrwa dan son totalite.

Alors sa in fini ganny regle lo sa bout later, in fini ganny regle. La nou'n fini pey *PUC*, e mon konpran ki tre byento *PUC* pou al met sa proze amelyorasyon sistenm delo, e pou donn ki kapasite pou deservi sa *land bank*, zot pou al met sa lo *tender*.

An sa ki konsern Carana *land bank*, atraver ou Mr

Speaker, mon oule enform Onorab ki lo dezyenm faz Carana *land bank*, Minister in tir li 7 kare later. Lenfrastruktir semen pou deservi sa bann kare later in fini ganny konstri an 2021.

Parey ou konnen Onorab, i annan en parti sa vye semen *land bank* ki ti pe deservi vilaz o konple ki apik. E pou nou kapab ariv kot sa *land bank*, nou pe rod fason pou nou fer serten analiz teknik, pou vwar ki meyer fason pou sey tir sa lapant ase serye.

Me i pa en keksoz fasil parske i annan lakaz ki'n fini ganny konstri ase pros. Sa en keksoz ki date en pe letan pase. Me nou konsyan i annan sa problemn, e nou pe sey avek *SIA*, sey vwar teknikman.

Mon pa oule donn okenn *commitment* parske i ase konplike parey mon'n dir, me selman tou lentansyon se pou vwar avek bann enzenyer...

Parey mwan menm, mon *background* i en enzenyer mwan osi, mon pe sey met latet ansanm pou nou war si nou kapab regle sa problemn. Mersi Mr Speaker.

MR SPEAKER

Onorab Esparon, ou siplemanter?

HON REGINA ESPARON

Mersi Mr Speaker. Mersi Minis pou ou larepons. Minis, lo kote bann *challenges* ki annan lo sa 2 sit la pou *land bank* la, bokou konplent i vin atraver semen. Parske letan nou pe regard Machabee *land bank*, zot in fer en semen drwat pou mont anler kot Mr Joubert.

E bann kare later napa okenn bann *feeder road*, e i annan dimoun ki'n ganny later ki'n bezwen rann akoz sa problemm semen. Mon pa konnen, mon anvi demann Minis;

Eski i annan en konsiltasyon avek *SLTA*? Mon pa konnen si *SLTA* ki'n fer semen, pou regarde kalite semen ki zot pe ofer sa bann dimoun ki dan sa bann, ki'n ganny sa bann kare later.

Prenon kont sekirite, parske i annan dimoun avek menm *4wheel* pa pe kapab monte, sirtou lo sa semen Machabee.

E lo semen Carana osi, dan komansman sa semen i annan en *challenge* la kot i danzere pou dimoun e bann dimoun ki annan later en pe pli o, pa kapab fer konstriksyon, i annan dimoun ki pe menm vann sa bann later pou rezon ki sa semen pa pe ariv laba.

E lo kote Carana *land bank* laba, i annan zis en semen drwat napa *feeder road*?

Mon lot kestyon Minis;

Eski dan Polisi Minister, letan zot pe *allocate* en later *land bank*, eski i zot devwar pou fer sa *feeder road* pou ou al kot sa kare, oubyen zot fer zis sa *main* semen, apre sa dimoun ki ganny sa kare later li ki antreprann son semen? Eksplik nou en pti pe ki mannyer i marse?

Parski, Minis, letan mon'n al vizit sa bann *land bank* Ros Lanmes, mon'n vwar poudir an se moman la zot pe fer *feeder road* pou akse sa bann kare later, mon pa konnen si sa ki laba si ti fer depi parey ou dir, 2021, si ti anba lot Gouvernman, mon pa pe blanmen, me selman mon anvi zis konnen ki kalite Polisi ki nou pe met an plas? Mersi.

MR SPEAKER

Mersi, Onorab. Minis, ou a endik ou *panel* silvouple?

MINISTER BILLY RANGASAMY

Wi, Mr Speaker, avek ou permisyon mon pou tap laport *CEO SIA* i a kapab donn nou en pti pe leksplikasyon pou eksplike.

MR SPEAKER

Tre byen, CEO ou annan laparol.

CEO JITESH SHAH

Mersi Mr Speaker. Mersi Onorab. Onorab lo kote *land bank* li menm si nou pou koz lo Machabee, lo kote son *steepness*, sa bout parey ou pe dir sa dezyenm bout semen ki kontinyen i ale ziska anler kot Mr Joubert, sa annefe pa ti'n sipoze ganny fer koman en *land bank road*.

Kontrer menm *Planning Authority* pa ti le aprouv sa dezyenm bout semen, i ti ganny fer zis koman en *emergency access* pou li ariv la anler. Nou ti bezwen nou menm nou *appeal* avek *Planning* pou nou kapab fer li koman en *emergency access*. I pa ti sipoze koman en *land bank*, *land bank* ti sipoze sa bout pli anba.

And then parey ou pe dir, ti annan serten *feeder road*, selman ler nou fer sa analiz teknik, sa kantite kare later ki pe ganny deservi par sa *feeder road*, son kou sa *feeder road* i pa fer sans pou nou al fer en semen R3milyon ki pou kekfwa deservi zis 2 kare later, so, nou bezwen balans en pti pe lo kote...

Obviously i pa zis desizyon *SIA*, nou diskite avek

Minister pou nou gete, eski sa proze pou rantab lo kote konbyen kare nou pe gannyen avek son kou, si nou bezwen met miray, bann zafer koumsa.

Nou annan - lo kote konstriksyon li menm, nou annan serten paramet, *unfortunately* bann teren *nowadays* ki reste nou kot nou pe fer bann proze *land bank*, zot en pti pe difisil, nou nepli annan bokou landrwa ki vreman byen plat, oubyen *accessible*.

Nou pe sey nou mye dan sa prosen 2an, 3an pou nou sey idantifye bann ki-

Menm si i pa neserman bann landrwa ki plat, nou war poudir nou kapab kekfwa ganny en bon pe kare later, ki pou vo sa lenfrastruktir ki nou pe mete.

So, nou pe travay vreman pros avek Departman *Survey* pou nou kapab idantifye bann landrwa ki pou vreman rantab pou Gouvernman.

Lo kote bann *feeder road*, eski sa bann dimoun ki sipoze fer zot *feeder road* zot menm, oubyen sa i ganny fer anba proze? I tou depan. Mon pou - si Mr Hoareau i permet mwan, mon ava zis reponn en pti bout lo lapar *lands as well* baze lo bann diskisyon ki nou gannyen avek zot.

I annan serten landrwa ki nou pa pe kapab. Par

egzanp Machabee *is a perfect example*, nou pa pe kapab. Nou pa pe war sans pou nou fer sa *feeder road* pou sa bann kare later.

So enn bann opsyon ki nou pe sey diskite avek serten aplikan ki ti'n kalifye pou Machabee *land banks*, selman baze lo kantite kare later ki'n annan i mwens. Eski zot pare pou zot finans sa semen zot menm *and* zot a kapab ganny sa bann kare later, si zot ti'n deza kalifye tou fason. So sa i bann...

Selman i pou tou depan lo finansman ki Gouvernman i annan pou sa *land bank*. Nou sey nou mye pou nou ouver *as many*, la *maximum* kare later ki nou kapab avek sa finansman ki annan.

And i annan serten *feeder road* ki swa i vin koman en dezyenm faz ki pou vin dan en Bidze son lannen apre, oubyen son lannen answit, oubyen si nou kapab rod bann lezot mekanizm kot dimoun i pare pou zot kontribye en pe ladan *as well*.

I pa forse definitivman, non, i pa pou en Polisi Gouvernman pou li forse, me selman si en dimoun i pare, *then* i ed pou nou debous sa pli vit, *yeah*.

MR SPEAKER

Mersi.

HON REGINA ESPARON

Mr speaker. I pa'n reponn lo kote Carana ki pou arive, sa kalite semen ki'n deza ganny konstri?

MR SPEAKER

Ok, silvouple, *CEO* menm ki pou reponn, Carana?

CEO JITESH SHAH

Ok, yeah, mersi Onorab. Sa premye bout Carana i en pe letan. Pou dir ou laverite nou pou bezwen fer en bon analiz lo la. En analiz teknik, nou a gete ki bann posibilite pou nou kapab amelyor sa sityasyon.

MR SPEAKER

Thank you. Onorab Pillay?

HON SEBASTIEN PILLAY

Mersi Mr Speaker. Mr Speaker, mon le retourn lo sa size Carana. Lo sa size Carana, ler mon pe regarde nou ti'n depans apepre 3.8milyon pou fer son *extension phase*, e apre nou ti'n met en provizyon bidzeter *around* R48mil dan Bidze 2022.

Kestyon se; Prenon kont bann *statement* ki zot pe fer dan Lasanble, mon pa pe war okenn alokasyon bidzeter pou konplet sa semen, e zot in fini sipoze tir sa bann *plot*.

So, egzaktaman dir nou ki pou arive, eski se zot ki pou fer sa semen, oubyen se en lot

antite, oubyen ki mannyer zot pou finans sa semen ki zot pe koz lo, e kan eski sa *land bank* pou pare pou ganny donnen avek bann aplikan?

E lo kote Machabee, ou'n koz lo valer sa semen, lo *value* pou fer sa semen ki zot, zot sa. Mon ti a kontan konnen, bokou dimoun in fer semen pou ariv kot zot lakour apre ki Gouvernman in donn zot en kare later *land bank*, i vwar ki ler Gouvernman li i fer son *estimate*, i tonm dan 1.3, 1.4milyon or 2milyon, me ler sa dimoun i fer, i realize poudir i bokou pli mwens.

So, ki mannyer zot *come to* sa *estimate* ki ganny *provided* avek zot? Eski zot fer en travay aprofondi, oubyen zot zis fer bann *expressions of interest*?

Mon krwar i annan en keksoz ki pa pe aziste lo *cost*. E sa ki i per fer, Mr Speaker, enn son bann *direct consequence* se ki i pe fer monte prezan, pri, pou tou sa bann kalite lenfrastruktir partou akoz Gouvernman ki pe depans plis larzan, i pe gard sa pri ase o ler i pe peye. Mersi Mr Speaker.

MR SPEAKER

Thank you. Panel, lekel ki pou adrese?

MINISTER BILLY RANGASAMY

Mr Speaker, *CEO SIA* i pli byen kapab teknikman pou adres sa, wi.

CEO JITESH SHAH

Ok. Mersi Mr Speaker. Mersi Onorab. Onorab pou ou premye parti kestyon, lo kote Carana, sa bann provizyon ki ou pe war lo kote Bidze i bann faz ki ti'n fini fer, so, pou le moman, en pti pe parey Minis in dir dan son larepons, i annan potansyelman posibilite pou kontiny sa, selman sa pa ankor ganny evalye lo en baz teknik.

Nou war poudir i en landrwa en pti pe difisil, i annan serten louvraz ki *survey* i bezwen fer avan nou kapab fer en *design* lo la, so, pour lo kote Carana bann faz ki ti'n deza ganny planifye, ki ti'n deza ganny *designed*, in fini enplimante. Definitivman i annan sa bout parey Onorab pe dir pou en amelyorasyon lo komansman kot i en pti pe danzere, sa en keksoz ki nou ava fer en *assessment* lo la.

Pou ou dezyenm parti kestyon lo kote son kou, koman Gouvernman nou en pti pe limite avek nou bann *tender process* ki nou bezwen

pas ladan pou okenn proze ki nou fer.

So, ler nou war poudir nou *estimate* ki nou, nou fer nou travay avek, i bann sif ki baze lo *market rates* ki nou pe gannnen dapre bann *tender* ki nou pe gannnen.

Sa i labaz ki nou bezwen servi, nou fer en kantite *tender*, diferan landrwa, diferan teren, so, baze lo sa nou servi bann pri, bann kou apropriye, bann *rate* apropriye pou bann diferan kalite konstriksyon.

Kekfwa akoz en dimoun i *end up* pe kapab fer sa pli bonmarse ki konpare avek nou *estimate*, nou war en kantite fwa poudir nou koman sa Lazans Lenfrastruktir lo kote nou bann *design*, lo kote bann paramet, nou bezwen respekte bann prensip lo kote, si nou pe al koup en lateras nou bezwen fer miray.

Nou pa kapab al koup en lateras 2 met, 2 met edmi oter, kit li parey i ete, si demen later i komans grennen, sa dimoun ki son later i *abut* avek sa semen, pou vin kot Gouvernman pou dir; be la mon later pe ale tousala.

So, i annan serten keksoz, mon pa pe dir sa i sel rezon, i annan serten paramet ki nou, nou pa kapab *go*

outside of. I annan serten paramet menm avek *Planning Authority* avek Departman Transpor lo *steepness of* sa semen *and all of that* ki-

Mwan, mon kapab reponn lo kote SIA, ki mannyer nou, nou fer nou louvraz, ki mannyer nou pou bezwen pas nou bann diferan prosedir pou fer aprouve, *and then* nou bezwen konstri sa semen dapre plan ki'n aprouve.

Kekfwa i annan dimoun ki kapab fer li dan serten lezot fason, kot zot fer li bout par bout. Nou, nou bezwen fer li dan en fason ki nou *tender* en proze nou fer li enn fwa pou tou, en dimoun *maybe* i kapab fer en pti bout, i tras sa semen, apre 3 mwan i vini i met son beton, nou napa sa fleksibilite.

Epi nou osi, nou napa bokou fleksibilite lo kote negosyasyon avek kontrakter tou, *right now*. Dapre Lalwa, sa *framework* ki nou annan pou nou travay ladan, nou pa kapab tro negosye avek kontrakter. Nou fer en *public tender*, bann kou ki nou gannnen, i bann kou ki nou bezwen servi.

MR SPEAKER

Onorab Pillay, permet mwan termin lo sa kestyon. Mon pas kestyon Onorab Henrie.

HON GERVAIS HENRIE

Mersi Mr Speaker. Bonzour tou dimoun. Mon kestyon i baze lo en kestyon ki Onorab Esparon in demande, lo size ler zot fer *land bank*, Minister i fer *land bank*, si zot fer zis *the main road* ouswa *feeder road*?

Akoz en leksplikasyon ki mon'n deza gannyen avek enn bann zofisye dan Minister, se ki sa bann later *land bank* i vann lo *subsidised price*, e ki zot ekspekte avek zot bann kliyan, parski zot in fer en *saving*, zot pa'n pey son *real price*, zot kolabore antre zot, sakenn i fer en bout pou anmenn semen lo zot later.

Prezan mon anvi konnen, ki kantite zot eksplik bann kliyan sa pwen, ki aprezan i pa vin en problem? Parey dan distrik Mont Buxton mon annan later lontan in vann, pa pe devlope aköz napa semen.

E ou ganny bann dimoun ki zot pa'n okouran, ouswa zot pa konpran poudir se sa lentansyon, eski sa pe ganny kominike avek bann kliyan?

Mersi.

MR SPEAKER

Mersi Onorab. *Panel*, mon bezwen demann zot pou rann

en repons bref lo la, aköz mon pe *run out of time*.

MINISTER BILLY RANGASAMY

Ok, Onorab. Mr Speaker, mersi pou donn mon sans fer en pti konsiltasyon ek mon group. I kler ki sa size i annan...I napa en larepons *x or, yes or no*.

Malerezman - mon'n erit en kantite sa problem lèpase, e kot nou kabab, kot Bidze i permet, nou sey pe fer sa bann *feeder road*, but *the main trunk road is what we should provide*, sa *main trunk road*, parske i enportan pou konpran en keksoz en?

Lenvestisman ki Gouvernman i fer dan sa bann proze pou ouver sa bann kare later i kout enormeman, pou met semen, rigol, elektrisite, delo.

E finalman sa bann kare later, dizon en legzanp, i varye partou kote, en morso kare later 800 met kare, son *market value* i kapab fasilman R1milyon. E Gouvernman ti pe vann sa apepre 150, 200, 150, R100mil.

So, i heavily subsidised.

E lapros laveni, lapros laveni se pou fer sir nou kapab omwen kouver kou lenfrastruktir pou nou kapab ed lezot ki pe espere. Nou

annan apepre 2mil845 dimoun pe esper en morso later.

E si toultan nou pou fer en proze depans R10milyon, pou dir en legzanp, 20 kare later savedir i kout apepre R500mil, nou, nou ale nou vann li R100mil, nou pe zis foy en trou, nou pe anfonse, i pa soutenab.

So, nou bann proze lavenir Onorab, nou pe devlop sa dan en fason ki soutenab, e ek lagras pandan sa letan COVID nou'n analiz bokou sa bann teren.

Ler nou ti annan en pe restriksyon bidzeter pou nou konpran byen sa bann teren. E devlop bann ki ankor kapab ganny devlope dan en fason ki efikas e soutenab.

So, alors ki mon pe sey dir, *the commitment is make sure* i annan en *feeder...* En *main trunk road*. Apre anvi ki sa dimoun pe benefisye avek en kare later a en pri *heavily subsidised*, zot kapab fer zot *feeder road* zot menm.

That would be the strategy moving forward pou nou kapab maksimiz lakantite dimoun ki nou kapab ede. Parske ou annan 2mil800 ki ankor pe espere, 2mil847. So i enportan pou nou servi larzan ki nou gannyen dan en fason responsab.

Mersi Mr Speaker.

MR SPEAKER

Mersi Minis. Nou ava avans lo prosen kestyon, e sa se numero 61 dan non Onorab Churchill Gill.

HON CHURCHILL GILL

Mersi Mr Speaker. Kestyon i lir koumsa;

Eski Minis i kapab enform sa Lasanble pou benefis zabitan Baie Ste Anne, ki zistans travay in arive lo bann proze *land bank* swivan dan sa distrik, enkli pour lenfrastruktir elektrisite ki travay sivil ti sipoze fer:

- i. Proze *land bank* Salazi kot distrik pou benefisye avek 8 *plot*?
- ii. Ekstansyon *land bank* Fond Azor. Mersi.

MR SPEAKER

Mersi Onorab. Minis ou repons?

MINISTER

BILLY

RANGASAMY

Mersi Mr Speaker. Mr Speaker, mon le profit sa lokazyon pou enform Onorab ki mon ti partaz en pti pe lenformasyon lo proze Sanmdi pase, me ou pa ti la Onorab.

(APPLAUSE)

MINISTER **BILLY**
RANGASAMY

Mon ti sagren ou pa ti la, akòz konmsi sa ti lentansyon pou nou kapab...Annefe mon ti anvi al vizit detrwà santye avek ou tou, me ou pa ti...mon pa ti vwar ou.

(laughter)

MINISTER **BILLY**
RANGASAMY

Wi, mon konnen *next time* nou pou kapab...Me, *anyway*. Pou *land bank* Salazi...

MR SPEAKER

Ale Minis, annou prosede.

MINISTER **BILLY**
RANGASAMY

Laba pe fer tapaz, *Ok*. Onorab, proze i lo *tender*, proze i lo *tender* pour Salazi, e nou'n ganny en pti pe difikilte kot in konsern sa bann *tender process* lo Praslin. Fransman verite en?

Me byento nou ekspekte ki sa proses *tender* i a kapab konplet. E nou a kapab avan lafen lannen, *ok* - avan lafen lannen si napa lezot konplikasyon, nou a kapab demar sa proze.

Aprè ki proze lenfrastruktir ki pou'n fini? Nou a kapab fini tou, bon

nouvel *from CEO*, me sa ki enportan pou nou *manage* en pti pe lekspektasyon nou bann dimoun. So, letan semen i fini, lenfrastruktir in fini ganny enstale, seksyon *survey* pou bezwen arpant sa bann kare later.

Sa teren i ase difisil Salazi, mon'n al vizite mon osi mon'n vwar. So pou nou ler semen in konplete, nou a kapab tir semen epi arpant sa bann kare later, ki dapre plan kot nou ti'n planifye. nou ava analiz sa.

Nou ava aziste li an konsekans kot semen in ganny konstri. E bann lenfrastruktir eksetera. Nou a kapab swivi par fer evalyasyon kou sak kare later, prenon kont kou lenfrastruktir ki nou'n investir.

Aprè sa nou a fer tranzaksyon lof avek nou bann aplikan dapre merit. Mon prevwar boner lannen prosenn. Sa en pti pe zeneral lo Salazi.

Lo kot i konsern *Fond Azor*, mon aprann laba osi, zot dir mwan dan le pase ti apel Frazor, me selman in ganny son non *Fond Azor* osi. Travay proze lenfrastruktir semen ek lenfrastruktir elektrisite i lo bann letap *tender, ok*.

Mr Speaker, kot i konsern proze *land bank Fond Azor*, Lazans Lenfrastriktir SIA i dan prosedir konplet proses *tender*, lo sa bann travay ki konsern *upgrade* sa rezo elektrisite ki deservi sa premye faz *land bank*.

E osi pou deservi lot faz *land bank*, sa i premye faz proze. Malerezman, i fer dezyenm fwa ki SIA, parey mon ti'n mansyonnen oparavan lo Salazi, ki SIA pe *tender* sa proze, apre ki premye *tender* ki ti fer an Mars, 2023 pa ti en sikse.

Dan 6 kontrakter ki ti *tender* dan pou sa proze, zis 1 ki ti kalifye teknikman, e son pri ti bokou pli o ki *market rates*. Alors, an vi ki nou bezwen pwennvi koman en Gouvernman responsab, nou'n bezwen relans sa proze lo *tender* ankor.

Dezyenm faz sa proze, pou permet Gouvernman tir ankor 8 kare later avek kontinyasyon sa semen *land bank*. So, sa bout i annan 2 konponan. Sa bout elektrisite ki nou pe *upgrade*, epi lot proze pou nou kontiny semen e ouver ankor anviron 8 kare *land bank*, avek en kontinyasyon sa semen *land bank*.

Mr Speaker, Onorab, parey ou okouran, semen Kan Per ki deservi sa *land bank* i enn ki par plas, i vremen etrwat. Alors dan en lespri byen organize, nou le fer sir ki nou pa pou kapab pe lans tou lede proze an menm tan.

Sansan pou vin en nespes *chaos* dan semen Kan Per. Nou pou annwiw bann zabitan, e i pou fer zot lavi konplike.

Alors an konsekans, nou pou egzekit sa proze an 2 faz. Premye faz, nou pou *focus* lo sa konponan elektrisite, en fason sa bann premye faz *land bank* i a ganny zot kapasite elektrisite, delo enn fwa pou tou.

Nou pou bezwen fer serten travay dan semen, kas semen, pas tiyo delo, pas sistenm kab elektrik, e osi fer sa ekstansyon proze semen pli tar *once* nou'n konplet sa proze.

Parske si nou le fer tou lede ansanm parey mon'n dir, i pou annan bokou konplikasyon. E tou lede konstriksyon, konminyon pe monte desann, semen in ouver, pou en katastrof.

Alors, premye faz i a konplete, e nou a kapab antre lo dezyenm faz pou nou kontiny semen.

SIA in reviz program travay *comme suivant*, si napa ankor lezot konplikasyon; nou anvi demar premye faz proze savedir lenfrastruktir delo, elektrisite, tre byento.

E sa pou en dirasyon 3 mwan an mwayenn. E deswit apre nou pou demar proze ekstansyon *Fond Azor* avan lannen fini.

Sa i nou plandaksyon Mr Speaker, e mon swete nou a ganny sipor Onorab e Lotorite Distrik osi pou *manage* en pti pe sityasyon avek bann zabitan ki pe reste la dan sa rezyon Kan Per, parske i pou ase *challenging* par moman, me tou travay nou anvi ki i ganny fer dan en fason organize e byen planifye. Mersi bokou Mr Speaker.

MR SPEAKER

Mersi. Wi, Onorab Gill, ou siplemanter?

HON CHURCHILL GILL

Mersi Mr Speaker. Mersi Minis pou ou larepons. Natirelman mon ti ekspekte ou koz lo la, akoz ou ti'n fini ganny mon kestyon pou eksplik dimoun Baie Ste Anne.

Mon siplemanter i; lo kote Salazi, i annan R1.1milyon ki dan Bidze, eski...*SIA* in dir ki i annan

tender ki'n fini fer, eski sa *tender* i pou semen avek lenfrastruktir pou elektrisite, delo, dan sa 1milyon, enkli *survey*? Sa mon premye kestyon.

Mon dezyenm kestyon pour *Fond Azor*, ou'n dir ki semen i etrwat, me selman semen nou'n fer, trwa kar semen in fini larzi. I reste en bout ki korek. E sa ou dir sa travay elektrisite pou en travay 3 mwan, eski sa kapasite elektrisite ki pou mont anler laba, i sa *voltage* ki bezwen, ki ler ou'n fini fer tou lede faz? Oubyen nou pe fer en travay apre ler lot faz i vini nou bezwen re al fer sa travay? Sa dezyenm.

E mon dernyen. Pou sa ekstansyon dezyenm faz kot semen in arive, i annan en provizyon R2.3milyon, eski sa i pou konplet sa semen, enkli konplet ekstansyon sa bann *plot* osi ki enn fwa pou tou ler sa i fini, *then* sa proze antye i konplete? Mersi.

MR SPEAKER

Mersi, Onorab. Minis?

MINISTER BILLY RANGASAMY

Yes, Mr Speaker, si ou permet mon, mon a demann *CEO SIA*, vi ki bann kestyon teknik, pou

li kapab reponn, eklersi Onorab.

MR SPEAKER

Tre byen, *CEO*, ou a pran laparol.

CEO JITESH SHAH

Mersi Mr Speaker. Mersi Onorab. Onorab pou ou premye kestyon lo sa larzan ki la pour Salazi, sa larzan ki la pour Salazi i pou nou fer sa semen li menm avek son drenaz.

Survey akoz i fer *internal* kot *MLH* pou napa en kou ki vin avek, epi son, lo kote son elekrisite ek delo, sa nou'n fini ganny en konversasyon ek *PUC* lo ki mannyer nou pou kapab *structure* bann peyman pou *utilities* pli tar.

Lo kote sa elekrisite ki pe ganny enstale dan premye faz sa proze *Fond Azor*, li i pou antye sa *land bank* enkli sa extension ki pou ganny fer apre. Akoz sa nou ti'n fini fer, nou ti'n fini met sa lo plan ki nou ti anvoy kot *PUC*.

So zot in design zot lenfrastruktir baze lo the future needs as well, pa zis pou sa ki deza la ozordi.

E finalman sa larzan ki la pour *Fond Azor*, i pa tou larzan ki nou pou bezwen pou antye. I larzan ki nou bezwen pou sa

lenfrastruktir elektrik. Epi en bout larzan ki nou pou bezwen pou nou komans sa proze semen. Larestan i a vin lannen prosenn, akoz sa proze pou kontinyen lannen prosenn. Wi.

MR SPEAKER

Mersi *CEO*. Nou a pas lo prosen kestyon ki dan non Onorab Egbert Aglae, e wi, *panel* i reste parey. Mersi, nou a kontinyen. Mon krwar i annan en pti sanzman konpare ek lalis ki zot, zot annan. Nou annan en madanm ki Mrs Sabrina Zoe ki pa pou la, alor *panel* i reste. Onorab Aglae?

HON EGBERT AGLAE

Mersi Mr Speaker. Bonzour Minis e PS, e Mr Hoareau. kestyon ki *comme* swivan: -

Eski Minis ki i kapab dir ek sa Lasanble konbyen kare later *land bank* ki'n ganny *allocate* pandan lannen 2020 a 2023? Konbyen kare later ki tonm dan rezyon Port Glaud? Mersi.

MR SPEAKER

Mersi Onorab. Minis ou repons?

MINISTER **BILLY RANGASAMY**

Mersi Mr Speaker. Mr Speaker pandan lannen 2020-2023,

Minister in *allocate* 265 kare later rezidansyel atraver pei. In annan 6 kare later ki'n tonm dan rezyon Port Glaud. Sepandan baze lo travay ki nou'n fer avek ou menm ou Onorab lo teren, nou'n analiz sa sit Port Launay ki nou'n agree avek ou, e nou'n konstate ki i annan potansyel dan ou distrik.

An se moman travay i byen progrese, nou'n menm prepar en *desktop assessment* en *design* dapre bann lenformasyon ki nou annan. Nou pour ganny en- pour nou kapab ganny en estimasyon kou proze. Nou an konversasyon avek bann lotorite konsernen tel ki *Planning*, e byento nou pour fer vizit lo santye avek tou bann departman konsernen. Ou ava ganny envite ou osi Onorab, pour nou pran en desizyon byen balanse ansanm.

Si nou ganny laprouvasyon bann lotorite ki mon'n mansyonnen, Minister i anvizaz-e enplimant konponan lenfrastruktir sa proze osi, osi to ki nou posibil, e ki resours i permet, sirtou resours bidzeter. Pa bliye Onorab nou pe fer bokou dan domenn later ek lakaz dan tou distrik enkli Port Glaud.

Mr Speaker stratezi mon Minister, se pour enplimant parey mon'n fer resorti

oparavan bann proze *land bank*, ki nou'n fini ganny laprouvasyon avek en retour maksimonm lo lakantite later ki nou kapab met a dispozisyon nou bann aplikan, a en kou rezonnab.

Nou pe - rezon mon'n fer sa pwen aköz nou vwar en pe bann *challenge* ki nou'n koze *land bank*, semen i apik, lezot konplikasyon ki vin avek. So sa i montre ki'n annan en mankman bon planifikasyon.

So seleksyon teren, parey nou pe dir, sa ki reste nou preski plis lezo prezan. Nou pe sey travay avek sa ki nou annan pour nou kapab fer sir ki nou *design* i konpreansiv in pran tou konsiderasyon, i vo lapenn pou tir sa bann kare later e vann zot a en pri rezonnab avek nou bann aplikan.

So dan - i annan bokou later Port Glaud, parey ou konnen ou menm. Me selman i annan serten teren, ki vreman agresiv. Sa, sa stratezi, ki mon'n koz lo la, i anliny ek enn bann pilye stratezi mon Minister, pour devlop bann proze lo en laspe soutenab; konmsi soutenabilite i en faktor kle ki nou pran konsiderasyon.

E lefe, lefe aköz mon konnen i annan serten distrik napa later, e lefe ki alokasyon later i ganny fer lo en baz Nasyonal, bann aplikan ki

merite sirtou bann vye aplikasyon parfw depase 20an dan tou distrik, pour bezwen ganny sa sipor, e benefisyé avek nou bann proze ki nou fer lo baz Nasyonal.

Nou bezwen depans larzan *taxpayers* lo tou nou bann proze dan en fason responsab. E tou zefor pe ganny fer nou pe met en bon plan travay an plas e byento, nou a kapab parey nou'n fer resorti, repons ou kestyon. Nou annan sa lot program osi pour nou devlope pour distrik Port Glaud. Mersi Mr Speaker.

MR SPEAKER

Mersi. Nou a pran kestyon siplemanter Onorab Aglae.

HON EGBERT AGLAE

Minis mersi pour larepons. Minis anvi ki konmela, tou ou later i tonm lo en baz Nasyonal, eski Minis i kapab, petet konsidere osi ki letan i annan later ki ganny *allocate* dan distrik, *in notice* parey ti ete oparavan. Lotorite Distrik i konnen, poudir i annan, ti annan 6 kare, lala in ganny *allocate* avek tel endividi *in confidence ok*, sa.

En manner ki distrik i konnen lekel sa bann dimoun ki pe ganny *allocate* later dan distrik. Dezyenmman Minis, mon'n tann ou dan *meeting* piblik osi, ki i paret mwan ou ti anvi - ou pe vin debout Port

Glaud. Minis i annan en lenvitasyon ki mon ankor pe espere ki depi Bidze pour ou vin vizit sa bann proze posib pour *land bank*.

Eski ou ti ava fer nou konnen kan ki ou pour vin dan distrik, pour nou vwar sa bann posibilite *land bank*, anvi ki Port Glaud i enn bann distrik ki ankor annan en pe teren ki kapab ganny *allocate*?

E dernyen Mr Speaker permet mwan, Minis anvi ki i annan sanzman dan pri later baze lo zot nouvo Polisi ki zot ti prezante - environ. Eski ou kapab dir nou petet environ baze lo met kare estimasyon konbyen pour koute a lavenir en kare later e ki kondisyon osi ki zot atas avek? Mersi.

MR SPEAKER

Mersi Minis. Ou a donn ou repons silvouple annou sey al vitman.

MINISTER BILLY RANGASAMY

Mr Speaker. Mersi bokou. *Sorry* mon'n pran enn pti letan fer enn pti konsiltasyon. Mon a reponn detrwa keksoz ki mon konfortab pour reponn deswit, epi lo laspe kou mon pour les *PS Barbe* partaz enn pti pwen avek nou.

Kot i konsern enform bann distrik Onorab e lekel ki pe ganny *allocate* dan zot distrik? Sa pa en problem, i

en dan lespri transparans, nou pour fer li parey ou dir selman ou bezwen egzers konfidansyalite osi i enportan.

So sa nou pou fer, nou partaz sa lenformasyon napa nanryen pour kasyet. Mon a donn lenstriksyon Departman Later pour fer sa koman en fason travay, pour nou bouz devan.

Vizit avek ou dan distrik mon demann ou leskiz, parske mon'n asir anba enorm presyon avek bokou bann lezot konplikasyon ki mon pe fer fas avek. E travay ki annan, nou annan pour fer.

Tre byento nou pour fer sa vizit Onorab, mon pour oner mon *commitment* avek ou pour nou-. Mon konnen PS Barbe avek en lekip CEO in deza fer serten travay teknik. Zot ale zot menm lo bann diferan santye. E anvi ki avek ou personnelman ou ti'n demann mwan a detrwa repriz, mon pe fer sa vin en realite tre byento.

Kot i konsern pour nouvo Polisi lo size estimasyon. An gro, an gro tou teren pour annan diferan konplikasyon, me stratezi e Polisi se o *minimum*, esey tir kou lenfrastriktir ki nou'n depanse e partaz sa kou avek tou bann zabitan.

Mazinen letan, nou pe koz zis lenfrastriktir, menm son kou later nou ganny

abzorbe ladan. I annan son konponan son kou later li menm, i ganny abzorbe. Be son lenfrastriktir o *minimum*, nou bezwen sey tir sa kou lenfrastriktir afen ki nou kapab al ed lezot pandan bann lezot proze dan lavenir.

Sa nou stratezi zeneral en. Me selman parey mon dir atraver pei i annan diferan kalite teren, i annan ki pli konplike ki lezot alor mon a les PS Barbe donn enn pti pe ki mannyer nou kapab tonm lo en *average*, en pri mwayenn.

MR SPEAKER

Mersi.

MINISTER

BILLY

RANGASAMY

Mersi Mr Speaker.

MR SPEAKER

Wi PS ou ava azoute.

PS DENIS BARBE

Mersi Mr Speaker. Onorab sa ki Minis pe fer referans avek i enn pti pe baze lo ki formil ki Minister pour adopte. Nou konnen poudir lapros e an menm tan kou pour depan lo seleksyon teren, pour nou kapab asiste meyer kantite dimoun a en kou rezonnab.

So nou pe sey get en *formula* ki nou kapab *at least* annan sa balans. Par egzanzp si nou pour get sa ki nou pe propoze dan lannen prosenn

par egzanp, nou pour pran lanvlop tou proze ki nou pe al enplimante, si nou pour ganny nou 100 kare konbyen nou pe antisipe sa 100 kare pe arive, an term lenfrastriktir; azout son kou *utilities* lo la. *And then work out an average cost per plot, per year.*

E si nou pe fer li i ava ed nou si oule annan en *still* sa konponan en pti sibvansyon ki ava *carry forward*, ki i pa vin en kou sibstansyel.

So sa enn pti pe lo lapros enn pti pe lo *formula* ki nou pe anvizaz-e servi. Me nou pa pour - i pour annan bann pti rafinman ki nou bezwen fer, ler bann *figures* i vin enn pti pe pli, pli kler pour Minister. *Thank you.*

MR SPEAKER

Mersi. Bon nou a sey fer letan pour de kestyon bann Manm. Onorab Gabriel?

HON CONRAD GABRIEL

Mersi Mr Speaker. Bonzour Minis, ek ou delegasyon. An pasan Minis in nonm vi ki premye parti kestyon i zeneral. 265 kare later rezidansyel in ganny donnen an tou, lannen 2020,2023. Eski Minis i kapab dir nou Lasanble konbyen aplikan ki'n ganny asiste ek sa proze *land bank ex-* Melon Pointe La Rue?

E ladan konbyen ki lo lalis aplikasyon Pointe La

Rue? E dezyenmman konbyen sa proze in koute? E eski ou Minister i anvizaz-e kontinyen ek sa proze pour benefisyé plis dimoun dan lefitir? Mersi.

MR SPEAKER

I fer, i fer ou trwa kestyon la.

HON CONRAD GABRIEL

I marye ansanm Mr Speaker.

MR SPEAKER

Ok Minis, wi i vre ki premye bout kestyon i en pe zeneral so si ou annan sif pour Pointe La Rue donn Onorab silvouple pour nou kapab *move on*?

MINISTER

BILLY

RANGASAMY

Mr Speaker mon ava organiz sa *package* lenformasyon pour Onorab Gabriel. Mon a fer gannyen tanto letan nou a zwenn dan distrik mon a donn ou.

(laughter)

MR SPEAKER

Thank you. Tre byen Onorab Mondon.

HON TERENCE MONDON

Mersi Mr Speaker. Minis kote distrik Takamaka i sitye avek proze *land bank*, ki Lotorite Distrik in propoze? E eski sa prosis evalyasyon teren in fini komanse? Mersi Mr Speaker.

MR SPEAKER

Mersi. Minis si ou kapab adres sa?

MINISTER BILLY RANGASAMY

Mr Speaker mersi bokou. An vi ki PS Barbe parey mon dir ek en lekip teknik ti pe ed mwan, fer serten analiz bann teren, mon a demann li avek ou permisyon pou ed mwan eklersi Onorab Mondon lo sa size. Mersi bokou.

MR SPEAKER

Mersi. PS.

PS DENIS BARBE

Mersi Mr Speaker. Onorab pour Takamaka nou ti annan en proze ki ti dan *pipeline* be apre nou bezwen *shelved*, akoz i enn pti pe pli pre, tro pre avek proksimite lekol.

Travay ki nou'n komanse avek Departman Lenfrastriktir pour nou fer en tourdorizon, dan pei an antye enkli Praslin e La Digue, pour nou kapab idantifye bann sit potansyel. Zis parey nou'n fer avek *Housing* kot nou ava annan en lanvlop proze, ki nou kapab dir nou pe *focus* lo la pour sa prosen 5an, 6an.

E anliny nou resours finansman avek, nou'n fer en premye pa lo dezyenm kar sa lannen e nou pe kontiny travay.

Nou pa ankor antre dan distrik Takamaka. I annan serten distrik nou pa ankor fini kouver. Nou'n *focus* enn pti pe nou travay an prenon kont lo bann sit ki nou ti'n deza fer serten travay teknik, pour nou kapab fer sir ki nou lanvlop pour Bidze 2024, 24-25 i kler.

E nou pour kontinyen sa travay lo finisyon dezyenm kar, trwazyenm kar lannen, pour nou kapab kouver tou nou bann distrik. Parey Minis in dir, nou pour annan serten dyalog ki nou bezwen fer lo en baz rezyonnal pour dir zot ki prodwir lakaz ek later ki zot annan. Sa i nou swe, dan en fason ki distrik i konn byen ki program Minister de lavan.

En fason ki ler nou pe vin avek propozisyon Bidze, i pa vin koman en sirpriz pour Lotorite Distrik avek tou bann Onorab. *Thank you.*

MR SPEAKER

Mersi. Bon avek Takamaka nou a kapab terminen lo sa kestyon. Nou a pas lo kestyon 63. Dan non Onorab Sandy Arissol.

HON SANDY ARISSOL

Mersi Mr Speaker. Avan mon komanse mon ti a kontan lo menm laliny dir Minis i kapab sirkil sa bann lenformasyon *in regards*, sa 265 morso later kot tou bann MNAs atraver

Biro Speaker, pour nou konnen lekel bann dimoun? Dan ki distrik sa bann later in ganny *allocate*? Mersi.

Mon kestyon Mr Speaker pour Minis i lir:-

Eski Minis i kapab eksplik Lasanble, konbyen zabitan Bel Ombre ki'n partisip dan sa legzersis pou aste en kare later a kote later zot paran? Mersi Mr Speaker.

MR SPEAKER

Mersi. Bon avek sa dernyen kestyon i reste nou z is 15 minit apepre. Nou a reste lo Bel Ombre. Minis ou repons.

MINISTER BILLY RANGASAMY

Wi. Mersi Mr Speaker. Mr Speaker sa legzersis ti ganny lanse an 2018 ziska prezan lo rikord i annan 6 aplikan ki'n *apply* o bor paran e ki zot ka i ankor dan prose. E ankor 4 ki dosye in fini finalize dan distrik Bel Ombre.

Mon Minister pe fer son mye posibil kote e kan i posibil pour nou ed bann zanfan, pe rod en morso later akote zot paran. Mon rekonnet ki Onorab Arissol, parey lezot bann Onorab, ou touzour pe koz lo lenportans lafanmir.

Mon Gouvernman pour kontinyen siport sa *Scheme*. Sa *Scheme* ki vreman enteresan, i vreman enportan. E ed bann fanmir grandi e viv

ansanm. I tre enportan pour bann zanfan osi kapab okip zot paran dan zot vye zour.

Alors lo kote mon Minister, ler mon vwar en dosye lo sa size. I en dosye ki nou port bokou latansyon e nou fer nou mye posibil. Par kont i annan bann konplikasyon ki vin avek, si deza annan lezot *commitment* lo sa later ki ankor anba prosesis deliberasyon, bann *charge* lo sa bann propriyete. E osi par egzanp i annan sa *Scheme* kot nou pe fer bann *return of undeveloped land*.

I annan serten *Scheme* kekfwa i kapab tonm ladan, alors nou bezwen balans tou keksoz. Koman en stratezi Gouvernman, i en stratezi ki nou pous for e nou fer li vin en realite o pli vit posibil, pour nou kapab ed sa bann zanfan konstrir zot pti lakaz, ganny zot akomodasyon akote zot vye paran. Mersi bokou.

MR SPEAKER

Mersi Onorab Arissol ou siplemanter?

HON SANDY ARISSOL

Mersi Mr Speaker. Mersi Minis pour ou larepons. Mon ti a kontan demann ou 2 siplemanter.

Mon premye siplemanter mon ti a kontan demann ou; dan bann aplikan ki'n fer zot aplikasyon. Eski i annan bann

aplikan ki zot aplikasyon in ganny rezete? Eski sa bann aplikan, zot ganny en leksplikasyon an rezilta aköz zot aplikasyon in ganny rezete? Premye kestyon.

Dezyenmman mon ti a kontan demann ou, an relasyon avek sa legzersis depi 2018,

Eski Gouvernman in antreprann en legzersis pour gete dan distrik Bel Ombre spesifikman, kote ki annan bann later vid *available* letan bann zanfan pe fer sa bout legzersis?

Eski Minister osi in fer sa legzersis pour rode dan distrik Bel Ombre kote ki annan bann later vag, later vid, pour ki nou kapab *allocate* avek bann zanfan ki enterese, oubyen avek lezot dimoun ki deza lo lalis pe esper en bout later ki lib e ki aksesib pour li kapab servi? Mersi Mr Speaker.

MR SPEAKER

Mersi Onorab. Minis ou repons?

MINISTER **BILLY**
RANGASAMY

Mersi Onorab pour ou kestyon. Mersi Mr Speaker pour donn mwan sans pour reponn. Mon napa sa sif devan mwan lo konbyen ki'n ganny rezete. Me selman mon ava

demann sa lenformasyon pour partaz avek ou Onorab.

Me toultan, i dan sa lespri donn bon lenformasyon, donn bon - annan sa bon kominikasyon nou bann zofisye i ganny demande, bann *land officers*, sekreter prensipal osi pour toultan met en rezondet, ler si i annan en *rejection* ou eksplik sa kliyan rezon ki son aplikasyon in ganny *rejected*.

E an menm tan, si nesese *call* sa kliyan asize ek li, eksplik li. Sa i stratezi mon ti a voudre nou pe travay avek. E mon pe ankouraz nou bann koleg pour nou fer sa. Parske i enportan. Parske en let i dir ou *rejected* me ou ganny en leksplikasyon aköz - petet ou kapab.

Si nou kapab vin ek en lot solisyon nou sey vwar ansanm. E sa i lapros ki mon anvi enstale, oubyen ankouraze dan mon Minister. Kot i konsern *state land inventory* sa pour nou kapab konnen be kote nou annan later, kote sa Gouvernman i annan later.

I en legzersis ki pa'n fasil, i mon krwar dan, dan enn ou de bann deliberasyon, ki mon'n fer mon dir sa i enn bann *goals* ki mon anvi *achieve* o pli vit posibil, pour annan en *state land inventory* ki kredib.

E sa legzersis mon ankouraze poudir in preski finalize, e in annan en legzersis pros ki nou'n bezwen fer avek Biro *Land Registration*, en lot departman dan Gouvernman avek *GIS*, avek lekip *Survey* e osi *DICT* in ed nou.

Nou'n *focus* lo tou sa bann later, pour nou kapab konmsi pour annan - i kredib sa lenformasyon parske par ler i kapab annan en lavant ki'n fer, me selman i pa'n ganny *capture* dan sistenm.

Alors i la dan sistenm konmsi i pa'n, i annan serten, i pa pe rekonsilye. Alors nou'n demann en travay entansif pour rekonsilye sa lenformasyon (eskiz mwan), pour nou kapab met sa lo *GIS*. Ler ou antre lo *GIS* i kler, lo platform *GIS* i annan tou sa lenformasyon.

So firamezir ki nou'n pare pour nou, petet fer sa vin en lenformasyon ki nou kapab partaze ek serten lotorite konsernen, nou ava fer li.

Me mon pa le met en keksoz apre i annan fot ladan, i fer lanbarasman. So tou keksoz pe ganny fer. Mersi bokou.

MR SPEAKER

Thank you.

MINISTER
RANGASAMY

BILLY

Mr Speaker.

MR SPEAKER

Onorab Aglae ou ti annan en kestyon lo Bel Ombre?

HON EGBERT AGLAE

Wi Mr Speaker. Mersi. Minis mon'n ekout ou larepons, an vi ki osi i dan sa menm laliny, bann later ki akote, pour bann paran la. I annan serten devlopman ki petet en fanmir i komanse ki i annan nesosite atraver permisyon *Planning*, petet pour *location of son sewage*, i bezwen bouz lo later Gouvernman li menm.

E ki parfwa i annan serten - zot pa ganny aksepte. Petet kwa ki zot pe mazin fer osi pour kapab siport fanmir ki pe sey ed son lekor ladan pour kapab konplet zot bann proze? Mersi.

MR SPEAKER

Mersi. Minis?

MINISTER

BILLY

RANGASAMY

Wi. Mr Speaker avek tou senserite, mon le konfirm avek Onorab ek Lasanble an zeneral, ki sa i en keksoz ki nou *accommodate*, oubyen nou pran konsiderasyon seryezman.

E si sa later i disponib dan loptik kot nou pe ed en lot dimoun ki lo nou lalis kan i pe sey ed son lekor, me i annan

en lespas ki limite; e later i pour Gouvernman - enn pti morso later an plis - si napa okenn konplikasyon, i en keksoz ki nou seryezman konsidere Onorab en.

Me petet si dan lasal la, tou bann Onorab i annan en serten ka dan zot distrik kot zot okouran pour dir sa i pa leka, mon ti ava demann zot fer mwan konnen aköz i annan sitan kantite volim ka.

Me si i annan enn zot zabitan pe ganny sa lanpayaz, e i anvi fer son pti lakaz akote son paran, *Planning* pe dir li rod lespas pour fer *soak away* be Gouvernman i annan later, nou tou avek tou senserite nou pour pous sa bann kalite ka parey en.

Nou pour fer li vin en realite. So ed mwan, ed mwan si zot okouran okenn ka dan zot distrik ki zot pe ganny serten lanpayaz dan sa laspe en? Mersi bokou tou bann Onorab. Mersi Mr Speaker.

MR SPEAKER

Mersi Minis. Onorab Cosgrow.

HON WALLACE COSGROW

Yes, Mr Speaker. Mersi Mr Speaker. Mr Speaker mon keston i apropo Bel Ombre menm. Si Minis i kapab petet zis *brief* enn pti Lasanble petet piblik an zeneral, enn pti pe bann kriter petet ki zot gete, an term par egzantp groser

later, ki groser *plot* - ki *minimum sorry* ki en dimoun i kapab fer sa bann devlopman?

Ki bann *requirements Planning*, konmsi aköz, parey Onorab in dir i annan ki'n ganny aprouve zis 6 dan Bel Ombre. Me i annan ki'n ganny rezete, petet zot pa tro konnen aköz *or* ki bann kriter avan ki zot *apply*?

So petet si Minis i kapab donn nou a bref. Mon konnen petet pour napa tou me solman an bref ki bann kriter, an term fer en dezyenm lakaz o bor later paran? Mersi.

MR SPEAKER

Mersi. Minis en repons silvouple?

AG PS FOR LANDS GERARD HOAREAU

Mersi Mr Speaker. Bonn apre midi tou Manm Onorab. Nou napa vreman en kriter strik an se ki konsern sa, sa kalite legzersis. Nou tant pour regard li lo en *case-by-case basically*.

So si mon memwar i servi mwan byen la, ou pour vwar annandler sa legzersis koumsa i *entail* kot en paran i pare pour donn en bout lo son later pour li e en bout lo Gouvernman.

E sa ou pour vwar nou pe tir enn - kare en pe pli pti, aköz i annan en bout kot son manman, son paran avek pour li.

Me kan i pe rod en bout later li menm li lo tousel me selman i baliz avek paran, kot i pour ganny akse osi, ki pour pas ek paran otomatikman la i tonm dan en *size land bank* 500, 800 dan sa zanr koumsa.

So this is basically the kalite - lo kestyon grander en.

MR SPEAKER

Mersi. Onorab termin avek enn pti pwen silvouple. Minis ou'n lev lanmen ou le azout lo menm pwen oubyen kwa?

MINISTER **BILLY RANGASAMY**

Wi, wi.

MR SPEAKER

Wi ale.

MINISTER **BILLY RANGASAMY**

Wi, wi mon ti zis anvi. Wi mon ti a voudre azoute en lo menm pwen ki i fer bann teren Sesel i varye par ler i annan bann ki konplike. So nou pran, prenon kont par egzantp si i annan bokou ros lo sa teren, nou fer li enn pti pe pli gran, aköz i bezwen met pi perdi i annan zistans ek balizaz, so i annan diferan kriter ki nou balanse.

Se sa i end up being a case-by-case basis. Si i en landrwa plat, i annan nou kapab al enn pti pe pli pti alors.

So zeneralman teren i zwe en rol ladan Onorab. E se sa bann fakter ki nou pran konsiderasyon *case-by case*. Mersi bokou.

MR SPEAKER

En klarifikasyon Onorab?

HON WALLACE COSGROW

Yes Mr Speaker. En pe dan menm laliny ki Minis avek *PS Acting PS* in dir nou, ou konnen par egzantp bann distrik parey Mamelles, Plaisance, Mont Fleuri kot *density* i *high*, petet zot bezwen eksplik bann dimoun aköz i annan lekspektasyon ki dimoun i vini, i kapab fer enn pti bout o bor son paran.

Me apre, landrwa *density* i sitan *high* napa servis *sewage* e prezan sa dimoun i dezapwente ler i vini. Petet se sa ki mon pe sey osi sey dir e anmenn devan, ki dimoun i ganny en konpran tre byen ki bann kriter avan zot ganny lekspektasyon. Mersi.

MR SPEAKER

Mersi. Anfen mon krwar Minis in fini adres sa kestyon. Minis i annan keksoz oule azoute? Koman en dernyen parol?

MINISTER **BILLY RANGASAMY**

Wi zis sa ki Onorab in partaze i enportan pour nou fer konpran nou bann dimoun.

Akoz, kot napa sistenm *STP*, i vremen en *challenge*. Erezman dan distrik dan lavil, Les Mamelles eksetera nou ankor, nou kapab konekte lo sistenm alors nou kapab *densify* enn pti pe plis.

Me parey ou konnen Onorab, ou dan ou letan ou ti Minis, pour Lanvironnman *PUC* ti tonm anba ou Minister. E bokou zefor ti pe ganny fer, i bezwen kontinyen ganny fer pour konsider bann proze *regional STP*, en fason nou a kapab konsantre enn pti pe plis pour ganny koneksyon ek sistenm rezyonal par egzanp dan Grand Anse kot i annan bann konplikasyon, kot lanvironnman osi.

Bokou problemn *sewage*, nou a kapab konmsi devlop nou bann proze lo menm si teren i enn ti pe pli pti. So nou pa bezwen ganny sa kontrent limitasyon pour met pi perdi, pour met, *septic tank*, nou a kapab zis pran nou tiyo konekte lo en sistenm rezyonnal.

Me i vin avek en kou, me en kou ki tre enportan pour lavenir. Mon okouran ki *PUC* pe rod fason, menm i letab par letap pour zot egzekit bann proze *STP* parey zot pe fer La Digue pour lemoman, kot nou a kapab fer enn pti pe plis ogmant enn pti pe nou *density*. Mersi Mr Speaker.

MR SPEAKER

Mersi Minis bon avek sa nou'n ariv a lafen sesyon kestryon pour ozordi. Mon krwar nou'n ganny en bon pe lenformasyon avek Minis e mon remerisi zot pour zot partisipasyon Minis ek ou delegasyon.

E mon swet zot bon kouraz e bonn kontinyasyon. Lasanble i a pran poz dezennen la e nou a rebran travay 2er apre midi. Mersi.

(BREAK)

MR SPEAKER

Bonn apre midi tou dimoun. Manm Onorab, zofisye nou piblik. Mon oule fer en deklarasyon, lo travay Lasanble an relasyon ek Rapor Komisyon Laverite Rekonsilyasyon e Linite Nasyonal (*TRNUC*).

Lasanble ti ganny sa rapor an Mars 2023, e sa ti ganny sirkile avek tou nou bann Manm. Me vi lanpler sa rapor plizyer santenn paz, nou ti donn Manm letan pour lir, konsilte antre zot, e osi konsilte lezot dimoun oubyen en group lo konteni sa rapor.

Sa semenn nou ti'n met 2 Mosyon lo *Order Paper* an relasyon avek sa rapor. Enn dan non-*Leader* Lopoziyon Onorab Pillay e lot dan non-*Leader* Biznes Gouvernman dan Lasanble Onorab Georges. Sa de Mosyon pa ti pour diskite

Rapor *TRNUC* li menm, me pour deside ki metod nou pour swiv pour diskit li.

Nou ti pour komans pran sa de Mosyon la apremidi e zot ti lo *Order Paper*. Me ozordi, mon'n ganny enformen ki i annan en seksyon sa rapor ki pa ti ganny soumet ek Lasanble e sa i konsern determinasyon Komisyon lo 374 ka, ki ti'n ganny met devan zot.

Lo en total 504 ka, ti annan zis 130 ki ti enkli bann volim rapor ki nou ti'n gannye deza. Sa Seksyon rapor ki ti manke pour prezan ganny soumet ek Lasanble. Evidaman i annan nesosite pour akord nou bann Manm en pe letan pour analiz sa nouvo seksyon.

En dezyenm fe se ki apre diferan konsiderasyon ki zot in fer le de dirizan dan Lasanble in dakor pour rod en Mosyon bipartisan pour deside ki mannyer Lasanble pour diskit rapor *TRNUC*.

Mon le dir ki en lapros konzwent par le depart dan Lasanble lo sa travay, i enn ki mon osi mon'n swete e ki mon'n ankouraze. Alor an konsiderasyon sa de fe;

Enn ki nou pe ganny en nou seksyon sa rapor e de ki nou pe anvizaz-e anmenn en Mosyon siporte par tou lede parti pour komans avek, mon'n pran desizyon pour

sispann konsiderasyon sa de Mosyon, ki ti deza lo latib, an atandan en nouvo Mosyon bipartizan ki nou pe anvizaz-e met lo *Order Paper* pli vit ki posibil. E mon ekspekte semenn prosenn.

Mon note ankor, ki sa nouvo Mosyon, i pour determinen ki mannyer Lasanble i pran rapor *TRNUC*, e i a met en letan, lo kalandriye Lasanble, pour nou konsider sa rapor e fer okenn determinasyon lo rekomandasyon dan sa rapor.

Mon le asir Manm piblik, ki nou pe pran sa travay an kont pour nou kapab avanse lo li o pli vit ki posibil. Mon remersye zot pour zot konprenezon, e mon remersye piblik ki zot pe kontinyen akonpanyi nou dan sa travay. Mersi.

Avek sa nou pour pran lot travay ki lo nou *Order Paper* e sa konsiderasyon en lot Mosyon ki dan non Onorab Richard Labrosse, Onorab Labrosse ou'n pare pour soumet ou Mosyon? Onorab ou annan laparol.

HON RICHARD LABROSSE

Mersi Mr Speaker. Bonn apre midi Mr Speaker. Bonn apre midi tou dimoun ki a lekout. En bonn apre midi spesyal pour bann zabitan sorti Plaisance. Se avek plezir Mr Speaker ki mon prezant mon

dezyenm Mosyon koman setyenm Manm Elekte pour distrik Plaisance dan sa Lasanble.

Mosyon i al *comme* swivan:-

Sa Lasanble pe demann Gouvernman pour asire ki ledikasyon tersyer ki Seselwa i gannyen oubyen pey dan zot pos, ensi ki leksperyans travay ki dimoun i annan, i ganny rekonnnet par lotorite neseler, par landrwa travay piblik ensi ki prive, ki ava ede dan plasman travayer ensi ki promosyon e redwir gaspiyaz finans ek letan.

MR SPEAKER

Mersi Onorab pour ou Mosyon. Mon ava apel pour segonnman sa Mosyon. Onorab Bastienne.

HON DESHEILA BASTIENNE

Mersi Mr Speaker. Bonn apre midi Mr Speaker. Mr Speaker mon segonn Mosyon anmennen par Onorab Labrosse. Mersi.

MR SPEAKER

Mersi Mosyon in ganny segonde. Mon a donn laparol Onorab Labrosse, pour adres son Mosyon.

HON RICHARD LABROSSE

Mr Speaker, tenm UNESCO pour lannen 2023 i *“Invest in people, prioritize education”*

ouswa “Envestir dan dimoun, donn priyorite ledikasyon”. Zisteman pour 2023, Bidze ki'n ganny mete pour Minister Ledikasyon i R1.34bilyon, en logmantasyon plis ki 30poursan Bidze ki ti donner pour 2022.

Sa i montre ki Gouvernman in pran lenvestisman dan ledikasyon pour nou Nasyon tre serye, e sa i enportan. Akoz parey nou konnen, se ledikasyon ki moter okenn lekonomi. Si nou napa dimoun ki'n ganny formen avek bann konesans neseler, pei pa pou devlop parey i devret.

Bann pei kot i annan plis enklizyon sosyal e plis egalite dan tou domenn, i bann menm pei ki envestir e kree bann sistenm ledikasyon ki efikas. Sa i montre laprev lenportans ledikasyon dan en pei, e se sa akoz prosesis devlopman ekonomik, sosyal e kiltirel i depan lo kalite lekol ki annan dan en pei.

Donk si nou pa depans parey nou devret pour kree sa kalite sistenm ledikasyon ki adapte avek bezwen nou pei, pour anpese ki nou pei i pou pouri sosyalman; nou pou bezwen al depans sa bann larzan lo lezot sekter sosyal; tel ki lasante, kot *methadone* i bezwen ganny donner aprezan. Servis sosyal pour anmas bann dimoun ki

lasosyete in zet, e e ki pa kapab okip zot lekor, prizon ki'n ranpli avek bann viktim drog e parmi lezot vis.

Alors nou bezwen investir dan ledikasyon dan nou pei, aköz sa i sel fason ki nou pou anmenn plis devlopman ki nou sitwayen i bezwen. Alors sa Bidze ki'n ganny mete pour Minister Ledikasyon ki responsab, sa Bidze ki'n ganny mete pour Minister ki responsab pour Ledikasyon i tre valab.

Zisteman, Minister Ledikasyon i aprezan *parent ministry*, detrwa antite. E parmi i *Seychelles Qualifications Authority*. Dapre zot *Act*, ki ti ganny aprouve par sa Lasanble an Novanm 2021, zot louvraz se pour prevwar devlopman, lenplimantasyon, e antretyen en kad Nasyonal pour bann kalifikasyon, e osi prevwar lasirans kalite dan ledikasyon e formasyon.

An dot mo, zot sipoze pe verifeye ki sistenm ledikasyon ki nou annan isi, depi primer ziska liniversite, i lo standar neseseur pour favoriz laprantisman bann sitwayen. E ki pou ede gard nou pei an bonn sante dan tou laspe.

Touzour dapre *SQA Act 2021*, zot annan 23 fonksyon, ki detrwa ladan i tourn otour akreditasyon bann lenstitisyon ek program. Mon pou retourn lo sa pli tar. Mon

kontan osi pou vwar osi ki enn bann fonksyon sa lotorite i pour anrezistre bann lorganizasyon prive ki ofer formasyon, enkli bann lekol primer e segonder prive.

La prezan sa lotorite i ava kapab verifeye si sa bann antite ki oule ofer okenn kalite formasyon, pe fer li dapre standar kalite ki neseseur. La mon pour profite poudir avek Seselwa, ki la i zot sans pour ouver zot sant formasyon ki zot ti'n reve pour ouver pandan tou sa bann lannen. La prezan i annan possibilite pour zot, pa zis pour kontribye dan ledikasyon, me osi dan lekonomi nou pei.

Mr Speaker, mon konnen petet I annan pou krwar mon pe fer promosyon pour *SQA*, me mon pe donn sa bann lenformasyon pour *set the scene*, parey nou dir, fodre zot konpran sa bann lenformasyon pour zot kapab konpran mon Mosyon.

Dapre zot sit web, zot annan detrwa *units* laba kot *SQA*, e parmi i enn ki apel *Recognition of Prior Learning*, oubyen *RPL*. Definisyon ki zot donner pour sa term, i ler zot rekonnet e ateste bann konpetans ki en dimoun in gannyen dan bann sistenm ledikasyon oubyen formasyon formel. Oubyen an deor sa bann sistenm. E sa avek bi pour donn sertifika.

I en prosedir kot konesans ek leksperyans ki en dimoun i deza annan, e ki in gannyen dan nenport fason, swa formel oubyen enformel i ganny evalye dapre bann standar, e i ganny rekonnet. Sa i vedir si menm, si en dimoun pa'n swiv en formasyon dan en lekol avanse, son leksperyans i sipoze kapab ganny servi pou mezir son kapasite pour kalifye li pou fer en travay.

Sa i en legzanp tipik kot nou pe sey redwir bann problem sosyal asosye avek mank lanplwa, oubyen lanplwa ki mal ganny peye. Sa madanm ki pe aranz lasanm pour sepa konbyen lannen san en sertifika lekol tourizm, li osi i kapab al fer son *RPL*. E si i kouver tou kriter ki nesese i ava kapab ganny son sertifika i osi.

I ava kapab ganny en lapey ki parey pour en dimoun ki'n pas atraver lekol. Sa msye ki pe ansarz sa seksyon pour sepa konbyen lannen, i pe fer tou sa louvraz ki demande, selman nek i *acting* menm, nek i par enterim menm.

I ava kapab al fer son *RPL* e ganny son sertifika e li osi a i a benefisy avek lapey ki sa pos avek sa kalifikasyon i demande. Ti pou tre byen si tou dimoun ki ti bezwen ti kapab fer sa.

Problem ki annan avek tousala Mr Speaker, se ki si en dimoun i oule fer *RPL* i pou bezwen peye. E bann pri i varye. Minimom ki mon vwar lo zot sit *web* se R5600 e i kapab al ziska plis ki R10mil. I enportan pour note ki serten dimoun ki mon'n koz avek, i dir ki zot landrwa travay i peye kot zot fer zot *RPL*, me i annan landrwa travay ki pa enterese avek sa.

Mr Speaker, ki tou sa bann dimoun ki kapab *afford* – kote tou sa bann dimoun pour kapab *afford* pou tir R5000 ekek dan zot pos? Nou dir ki R5000 pa merit en gro sonm, me ler ou lapey i deza zis R7000 ekek, ou annan manze pour aste, bis, kouran, delo, telefonn pou peye, e pa blyi *internet* ki'n vin en nesese konmela, i difisil pou vwar kote pou al tir ankor en R5000.

Mr Speaker, nou sistenm ledikasyon i pour naryen ziska en serten laz, i vre. Mon konnen bokou pou dir, be akoz sa madanm ek sa msye pa ti serye ler zot ti lekol pour zot ganny en lekol pos-segonder e en bon travay apre?

Be petet zot sirkonstans lavi pa'n ankouraz zot pou serye lekol. Petet zot kapasite akademik in anpes zot kapab swiv lafason ki ledikasyon normal i ganny fer. Petet zot pa ti enterese avek keksoz

akademik e personn pa fatig zot pou gete ki kalite form ledikasyon ki pli ale ek zot. En kantite rezon aköz dimoun i war zot dan bann sityasyon ki pa favorab pour zot ler zot fini lekol.

Si en landrwa travay Mr Speaker, in met en dimoun dan en pozisyon pour plis ki 2an ou 3an, menm 5an san tir li, savedir ki zot war ki i pe fer en bon travay, sansan zot ti ava tir li. Me aköz ki ou pa pe kapab donn li sa lapey ki al avek sa pozisyon alors?

Ou dir ek li, *sorry* ou pa pou kapab donn li sa lapey aköz i napa kalifikasyon ki al avek, selman i pe fer sa travay, e i pe fer li tre byen pour detrwa lannen. Eski sa pa en labi drwa sa dimoun? I pa sanmenm ki nou apel *free labour* sa?

I regretan ki sa pe arive osi dan sekter piblik pandan bokou lannen, kot dimoun in reste *Acting* pour detrwa lannen, malgre ki i ti pe fer tou lobligasyon ki sa travay i demande, mon mazine ki kekfwa sa enn bann - mon mazine ki sa i - mon mazine ki kekfwa sa bann rezon ki *Public Service Bureau* in vwar li neser, pou reviz bann sistenm ki annan an plas aktyelman, atraver bann *Schemes of Service* ki dapre konpran zot pe re-travay lo la.

Mr Speaker, i annan en lot problem ki mon remarke ler mon'n koz avek serten kliyan SQA, e osi keksoz ki mon'n vwar lo zot sit *website*, ki'n sonn en alarm dan mon lespri.

En madanm i dir mwan ki li i ti fer son laplikasyon pour fer son *RPL* en pe letan pase, me ki ziska la i pa ankor ganny en program pour li ganny evalye avek, aköz napa kot bann lekol pos-segonder.

In dir mwan ki pour li ganny evalye, in ganny dir ki fodre sa program in ganny akredite par SQA, e malgre ki i annan dimoun ki pe fer sa *course* kot sa lekol, SQA pa ankor donn akreditasyon. Savedir, si mon'n konpran byen, i pa sipoze pe ganny ofer.

Sa i fer mwan demann en pe kestyon Mr Speaker. Ki mannyer en *course* i kapab ganny ofer avek piblik san ki i pas bann kriter standar ki lotorite ki mezir standar i mete? Eski sa i pa kont kek lalwa? Eski sa pa vyolans drwa dimoun?

Ler mon get lo sit *website* SQA, mon war zot in pibliy lalis bann program ki dan diferan faz akreditasyon. Mon vwar ki i annan en kantite ki *under review*, me zot pa dir ki savedir sa term "*under review*".

Mr Speaker, i annan lenstitisyon, tel ki STA ki tou son programm i *under review*. STA 12 programm parmi 16 i *under review*. Mon kestyon se ki, eski sa bann programm ki *under review* in ganny akredite ou non? Ki savedir sa term *under review*?

Si i *under review* savedir i pa ankor akredite. Savedir 75poursan programm STA pe ofer e tou programm STA pa ankor ganny akredite? Me selman sa bann lenstitisyon pe ofer sa bann programm avek nou bann zanfan ki fek fini S5? Ki pou arive avek zot ler zot fini lekol?

Mon vwar lo lalis SQA sa *course Advanced Certificate in Mechanical Engineering* i *under review*, me selman lo site lo *website SIT*, sa *course* pe ganny ofer. En lot i *Diploma in Construction*, pe ganny ofer lo sit *web SIT*, me selman sa pa ni aparet lo lalis bann programm ki SQA in bibliye.

Eski sa i vedir ki *SIT* pe ofer en programm ilegal kot *SITE*? Sa ki nou apel *NIE* lontan. Li osi parey, lo son *website* in mete ki i annan programm *Diploma in Education Secondary*, me sa pa ni aparet lo lalis bann programm akredite SQA.

Kot STA, programm *Advanced Certificate in Tourism and Tour Guiding* par egzanp pe ganny ofer, me

selman lo lalis SQA sa i *under review*. Si i pe ganny revize, eski ou sipoze pe ofer li? I annan detrwa legzanp parey ankor.

Dapre en lartik lo zot sit *web "What does accreditation mean?"* Zot dir ki en programm i ganny akredite pour 5an, apre sa, mon mazin en zot bezwen rod akreditasyon ankor pour kontinyen avek. Lo sa lartik mon'n vwar definisyon pour detrwa term tel ki "*accredited programme*" ki vedir en program ki'n satisfere tou kriter Nasyonal.

Donk ki ganny rekonnet pour 5an e ki kapab ganny servi dan *RPL*. Lot term i "*provisionally accredited programme*", ki vedir in satisfere lamazorite bann kriter Nasyonal e i annan serten pti sanzman ki devret ganny fer pou ki kapab ganny *full accreditation status*.

Apre i annan bann "*non-accredited programme*", ki zot pan satisfere laplipar bann kriter Nasyonal e zot annan bokou sanzman pou fer, pou kapab ganny *accreditation status*. Me napa en definisyon pour "*under review*."

En lot keksoz ki tre, tre enportan ki sa lartik in fer sorti ki en sertifika ki'n ganny donnen pour en programm ki pa'n ganny akredite pa pou ganny rekonnet par SQA. E alors mon dedwir ki i bezwen

pour, ki i bezwen pour sanmenm rezon ki SQA pa'n oule fer RPL avek sa madanm, mon mazine.

Sa program ki i oule servi pa'n ganny akredite e alors sertifika pa pou vo naryen, zot in le protez li.

Bann ki bann lenstitisyon ki zot pe fer dan - bann lenstitisyon ki zot pe fer dan zot kote zot? Lekel ki responsab pour fer sir ki marmay ki al dan bann lekol apre segonder i ganny proteze?

Dapre nouvo Act SQA, enn zot fonksyon, se sa fonksyon "(R)" se pou re-etabli kriter ek prosedir pour proteksyon lentere bann etidyan, ki enkli laranzman pour proteksyon bann etidyan ki'n komans en *course*, me ki apre sa *course* in aret dan semen, oubyen si sa lenstitisyon in aret fonksyonnen.

Savedir, se rol SQA pou fer sir ki marmay i ganny proteze. E ki mannyer sa i ganny fer? Zot met bann kriter ki an plas, e bann lenstitisyon i devret respekte sa bann kriter. Me, Mr Speaker, i paret ki serten lenstitisyon pa pe fer sa, e zot pe met nou marmay ek nou pei an retar!

Ler Minister Ledikasyon i vin devan sa Lasanble, mon ti a kontan ki i ti a dir nou ki pe ganny fer pou ankouraz bann lenstitisyon pou respekte

kriter ki'n donner? Akoz person pa ti pou kontan si en zour enn son fanmir i swiv en program dan en lekol pos-segonder, apre i ganny dir ki i pa pou kapab servi sa sertifika, akoz i pa rekonnèt par Lotorite Kalifikasyon Sesel.

Konmela, en bon pe landrwa i anvoy bann *graduates* al evalye zot sertifika kot SQA. Ki arive ek zot si zot in swiv en *course* lokal ki pa'n ganny akredite?

Eski apre sa 2an, sepa 3an ki'n pran dan son lavi zenes i pou bezwen al tir larzan dan son pos ankor pour li kapab ganny RPL e ganny saler oubyen benefis ki ale avek sa kalifikasyon, ki sa louvraz i demande? Zis akoz sa lenstitisyon in deside ofer program malgre ki SQA pa'n akredite.

E mon asire ki SQA pa donn akreditasyon pour bann bon rezon. Mon asire ki bann dimoun laba kot SQA zot pa leve bomaten e deside ki ozordi mon pa pou donn akreditasyon tel program, akoz mon pa dakor avek sa direkter. Non!

Mon asire ki zot in fer en bon evalyasyon avan. Mon asire ki zot in etidye byen sa bann ka, e menm mon mazine zot in mank sonmey lo la, akoz zot osi zot rekonnèt

ki lavenir nou bann zanfan e nou pei i an kestyon.

Si sa bann landrwa ek zot program pa'n ganny akredite savedir zot pa'n fer en travay ki alaoter e si ou, si en keksoz pa annord, ou pa kapab ekspekte ganny en bon rezilta.

Donk eski bann lenstitisyon pe pran zot responsabilite pou fer sir ki zot bann keksoz i annord? Eski zot pe fer resorti bann *challenge* ki zot fer fas avek, ki anpes zot fer serten keksoz? Eski zot pe sey rod solisyon pour zot bann *challenge*? Eski zot pe travay avek bann partner neser pour ed zot? I annan bokou kestyon pour nou reflexion lo la.

Mr Speaker, tou sa bann lenformasyon ki mon'n dekouver i montre mwan ki i annan keksoz ki petet pa pe fonksyonn avek efikasite, dan bann lekol pos-segonder. E petet kot SQA, e vreman mon konsernen pour lavenir nou pei.

Si nou kontinyen koumsa, nou pou annan ankor plis problemn avek demann travay dan bann sektè kle, tel ki konstruksyon, lapas, lagrikiltir. Deza, sa i en problemn, be si nou les li kontinyen, i pou vin en manman problemn Mr Speaker.

Donk si nou kapab met en sistenm, en mekanizm efikas an plas, pour fer sir ki dimoun avek en larises leksperyans pa bezwen peye e gaspiy letan pour al lekol ankor pour en keksoz ki i deza konnen, nou pou ed nou pei en kantite.

Mr Speaker, mon pa zis met o kler serten defayans ki mon'n vwar ler mon ti pe fer resers lo sa Mosyon. Mon lentansyon i pa ti pou anbaras person e fer fristre person, me pour senpleman fer mon louvraz koman en reprezantan Lasanble Nasyonal pei Sesel.

Prezidan pa kapab vwar tou problemn ki annan Sesel aköz son lizye pa partou, me nou koman bann reprezantan Lepep Seselwa, nou bezwen ouver nou lizye, get otour nou. Vwar kote bann konsern i ete, e koz pour sa bann dimoun ki'n ede met nou la.

Mon rekonnèt ki sa, sa mon'n mansyonnen i en problemn e mon oule ede pou amelyore, aköz dan mon distrik e osi lezot distrik, i annan bokou dimoun ki pou benefisye avek en sistenm ki pli efikas.

Donk mon pa'n zis vin koz lo problemn Mr speaker, me dan mon konklizyon pli tar mon pour osi donn bann sizesyon. Avek sa Mr Speaker mon met mon Mosyon devan Lasanble. Mersi.

MR SPEAKER

Mersi Onorab. Segonder Mosyon ti a kontan pran laparol an se moman? Onorab Bastienne.

HON DESHEILA BASTIENNE

Mersi Mr Speaker. Bonn apre midi Mr Speaker e bonn apre midi tou dimoun a lekout. Mr Speaker Mosyon Onorab Labrosse i pe demande ki lotorite konsernen i siport travayer ki antre dan en travay avek sertifika atraver ledikasyon tersyer. E ozordi menm nou pe vwar serten travayer ki zot, zot bezwen al swiv serten kour, peye dan zot prop pos, pour zot kapab ganny en sertifika ki dapre zot, i ava apiy zot ganny en promosyon ouswa en logmantasyon ki zot merite dan zot karyer.

Mr Speaker Mosyon i annan son merit. Sa sityasyon annan sertifika, en sertifika ki alaoter pour ou kapab santi ou konfortab dan ou landrwa travay, i en fason parfwa ki ganny aplike dan serten landrwa travay, ki parfwa i fer bokou travayer santi zot dekouraze e enferyer.

Mr Speaker i enportan note, ki dan lepase, bokou travayer ti fini lekol byen boner, zot pa ti ganny sans pas atraver bann tel kour ki pe egziste ozordi, zot pa'n

pourswiv lekol pos-segonder e zot in sorti, zot in al direk dan lanplwa.

Letan ou regard bokou zanfan ki pe pas dan plizyer letap, ledikasyon, Me ki serten zot sertifika i pa pe ganny rekonnèt dan serten landrwa travay, i malere ki parfwa sa i anmenn bokou dekourazman.

e san menm sa bann dimoun ki zot menm zot parfwa zot pour dir ou, zot in gaspiy zot letan, akoz zot ti bezwen fer tou sa bann kour, me a lafen dizour zot pe vwar ki zot pe napa sa sertifika ki pe donn zot sa bagaz.

Mr Speaker ozordi bokou travay fer fas avek bann bon lakonplisman. Malgre zot nivo ledikasyon, malgre zot pa pe sorti avek bann tel sertifika o nivo, me zot pe pran lavi serye, zot pe pran zot travay serye, zot annan en vizyon e zot pe pare pour zot tras zot semen drwat e zot fer si ki zot pa pe deroute.

Mr Speaker i osi, i osi tre enportan pour note ki bokou bann travayer ozordi ki pa'n antre dan lanplwa bann tel sertifika, zot pe travay vreman dir. Zot pe aprann ek zot siperyer. Zot pe ekoute, zot persevere, zot met keksoz an pratik e fer li dapre lenstriksyon.

Dan serten Minister ozordi, nou pe vwar sa bann tel travayer in antre lo sa bann

pli ba nivo, malgre sa dekourazman ki zot napa sa tel sertifika. Ozordi zot pe travay koman bann direkter. Zot dan bann departman dan labank, zot dan serten lazans prive, e osi i annan bann lotel ki zot in komans koman bann senp *receptionist*, e zot kontinyen monte ziska lo nivo *management*.

Se sa bann group travayer ki vin avek lespri aprann, devlope, prodwir bon rezilta, ki anmenn bon repitasyon dan zot landrwa travay, pour zot en sertifika i pa pour vin en lobstak, zot kontinyen aprann firamezir ki zot travay.

Mr Speaker i annan travayer ki fer promosyon pour zot landrwa travay alaoter. Me letan ou regarde, i pa'n al dan okenn possegonder, i pa'n al atraver ledikasyon tersyer, i pa'n al swiv okenn kour dan *SIM*, ni dan *management*, me ozordi zot pe prodwir bann bon rezilta pour zot bann lenstitisyon travay.

Mr Speaker ki kantite sa bann tel travayer ki ganny valorize? Ki kantite sa bann travayer ki ganny rekonnet e resevwar zot saler apropiye dapre zot performans? Repons ou napa sa sertifika, ou pa merite, ou pa ganny plase, nou pa pe vwar ou pe ariv lo sa *band* ki i nesese.

Sa i senpleman bann mesaz ki nou, nou devret pe pran li o serye, akoz se sa bann group travayer ki antre dan en lanplwa avek lanvi travay, e lanvi ariv devan, e anmenn zot lenstitisyon lo en nivo tre o pour donn li son repitasyon, e pour ed li kontinyen agrandi.

Mr Speaker nou fer - mwan mon pe - mon ler fer byen kler e mon le met lo rikord ki mon pa pe dir atraver sa Mosyon, ki dimoun ki pe aim pour son sertifika tersyer, pour son bann akreditasyon, pour son bann pti sertifika avanse ki zot pe senpleman, gaspiy zot letan ki pa fer sans lekol e sorti avek gro sertifika. Non.

Mr Speaker bi sa Mosyon se annou regard en pe otour nou. Annou vin fran lo sa sityasyon ki la dan serten landrwa travay kot par ler menm, zot menm bann sef ki akoz i annan en problemm avek en travayer, ouswa i santi li menase, i krwar ki sa travayer pour pran son pozisyon. Alor zot servi sa leskiz ki ou napa sa sertifika nesese pour ou ganny promote. Ouswa pour menm annan kouraz poudir ou ki malgre ou pe travay byen, me ou pa pour kapab kalifye.

Dimoun ki annan zot sertifika mon felisit zot, ki'n pran sa letan pour zot

pourswiv zot ledikasyon ziska pli o posibil, nou donn zot, nou felisit zot e nou demann zot ki nou bezwen plis ankor bann dimoun dan zot kalib. Me sa i pa vadir ki lezot ki pe vin – ki'n antre dan lemond travay par devan zot ki zot, zot napa sa lenportans zot osi.

Mr Speaker mon le fer - mwan mon le fer nou bann zenn ki ankor pe etidye, enkli lezot dimoun ki pe mazin al fer serten kour, pour pa dekouraze, pour persiste dan zot rev, zot sertifika i tre enportan, parske nou sosyete, i bezwen zot. Nou bezwen bann tel dimoun avek kalifikasyon pour fer nou pei bouze. E la permet mwan nonm enn de, bann dimoun entelizan, kalifye ki nou bezwen dan nou sosyete, parey tel ki bann Prezidan Minis, dokter, ners ansennyen, arsitek, zournalis, mekanisyen, farmasyen e bokou lezot ankor.

Mr Speaker sa Mosyon i pour tous tou dimoun dan en fason, me ankor mon le met lo rikord ki nou pa pe vin negativ, anver okenn dimoun ki pe travay, ki pe lekol, ki pe pey zot bann kour, ki pe ekspoze, pour zot kapab sorti avek zot bann sertifika.

Me nou pe senpleman demann lazistis ek *fair deal* vizavi travayer ki travay for ki pa'n pran zot, ki pa pran zot

koman dimoun enferyer aköz zot napa bann tel sertifika rekomande, pa servi leskiz sertifika letan ariv ler pour nou donn rekonpans en dimoun ki merite.

Mr Speaker mon pour sipor sa Mosyon anmennen par Onorab Labrosse, an loner sipor pour mwan bann frer ek ser ki pe travay vreman dir la deor ki merit zot promosyon, ki merit zot sale rekonpans rezilta zot travay ki zot merite. Mersi

MR SPEAKER

Mersi Onorab. Eski mon annan lot Manm ki pour entervenir lo sa Mosyon? Onorab Labonte.

HON ANDY LABONTE

Mersi Mr Speaker. Mr Speaker mon pa pour long. Me selman mon santi ki i enportan ki mon fer en kontribisyon lo sa Mosyon, aköz pour mwan ler mon pe get sa Mosyon anmennen par Onorab Labrosse, mon vwar son merit, e mon vwar son nesosite.

Rezon ki mon pe dir sa i senpleman se ki aköz, ler nou pe get dan sosyete li menm li dan pei an zeneral, i annan bokou dizon nou swiv nou listwar lepase pour komanse Mr Speaker.

Ler nou pe get dan lepase, i annan bokou nou bann paran, nou bann gran

paran, ki'n pran bann pozisyon kle dan lasosyete, san vreman ki zot in ganny en sertifika kalifikasyon.

Me selman par leksperyans, avek senserite e devosyon dan zot travay, in ed zot pour zot kapab avans devan. Rezon mon dir sa, i pa ki mon pe dekouraz nou bann zanfan, ou nou popilasyon pour vin pli byen akademikman, entelektyelman vin pli entelizan, me i plizoumwen montre poudir nou bezwen osi rekonnèt zabitàn ki fer zefor; ki petet zot pa doue lo kot entelektyelman, me selman zot kapab delivre si zot vreman annan lentere dan zot travay.

E Onorab ki'n koz avan mwan parey Onorab Bastienne in nonm enn de. So an bref Mr Speaker ler nou pe get nou menm nou *MNA*, eski nou *MNA* i annan en lekol ki nou ale pour nou aprann pour vin en *MNA*? Non. Me selman avek lentere avek devosyon nou aprann sa travay, e finalman nou pour kapab delivre sa responsabilite ki nou'n gannyen.

Menm ler nou pe get bann Minis, si nou kapab dir petet zot teknisyen me ler nou pe get lo kote Prezidan, li menm li eski i annan en lekol kot i montre ou vreman laprezidans? Non. Me solman i annan serten letid ki zot pran,

me ki ed zot, ki *groom* zot, ki zot kapab delivre.

Ler nou pe get plizyer bann lezot, bann *building* ki'n ganny konstrir dan nou pei li menm li, parey nou pe get *Domus* nou pe get Legliz Baie Lazare, la mon pe koz bann mason, bann sarpantye. Eski zot al lekol? Non.

Me solman zot in kapab kontribye dan lekonomi e zot in kapab ede pour fer nou pei avans pli devan. So dan sa lespri Mr Speaker, parey mon toultan dir nou tou nou'n ne avek en don, Bondye in kree nou avek en don e pour sa nou bezwen kontinyelman rann li glwar.

E nou bezwen rekonnèt ki sak endividi, i ne avek serten don, petet si nou pou al menm lo relizye Mr Speaker ki mwan pa pou al an detay lo la. Me ler nou pe get listwar *Islam* li menm li, si nou pou lir *Quran*. So eski son listwar deryer eski sa dimoun i ti sitan entelizan? So i bann kekyon ki nou kapab poze e demande.

So ler mon pe get sa Mosyon Mr Speaker li menm li, mon vwar poudir sa Mosyon i annan son merit e i pe koz dan lentere bann endividi ki vreman devoue dan zot travay. E mon pran en legzanp lo mwan Mr Speaker ki mon sorti dan en Sekter *Tourism*.

Mon'n travay dan *tourism*, be mon vwar bokou

mon bann koleg travay ki'n vini, avek sertifika sorti aletranze. Me eski par ler ou demande eski sa sertifika ki zot vin avek, i bann sertifika ki *genuine* or petet zot in ganny en sertifika par la?

Me solman zot pe fer, zot pe fer sa travay ki merite. E konpare avek nou bann Seselwa ki'n dan sa bann pozisyon pour plizyer lannen, me zot pa pe ganny rekonnet parey loter Mosyon in dir.

Senpleman rezon nou dir li *ok* pa kapab donn ou en promosyon *F and F&B manager* oubyen *F&B supervisor* or nenport ki departman dan *tourism*, senpleman aköz zot napa en sertifika.

Eski ou ekspekte en dimoun petet ki'n ariv dan son 45an ki annan li en 20an leksperyans i pour retourn lo en sez lekol pour li al aprann; pour li ganny en sertifika. Kan sa responsabilite ki i annan e sa devosyon ki i pe mete dan son travay i bokou pli alaoter ki sa senp endividi - *well* pa vreman senp, me plito petet sa endividi ki li in *study hard* lekol, me selman i annan en sertifika. I annan kalifikasyon me selman petet i mank sa leksperyans.

So ler mon pe get sa Mosyon Mr Speaker, i pe plizoumwèn met en balans ant leksperyans ki en dimoun i

annan dan en travay, ensi byen ki entelektyelman.

So i montre ou poudir ou nou bezwen rekonnet, rekonnet en endividi dapre son kapabilite e son konpetans dan en louvraz. Osi annou pa zis get sertifika. Me byensir nou pour bezwen kontinyen ankouraz nou bann etidyan, nou Seselwa pour vin bokou pli edike, pour pa get ledikasyon koman enferyer. Aköz ledikasyon i en keksoz ki vreman, i pour toultan reste esansyel e enportan dan devlopman en Nasyon, en pei li menm li an zeneral.

So Mr Speaker parey mon'n dir, mwan mon pour donn sipor sa Mosyon. E i plizoumwèn pour mwan rekonnet bann zabitan. E parey dan mon distrik, la mon poudir bann etidyan, parey mon toultan kontan ankouraz zot. Dizon poudir zot pa doue akademikman me pa perdi lespwar, pa perdi lespwar me fer sa ki ou konnen ou kapab fer li byen, ki ou kapab devlop li, dan en fason pozitiv, ki demen ou kapab anmenn, ou kapab anmenn dipen lo latap pour ou zanfan, pour ou fanmir e devlopman ou pei an zeneral.

So Mr Speaker avek sa de mo, mon pour donn mon sipor sa Mosyon. E mon poudir mon bann Manm, bann lezot koleg Onorab, pour get petet sa

Mosyon dan sa loptik ki mon pe vwar li. So avek sa de mo Mr Speaker mon pour donn sipor sa Mosyon. Mersi.

MR SPEAKER

Mersi Onorab. Laparol Onorab Sandy Arissol.

HON SANDY ARISSOL

Mersi Mr Speaker. Bonn apre midi tou dimoun ki a lekout. Mr Speaker Mosyon Onorab Richard Labrosse pe demann en keksoz avek Gouvernman. Mon rapel letan nou ti ankor bokou pli zenn, nou tou ki ganny enn pti leksperyans pour al aprann *drive*, e letan nou fini ganny nou *license* nou tou nou eksite.

Me souvandfwa letan nou pe al rod en loto kot en lazans *car hire premye* keksoz ki zot demann ou se ou bezwen annan leksperyans 3an,2an avan zot lwe ou zot transpor. So sa deza i montre ou poudir leksperyans i zwe en rol.

Dezyenmman parfwa dan bann lavertisman lanplwa, ou vwar poudir i annan bann pozisyon ki ganny *advertise*, me i osi souvandfwa i demann ou serten kalifikasyon. E osi i demann ou serten leksperyans dan sa pozisyon, pour ou kapab *apply* pour sa pos travay.

So deza ankor enn fwa dezyenmman ou montre ou

poudir leksperyans, touzour i zwe en rol. Me granmoun li i dir avek ou poudir i annan de keksoz dan lavi, i annan ledikasyon, apre i annan lentelizans.

I annan dimoun ki annan sa baz ledikasyon, me i pa neserman annan sa bout lentelizans, me i annan dimoun ki annan lentelizans me pa neserman annan sa baz ledikasyon kot i annan li son sertifika, son bann *PhD*, son degre parey nou dir.

Me nou tou nou a rapel poudir dan bann letan lontan dan letan pli ansyen letan nou ti ankor zanfan, letan nou ti a pe grandi. Souvandfwa nou ti ganny dir par bann dimoun aze, oubyen tande dan bann konversasyon poudir souvandfwa dan lakour ti annan en gran frer, ki ti bezwen aret lekol zisteman pour li al travay pour soutenir lezot pti frer, lezot pti ser dan lakour.

Oubyen menm son paran, si papa oubyen manman ti'n mor li koman sa gran frer, oubyen sa gran frer ki ti bezwen aret lekol obligatwarman, pour li kapab al travay pour soutenir lafanmir avek bann depans ki zot ti annan.

Letan in fer sa, ozordi dan nou pei nou vwar en kantite nou bann Seselwa ki zot in *end up* dan en travay,

dan en lanplwa pour plizyer lannen, parske in komans sa depi boner, byen zenn parske ti bezwen soutenir son pti frer, son pti ser e lezot manm lafanmir.

Alor letan mon pe get - mon pe swiv Mosyon Onorab Richard Labrosse, i pe fer referans avek bann dimoun ki'n dan lanplwa pour plizyer lannen. Bann dimoun ki'n annan leksperyans travay pour plizyer lannen.

E mon asire nou tou ki pe asize la dan nou mazinasyon, nou annan dimoun dan nou distrik, nou annan en manm fanmir ki nou konnen, i annan en vwazen ki nou byen avek, oubyen kek dimoun ki nou okouran ki'n dan en profesyon pour plizyer lannen.

In annan son leksperyans travay e in menm annan bann zenn ki'n vini, ki'n aprann travay avek li, ki ozordi sa bann zot, zot in pli kalifye. Zot in swiv lezot kour, e zot in ganny serten leksperyans e zot in menm ganny serten sertifika konpare kekfwa avek sa enn ki la pour plizyer lannen.

Alor Mosyon pe demann Gouvernman pour asire. Si i pe demann Gouvernman pour asire. Savedir i pe demann avek Gouvernman pour fer sir poudir tyek byen, verifye ki ledikasyon tersyer ki Seselwa i gannyen, oubyen pey dan zot

pos ensi ki leksperyans travay ki dimoun i annan, i ganny rekonnèt par lotorite nesese.

I deza annan en lotorite nesese ki pe *deal* ek sa bann size. Me Mosyon pe demann Gouvernman pour asire. Si i pe demann Gouvernman pour asire, savedir i pe demann Gouvernman pour asire tyek sa lotorite nesese, pour asire ki sa ki Mosyon pe demande i ganny fer.

Parske souvandfwa, kantmenm nou annan bann lotorite dan bann pei, i annan bann pti mankman. I annan bann sape parfwa kot ou tande poudir be li i pa'n gannyen. Sa enn pa'n okouran, parske se bann imen, dimoun ki travay laba.

Mosyon pe demann lotorite nesese par landrwa travay piblik, ensi ki dan prive. Parske parey mon'n dir pa nesese man zis bann dimoun ki travay dan Gouvernman ki annan leksperyans, pa nesese man annan bann bagaz ledikasyon, akademik, me osi dan prive souvandfwa nou vwar.

Par egzanp si ou al kot *SEYPEC*, ler nou ti al kot *SEYPEC* i annan dimoun kot *SEYPEC* ki'n la pour plizyer lannen. 30an servis, 32an servis. Me i pa nesese man ki li i annan menm kalifikasyon, oubyen menm sertifika avek sa enn ki fek antre.

Me tousala i montre poudir pa zis dan piblik me osi dan prive. E Mosyon i kontinyen ki ava ede dan plasman travayer ensi ki promosyon, i a fer ki sa lotorite li i ava pe fer le nesese. E Gouvernman pe asire ki sa lotorite, pe fer le nesese pour ki bann travayer ki annan sa leksperyans, menm si zot napa avek zot ledikasyon tersyer ki zot in gannyen. Menm si zot in pey dan zot pos, pour ki zot ganny plase dan bann plasman nesese.

Akoz letan ou ganny plase dan bann plasman nesese, i osi vin avek sa promosyon, ki Mosyon pe demande. E nou tou nou konnen, ler i vin promosyon i annan en baz finansman ki vin avek.

E mon krwar poudir si Onorab Richard pe rod sa pour bann travayer e pe demann lotorite konsernen enkli Gouvernman pe asire, mon krwar i en Mosyon ki mon pour siporte. Parske nou tou nou kontan letan tou dimoun i ganny son *dues in regard to* son benefis, son sakrifis ki in fer, son ledikasyon ki i annan, son leksperyans travay ki vin avek; nou tou dan Lasanble nou pour kontan ki sa travayer i ganny tou son benefis e i ganny plase dan sa plasman ki nesese.

Me an menm tan, parey nou tou nou kontan fer dan Lasanble Nasyonal, nou kontan ankouraz tou nou bann, nou bann dimoun, tou travayer pour delivre, donn tou sa ki zot annan; travay dir, pour prodiksyon pei an menm tan pour zot osi kapab ganny tou benefis ki en travayer i devret gannyen depandan landrwa travay kot zot ete.

Alor Mr Speaker letan nou lo sa Mosyon ki Onorab Richard in anmennen, mon krwar i enportan pour nou kontinyen ankouraz bann dimoun, ki pe fer le nesese. Sirtou ozordi, partou kot ou ale demann ou enn pti sertifikata, oubyen i annan sa ki nou apel *on the job training*, kot bann dimoun i ganny anvoy-e bann pti *course* parey nou apel sa pandan ler travay, oubyen apre ler travay.

Kot Lasanble osi mon aprann i annan plizyer ki ganny sans sa posibilite.

E sa i fer ki apre parey nou dir i vin avek bann lezot keksoz ki vin avek parey Mosyon pe demande. Be dan sa ka mwan mon ti a profite pour mwan dir, pour mwan felisit tou bann travayer ki pe sey zot mye, ki'n antre san en bagaz par egzamp, me ki pe rod lezot bagaz pour siport li dan sa travay ki i pe fer, pour ki i a vin ek sa promosyon, i a vin ek sa bout finansman.

E ki i a ganny rekonnèt par sa lotorite nesese e an menm tan pour Gouvernman asire ki li osi i ganny sa plasman ek tou bann benefis ki vini.

Mon ti a kontan osi profite e lans en lapel avek bann zenn; bann zenn ki pe ekout nou deor, bann zenn ki pe swiv, parske mon santi poudir letan nou vir vire dan pei, i annan en kantite zenn ozordi ki pa neserman dan en lanplwa.

Nou annan plizyer bann lakour ozordi - letan nou pe koz lo travayer, nou pe koz lo bann dimoun ki annan bokou leksperyans travay nou pe koz plizyer lannen, mon santi Mr Speaker poudir i annan plizyer lakour ozordi kot nou annan detrwa gran fiy, gran garson, ki zis la pa pe fer nanryen.

Ki letan sa manman oubyen sa papa ki'n donn son letan dan en plas travay, avek tou sa leksperyans pandan plizyer lannen, be li ler i al travay, apre tou sa lannen travay lo son latet, *still* i annan de adilt ki reste deryer, ki pa pe fer nanryen, ki pa pe kontribye; e ki pa pe anmenn okenn rannman dan lakour pour ede osi avek sa demars ki bann fanmir i bezwen.

So lo sa Mosyon mon profite pour mwan ankouraz tou bann zenn ki pe ekout nou, pour zot osi vin devan

dan en karyer. Bann zenn kekfwa ki'n arete lekol boner, pour zot rod bann letid kontinyel. Parey nou pe dir bann ledikasyon teryer, ki ava ed ou dan sa demars pour ki ou osi letan ou ava antre dan en plas travay, ou ava kapab ganny bann letap nesese, atraver sa lotorite nesese ki Mosyon pe koz lo la ki deza egziste; pour zisteman kapab asire ki tou bann demars ki en travayer i bezwen dan son lavi pour li ganny sa promosyon, plasman promosyon e pour li ganny son bann benefis i ava atase avek.

Mon krwar Mr Speaker a mon avi i en bon Mosyon, ki Onorab Richard Labrosse in anmennen e pe siport travayer, pe rod tou bann benefis ki devret vin avek. An menm tan i pe demann Gouvernman pour asire. E pe demann lotorite nesese pour verifie, pour fer sir ki tou bann travayer ki dan lanplwa, menm avek bokou leksperyans, menm ki napa sa bagaz, me i annan bann ki pe rod zot bagaz, pour zot kontinyen fer le nesese; pour ki zot ganny tou lasistans ki Gouvernman i kapab donn zot, enkli sa lotorite nesese ki la pour asire ki tou sa bann keksoz i ganny - i tonm an plas parey Mosyon pe demande.

So avek sa detrwa pti mo Mr Speaker, mon ava aport

siport pour Onorab Richard Labrosse avek son Mosyon. E mon demann tou bann Manm poudir enn pti keksoz an sipor lo la. E osi kapab siport sa Mosyon. Parske i pe adres bann travayer ki nou annan dan nou pei. E parey nou pe dir bann travayer ki pa neserman fek antre dan travay, me bann travayer avek bokou leksperyans ki'n la pour plizyer lannen e ki'n kontribye dan lekonomi pei. Avek sa detrwa mo mon ti a kontan remerisi ou Mr Speaker.

MR SPEAKER

Mersi Onorab. Mon aprezan donn laparol Onorab Egbert Aglae.

HON EGBERT AGLAE

Mersi Mr Speaker. Bonn apre midi tou Manm Onorab e tou dimoun ki a lekout. Mr Speaker Mosyon ki devan nou, pe tret en size ase enportan e osi mon krwar i enportan pour nou aport serten refleksyon kot i konsern nou bann kad travay. E osi *availability* sa *pool of* travayer ki nou annan dan pei, e osi sa *pool of job seekers* ki annan, avek bi pour osi kapab anmenn lankourazman pour dimoun reste dan lanplwa, bann travayer reste dan lanplwa.

E osi pour bann ki pe resers en lanplwa, vwar en loportinite laklerte e valer ki

pei li menm li pour atas avek kot i konsern tou travayer Seselwa. Mon krwar sa, sa i enportan.

Me pour nou kapab ariv la ozordi e demen, mon krwar osi nou bezwen regard osi kwa ki lo latav ki pe ganny ofer pour bann travayer kontinyen progrese, sa ki nou apel zot *career development* ouswa zot *career path*.

E ozordi nivo ki ledikasyon in arive e nivo loportinite pour dimoun en travayer, ouswa enn ki pe aspire pour antre dan lemonn travay ganny li en kalifikasyon, bann bagaz, bann nivo i la e bann loportinite i la.

So avek sa mon krwar i enportan ki nou pa get zis dan en kote, pirman akademik, me solman nou bezwen osi regard bann ki'n la, ki'n long term, me ki napa neserman sa diplom, sa sertifika avanse, sa degre iniversiter ki parfwa bann travay i demande. Sa bann letan ou vwar bann avertisman i ganny fer pour dan *vacancy*.

So de si de la, nou konnen poudir i annan en group travayer ki'n *for so long* in la, se sa ki nou dayer nou Gouvernman ti met sa ki nou apel en *long service allowance*, e pour an kad lankourazman pour bann travayer ki'n dan

servis piblik *for so many years, ok?*

E bokou sa bann travayer, tanzantan nou vwar bann seremoni kot nou pe – bokou departman menm prive osi i fer sa konmela, pour rekonnet bann *long service*, bann ki'n fer 30an, 40 e menm i annan ki pe fer apepre 50an dan servis.

I fer ou reflesir poudir zot pa ti komans, bokou pa'n komans avek en degre. Bokou in antre lo en travay kot in devlope, avek leksperyans. E an menm tan zot in ganny loportinite pour zot swiv bann diferan kour ki ti annan dispozisyon sirtou dan servis piblik.

E osi nou rekonnet ki bokou ozordi in ariv lo en o nivo dan departman. Sa ki'n direkter, sa ki'n vin *PS*, sa ki'n vin *CEO*, e parfwa si ou fer enn pti letour ou demann serten, baze lo enn pti *interview* kote i ti komanse? Ou vwar poudir, i dir ou, “ Be mon ti kit lekol avan mon ti ariv politeknik ouswa ler mon ti politeknik mon ti kit lekol”.

E la in monte, in monte, in monte in ariv zistans ozordi ki ou'n vwar poudir i dan en pozisyon ase eleve.

So sa i enn bann form osi ki mon krwar ki nou rekonnet, poudir malgre i napa sa kalifikasyon akademik ki nou pe demande, ki i pa'n swiv

bann kour pour li ganny bann kalifikasyon avanse. In aprann dan travay. E in ariv li, in akimil li sitan leksperyans ki dayer letan ou vwar bann *job vacancies* pe ganny *advert*, i demann ou degre, avek en poursantaz leksperyans.

Ouswa i demann ou en bon pe lannen leksperyans parey i annan ki dir ou, fodre ou annan 5an leksperyans, ouswa 10an leksperyans dan sa *related fields*.

I annan ki dir ou swa ou pour bezwen annan *diploma*, avek en porsyon leksperyans sepa 5an leksperyans. So mon krwar i sa en pe bann keksoz ki nou regarde.

Me selman nou osi nou konpran poudir, i annan en group travayer ki zot, zot in tonm dan en lot kad mon kapab dir. E sa i normal sa, akoz pa tou dimoun ki pour swiv, ouswa ki pour kapab pe swiv sa kour kot ou fini, ou al fer ou degre, ou al fer apre la ou retourn dan travay.

Be i annan ki'n vwar li dan serten sirkonstans lavi, i vwar li pa pe kapab kontinyen lekol, i arete i antre dan en lanplwa, e la i devlope e i annan bokou ki'n vreman mon kapab dir in *succeed* dan sa ki zot, zot pe fer, malgre zot pa'n fini sa formasyon skoler ki zot, zot ti a swete pe fini. E zot pe fer byen.

So sa i en lot kad ki nou merit regard ladan. E baze lo sa, sa ki Mosyon pe demande, kot i konsern SQA, prezan ki petet ki formil ki ava ganny servi pour kapab dan en fason nou dir transfer sa leksperyans ki li i annan, ki ava transfer li koman en sertifika, avanse ouswa lo en nivo, diplom dan en sans - mon pa konnen - nou kapab met li ki mannyer ou pour transfer sa aköz i *assumptions knowledge* la.

So sa osi nou bezwen vwar aköz i annan en bon pe, mon kapab dir, nou bann zenn ozordi ki pe lekol, ki pa pour sanse avek bann pour *meet* kriter, pour bann ki pli akademik pli bon. Sa bann ki akademik pli bon zot pour persyade, zot pour ariv lo nivo iniversiter zot.

Me selman ou pour annan sa group li menm li ki dir be mwan, mon en dimoun ki pratik, mon ti a kontan petet ler mon ariv S5 antre dan en lanplwa kot mon pour *learn* sa leksperyans koman en *skilled labour*.

An menm tan, mon ava swiv bann lezot pti kour ki ava loportinite ki sa departman ki swa prive ouswa dan servis piblik i ava ofer pour nou avanse.

E sa mon konnen poudir ti annan en program ki Gouvernman ti met an plas.

Kot i ankor egziste, bann *skill*, sa *skill acquired Scheme* ki ti la, kot bann *school leavers*, *early school leavers* ti ganny sa sans, ouswa bann ki pa'n kalifye pour swiv pos-segonder.

Akoz zot performans enn pti pe pli feb, e zot ti ganny lo sa *Scheme* pour zot kapab rantre dan en lanplwa an menm tan sa bout, i annan en bout kot zot swiv serten kour akademik.

So tousala i bann *avenues* ki kapab ganny eksplore e i merit kontinyen e resours i bezwen ganny merite. Aköz nou pa pour kapab ekspekte, tou sa ki fini i pour kapab al attend en lenstitisyon pos-segonder. E tou sa ki fini pour kapab kalifye pou en letid liniversite pour ganny en labours pour li kapab ganny en doktora pli tar, pour li ganny son *PhD*, e lot, lot. So sa osi nou bezwen mazin byen.

En lot pwen ki mon ti a kontan - kot konsern SQA, *ok*. Dan lepase nou annan serten konsern ki'n atase e i ankor la ozordi, lo kote rekognisyon en pe nou bann sertifika ki ganny *train* lokalman.

Sa osi in poz serten, serten defayans osi serten petet mekontantman parmi serten dimoun, ki ler mon'n fini i dir ou poudir be mwan mon'n swiv lan en kour

sertifika, ouswa 2an, ou vwar ou dan en sityasyon kot ou pa ganny rekonnet sa sertifika, ouswa ou pa kapab al pli lwen avek sa sertifika ki'n donn ou. So sa osi nou bezwen revwar.

Mon konpran poudir in annan bann *MOUs* avek bann lenstitisyon enternasyonal parfwa ki rekonnet sa bann kalifikasyon pour fer ki si zanmen i annan bann lezot loportinite ayer, sa bann group dimoun ki tonm dan sa kategori zot kapab pourswiv e zot sertifika i ganny rekonnet.

Mon konnen *MITC* i annan en Lakor, sirtou avek *Sri Lanka* mon pa konnen si i ankor la. Zot osi zot *involve*. Be mon ti a kontan petet lezot lenstitisyon osi i sey devlop en kiltir dan sa laliny pour annan sa bann partenarya, ki a fer ki bann lezot, lezot aspiran ki tonm dan sa kategori, zot kapab pas sa formasyon i ganny rekonnet atraver *SQA*.

E si fodre ganny bann leksperyans ekspeze deor zot kapab fer li. Enn pti pe parey dan *tourism establishment* ozordi Mr Speaker. *SHTA* ozordi avan tou bann formasyon ki ti pe ganny fer, ti zis lo en baz lokal. Ozordi nou'n annan nou en partenarya, *MOU* avek *Shannon College* ki fer ki nou bann etidyan i kapab pourswiv en degre pli avanse atraver *Shannon College*, pour zot

kapab kontiny zot parkour dan *tourism*, lo bann nivo *management*, avek bi a lavenir ranplas bann *management* etranze ki la.

So i annan bann zefor ki'n ganny fer, me kwa ki nou kapab fer plis? Eski nou merit annan petet plis bann *training* a dispozisyon pour *train* dimoun? Me selman pour *train* dimoun nou bezwen annan bann *trainers* li menm, bann ki kapab, ki kalite siport teknik nou kapab gannye avek bann lezot lorganizasyon, pour sey ankadre sirtou bann departman Gouvernman?

Akoz nou koz bokou lo servis *delivery*. I annan en kantite defayans ozordi. I annan mankman travayer, eski nou pa kapab vwar, letan nou pe get sa *pool* travayer lekel bann ki nou santi i annan kapasite, pour os son nivo e ki pe donner pour pous li pli o, e fer bann ki pli anba osi monte ariv lo en pli o nivo?

Tousala i bann refleksyon mon krwar ki koman en pei ki anvi vwar en lafors travayer Seselwa efikas, dan plas ki zis etranze pe vini, ki zot, zot pe soumet zot laplikasyon our vwar, ler ou gete enn ler kantite degre ki zot annan enn ler, ou dir be ke ler zot ti ganny letan pour fini tou sa bann degre lekol a en tre zenn az?

Tandis ki nou lo nou kote Seselwa, ou vwar poudir i annan serten defayans, enn ler mon pa pe kestyonn lentegrite zot bann sertifika, zot bann kalifikasyon, me selman i annan kestyon ki ou bezwen poze parfwa ler ou get serten sa bann kalifikasyon.

So avek sa Mr Speaker mwan mon krwar poudir i annan en loportinite atraver sa Mosyon pour nou regard fason ki nou pran serten sa bann kad travayer, pour gard zot avek lespri gard zot, pour zot kontinyen travay, zot osi zot a vin bann *long service* travayer. E an menm tan rod tou, sey fason pour sey pous zot dan bann direksyon ki zot kapab ganny bann le neserer bagaz pour zot kapab.

Akoz leksperyans ou vwar i annan dimoun ki'n travay koman, in antre koman en senp *cleaner*, in *mont front office*, in vin *supervisor*, ozordi in vin parey en *manager* en *line managers*.

So i annan bann loportinite la, so annou regard enn pti gin ladan ki mannyer nou kontinyen pouse, dan plas nou zis pour rod etranze, avek bi ranplas zot. Mersi.

MR SPEAKER

Mersi Onorab.

(APPLAUSE)

MR SPEAKER

Mon a donn laparol Onorab John Hoareau.

HON JOHN HOAREAU

Mersi Mr Speaker. Bonn apre midi tou dimoun ki a lekout. Mr Speaker mon pour komanse par dir ki, leksperyans i en pli gran liniversite dan lavi li menm. I annan bokou fwa ki leksperyans en dimoun, atraver son bann traze dan lavi, i fer ki sa dimoun, i kapab akimil en kantite bagaz pour li delivre serten travay.

E mon rapel byen, dan en diskour ki en profeser ki apel *Ronaldo Sultana* ti fer, dan en – dan son *keynote address* pour en zour konferans bann *teachers*. I ti dir koumsa poudir, “i napa en *straight jacket* ki ou kapab fer pour anmas lekspertiz en dimoun ladan. Me selman i annan senpleman de, petet en trwazyenm semen dan lavi. Premye se lekol e dezyenm se atraver leksperyans, e trwazyenm petet se en melanz ant sa de.”

I dir ou koumsa poudir ou bezwen annan en sistenm ledikasyon ki perfore, vedit ki annan trou i pa kapab en *straight jacket*. E sa bann trou, i bezwen la pour kapab anmas bann ki pa al dan sistenm akademik direkteman.

E se sa ki pour fer ou kapab valoriz kapasite ou dimoun, si oule sa ki nou apel nou '*potential human dividend*'. Sa ki en dimoun, sa ki nou pep, koman en pep i anmennen *towards* devlopman son pei.

Mr Speaker, ler nou get par egzantp SQA ki en lenstiti kle, dan ledikasyon ki *recognize* si oule rekoniz *prior learning*. So *formal acknowledgement* pour *knowledge and skills*, ou bann ekspertiz, ou bann kapasite, en dimoun ki i kapab gannyen, atraver *non-formal education*, i kapab ganny valorize. I kapab ganny met an konteks, i kapab ganny en sertifika pour sa atraver SQA.

E si nou a rapel byen, poudir dan sa Lasanble, nou'n deza ratifye Konvansyon ki apel *Addis Convention*, lo en *Educational Treaty* ki 55 pei Lafrik in sinyen.

E sa ti donn nesans si oule pour nou fer sa demars ver *recognition of prior learning*. E parey mon'n dir Mr Speaker, la baz sa Mosyon ki loter Mosyon in anmennen, se pour donn dimoun, ki'n antre dan travay lo en baz petet *Apprentice Scheme*; e ozordi nou vwar ki dan lanplwa i annan *Apprentice Scheme* ki Minister Lanplwa in met anmars, pour kapab senpleman donn serten *skill*

de baz, serten dimoun pour zot kapab antre dan travay.

E a lafen dizour ler pli ale zot akimil leksperyans, i bezwen annan en mekanizm, en sistenm ki an plas e byennantandi, i deza egziste atraver SQA, pour kapab valoriz sa bann *skill* ki sa bann dimoun in *attain*.

Alor se sa lenportans sa Mosyon, se pour fer sir ki sa bann dimoun, ki ti petet antre avek serten konesans, *as ki'n go along*, in akimil bokou leksperyans e son leksperyans i ganny valorize dan son travay.

E dezyenmman, se pour kree loportinite pour bann travayer monte an term progresyon, e devlopman karyer pour zot kapab ganny en pe plis reminerasyon pour zot anmenn larzan se zot.

Alor sa Mosyon li menm Mr Speaker, i enn ki ou kapab dir, ki pe kontiny sa deba, ki pe kontiny sa diskisyon, sa konversasyon pour fer sir ki Leta li menm, i kontinyen rekonnet bann *skills*, bann kapasite, ki bann dimoun i *attain* atraver leksperyans dan zot travay.

Parey in ganny dir avan poudir i kout en pe ser, me mon kapab konpran akoz i kout en pe ser. Petet i annan bokou keksoz ki nou pa konnen ki *happen behind the scene*, ler en dimoun i al kot

SQA e i demann pour *recognize* son *prior learning*.

I annan bokou resers ki sa bann zofisye li menm i bezwen fer, pour fer sir zot rode ki kantite *skill*, ki kalite konpetans sa dimoun i annan, oubyen ki'n kapab *mastered*.

Zot bezwen osi fer serten travay kot zot bezwen gete ki sa bann *skill* li menm sa *set of skills* ki sa dimoun i sipoze annan? Ki mannyer zot kapab *asses* li e donn en sertifika ki valid.

Akoz i pa aköz i pa zis koman ou al laba kot SQA ou dir ou annan *skills lo x and y and z* ki zis ou vini ou ganny en sertifika demen. I bezwen *assess* ou e tousala i annan en prosedir ki i pas atraver.

E osi nou bezwen rekonnet ki ler i fini fer sa, i bezwen kapab plas ou an term ki nivo ou ete dan *National Qualification Framework*. E sa *framework* set en *framework* ki dir ou sepa ou leksperyans i vo en sertifika, oubyen i vo en diplom, oubyen i vo en degre, oubyen en nenport kwa.

So i annan tou sa bann resers pour li fer e tou sa bann travay ki zot bezwen etabli. Alor, menm si i kout enn pti pe larzan, e i bann keksoz ki i bezwen ganny fer, bann travay ki bezwen ganny fer par SQA e sa i kout letan imen osi.

Mr Speaker nou bezwen konnen osi *or* oubyen

rekonnet ki i annan bokou dimoun i fer sa ki nou apel *distance learning*, oubyen zot fer sa ki nou apel *open university learning*. E la kot zot sivre serten program ki pa ganny fer isi Sesel, me ki ganny fer deor, aletranze. Me selman zot, zot sivre li isi *online*, swa *online*, swa atraver serten dokiman liv, oubyen bann lezot dokiman ki zot gannyen pour zot kapab travay lo la.

Me ler zot pas atraver sa, a lafen dizour, zot ganny en sertifika avek sa lorganizasyon ki'n donn zot sa bann leksperyans, oubyen sa bann kalite laprantisaz.

Me ler i donn zot sa zot bezwen al kot SQA al fer *validate* sa bann keksoz. E sa osi i form parti sa *recognition of prior learning*. I bann *learning* enformel ki ganny *acknowledge*.

Alor Mr Speaker mon poudir sa Mosyon i en Mosyon ki pe demann Gouvernman pour kontinyen fer sa zefor, pour kapab met a laporte, met *accessible* bann program kot en dimoun i kapab al atraver e kapab ganny son konpetans ganny *assess* e ganny en sertifika.

Avek sa Mr Speaker mon krwar poudir bokou dimoun pour benefisye si nou demokratiz sa en pe, e fer li en pti pe pli, enn pti pe pli *obvious*

dan bann lenstitisyon travay partou; kot i ava annan plis dimoun ki kapab si oule kapab akse sa bann program e fer sir ki zot kapab ganny bann sertifika ki nesaser. Avek sa mon pour remersye ou.

(APPLAUSE)

MR SPEAKER

Mersi Onorab. Mon ava apel Onorab Cosgrow.

HON WALLACE COSGROW

Mersi Mr Speaker. Bonn apre midi tou dimoun. Mr Speaker pour en sosyete kapab fonksyonnen dan domenn travay i bezwen annan, i bezwen annan travayer a tou nivo.

I bezwen annan mekanizm, mekanizm ganny met an plas par Gouvernman, pour donn formasyon formel sitwayen, pour zwenn demann marse lanplwa, pour zwenn demann bann diferan prozeksyon ki ganny fer par Gouvernman pour kapab agrandi lekonomi, agrandi marse lanplwa, agrandi kantite dimoun ki pe travay.

Me malgre sa Mr Speaker, i touzour annan en group dimoun dan lasosyete, ki pa nesaserman swiv sa semen or sa mekanizm formel, ki Gouvernman i met an plas

normalman, pour *whatever* rezon, en?

I kapab annan rezon ekonomik, ki zot a en serten laz zot bezwen *exit* pour al ed lafanmir, or i kapab annan serten rezon kot zot in tonm akote semen. Me a longer ditan ler zot travay, zot anmas, zot anmas serten *skill*, serten abilite dan travay. E a longer ditan zot perfeksyonn sa travay ki zot pe fer, zot vin pli byen, e pli byen.

E zot fer sa louvraz, zot delivre sa louvraz parey i devret pe ganny delivre. Alors Mr Speaker letan nou dir sa koumsa nou bezwen realize poudir si nou annan en sistenm formel ledikasyon kot nou *train* dimoun, dan *whatever* domenn e nou aksepte osi ki nou annan en sistenm si oule met li enformel, kot dimoun i ganny akimil leksperyans, i akimil abilite ek leksperyans.

E tou lede i *operate* lo en marse lanplwa, lo en, dan en lekonomi dan en sosyete, e ki tou lede pe delivre sa ki zot sipoze kapab delivre, alors nou devret kapab get tou lede avek en menm lizye e pa favoriz enn ouswa lot.

Avek sa lentrodiksyon Mr Speaker mon krwar i enportan ki nou get byen Mosyon, Mosyon Onorab en? Si mwan mon pe konpran li byen i annan de parti dan sa Mosyon

ki mwan mon'n idantifye Mr Speaker.

Premye parti i rekonnet kalifikasyon ledikasyon tersyer, e dezyenm parti i rekonnet leksperyans travay. So enn pti pe sa ki mon'n sey fer dan mon lentrodiksyon.

E tou lede i avek bi sa dimoun i al lekoul ouswa i al aprann dan landrwa travay, son bi se pour li ganny en travay, pour li kapab ganny promosyon, ouswa kapab bouze *from* sekter-*to*-sekter e osi pour li ganny en reminerasyon. *Ok?* Swa en bon saler, swa en logmantasyon, me i fer sa avek sa bann bi.

Now si nou dakor Mr Speaker ki sa i leka, *then* sa de pwen i lozik pour mwan. A mon pwennvi Mr Speaker avek tou respe, ki mon annan pour Mosyon Onorab, mon santi ki i pa'n etal sa. Malgre mon konpran son Mosyon, mon santi ki dan son lentrodiksyon i enn pti pe *all over the place* parey Angle i dir e pa'n etal sa byen spesifik pour nou kapab, pour donn nou direksyon ki manner nou bouz, nou debat lo son Mosyon, en?

E si nou pran sa pwen kalifikasyon - pardon ledikasyon tersyer pour mwan i vedir, pour mwan i vedir liniversiter. Me Onorab in koz bokou plis lo bann kalifikasyon pos-segonder, i

ok si nou kapab azout sa ansanm *professional qualifications*, diploma, me selman pour mwan - letan nou koze plizoumwen tersyer i vedir liniversiter. Me solman i ganny enkorpoze koman diploma koman bann *advance diploma* e tou sa.

So i annan en mekanizm ozordi, i annan lenstitisyon en mekanizm ki'n ganny etabli, ki vwar tousala. So pour mwan sa i en lankadremman ki'n fini ofisyel ki fini la, e sa se SQA.

SQA ler en dimoun pour vin avek son sertifika, okenn anplwayer ki annan dout sertifika, ouswa anplwayer ki anvi *doublecheck* sertifika, *or* sa konpetans sa dimoun, zot kapab apros SQA, e sa pour mwan i *straight forward* e i sipoze *ok*.

E si sa dimoun in al ganny son sertifika dan en landrwa kot petet napa serten rekognisyon, SQA i ava dir nou, i ava dir sa anplwayer e sa dimoun li i pa pour kapab blanm son anplwayer ouswa SQA, akoz i annan en *set* standar ki'n ganny etabli pour mezir sa bann zafer.

Me mon krwar kot ki keksoz ki pli enportan, se lo sa group dimoun, ouswa kategori dimoun ki napa sa kalifikasyon formel tersyer, ki ganny rekonnet, se sa kot problem - well pa problem me sa kot difikilte i vini, pour

nou kapab rekonnet abilite or sa bann leksperyans ki zot in anmase, pour nou kapab rekonnet, *quantify* li or met li dan en mekanizm e dir i vo tan kantite.

Or i ekivalan menm nivo avek sa enn ki al lekòl 4an, 5an pour li kapab ganny sa sertifika. E mon krwar se sa rezon akòz SQA ti vin avek sa propozisyon, sa konsepsyon *recognition of prior learning*. Dayer i pa en konsepsyon zis Sesel i en konsepsyon ki menm ganny rekonnet atavèr lemonn. E menm ILO, Lòrganizasyon Mondyal pour Travay i rekonnet *recognition of prior learning*, koman en filyèr kot bann lòrganizasyon parey SQA, i antre ladan, pour kapab donn lòpòrtinite osi ganny travay, ganny promosyon e osi ganny lògmantasyon avek en bon saler, bann dimoun ki pa'n pas dan en sistèm formel.

Now akòz sa i enportan pour nou Mr Speaker? E mon krwar Mosyon Onorab Labrosse i annan son merit. Akòz mon krwar sa i enportan Mr Speaker? Si nou al en pe *over the years* Sesel, nou komans avek par egzànpsyon bann *Scheme* par egzànpsyon URS, ok.

Nou Gouvernman letan ti la nou'n met en kantite bann *Schemes*, ou ankadre bann zenn, ou ankadre bann dimoun ki'n, ki'n petet pa'n

swiv *all along* sa sistèm akademik parey ti'n ganny *set up*.

I annan ki'n parey mon'n dir pour diferan rezon zot in al akote, me in annan landrwa ki'n anmas zot par egzànpsyon URS, par egzànpsyon YES Scheme, par egzànpsyon bann *Apprentice Scheme* ki ozordi dan laform ki i ti ete 10-15-20an pase i ankò aziste, i ankò pe ganny itilize.

Tousala i bann *Scheme* kot nou'n, nou'n ankadre bokou bann zenn, de santenn tou le lannen me ki pa neserman annan en kalifikasyon formel ki vi avek ler zot fini.

Me zot aprann, zot in anmas en kantite - mwan mon konn en kantite dimoun. Mon konn dimoun spesifik, mon pa pour kapab, mon pa le nonm non me selman mon konn en kantite dimoun ki'n anmas leksperyans *over the years*. E ki ozordi pe delivre louvraz menm petet parfwa pli byen ki sa enn ki in al etidye en kantite apre i napa sa leksperyans *on the job*. E zot pe fer en travay fantastik. E zot *at par*, zot menm nivo parfwa pli o parey mon'n dir avek lezot bann ki annan kalifikasyon formel. So i enportan ki nou rekonnet sa.

E Gouvernman Mr Speaker mon pour mwan mon krwar Gouvernman i lakle

ladan. E Gouvernman i bezwen met an plas mekanizm, sa mekanizm *RPL*, me solman i bezwen met an plas mekanizm ki enn – akòz Onorab in dir nou poudir i kot ser. I kout ser 5000, 10mil, Gouvernman i bezwen met an plas en mekanizm pour kapab fasilite sa prose kot bann *skills* abilite dimoun i ganny rekonnet. Sirtou Gouvernman pour bann travayer sekter piblik.

Akòz mon dir sa Mr Speaker? Ozordi Sekter Piblik i annan en kantite sa bann dimoun ki nou'n *train*. I annan ki'n al *SIM*, ki'n al ganny diploma, ki'n ganny en pli *formal recognition*. Me i annan ki pa'n ale.

Me solman zot pe travay, zot pe fer sa louvraz byen normal e letan Gouvernman prezan i fer bann *Scheme of Service*, e *Scheme* in bokou fwa baze lo kalifikasyon formel, sa petet zot pa ganny rekonnet or zot pa neserman fit in dan sa bann *Schemes*.

So si nou kapab Gouvernman organiz en mekanizm ki fer ki sa bann dimoun zot kapab ganny *assess*, zot sityasyon i kapab ganny *assess* pli vit posibil, zot a kapab benefisye osi lo bann *Schemes*.

Zot a kapab ganny sa, sa lot bout parey mon dir en logmantasyon oubyen en

larzan an plis, ki zot merite dayer, zot merite. E i tonm kareman lo Gouvernman pour kapab fer sa.

But at the same time, Gouvernman osi i bezwen kalkile akòz li osi i annan en kantite dimoun ki travay dan Sekter Prive, e petet zot osi zot annan serten demann an term vwar zot nivo e egal li avek en kalifikasyon e servis ki petet Sekter Prive osi i devret kapab pe demande. So Gouvernman bezwen vwar ki mannyer i fer desann sa kou, i fer sa pli vit ki Sekter Prive.

E la i en travay, mon konnen i en travay pa fasil pour *SQA given* resours ki zot annan me i en travay ki neser Mr Speaker. Mr Speaker ler mon pe koz lo Gouvernman la mon bezwen vin lo *Public Service Bureau*.

Ozordi dan *public service*, nou annan en kantite dimoun parey mon'n dir, i annan en kantite leksperyans kalifikasyon. Me ozordi malerezman, i annan en kantite dimoun ki annan sa kalifikasyon sa leksperyans, ki vwar zot a laport, ki pa ganny valorize. Pour ki rezon, bokou nou i *guess*, i annan ki dir rezon politik, i annan ki dir rezon petet zot pa *agree* avek ki sef pe dir.

Me i annan en kantite ozordi ki ganny met akote, ki ganny pous akote, finalman

bezwen sorti dan diferan fason swa, i zwe ek Kontra, swa i esper son Kontra fini. I *advertise* ou post, menm ou pa konnen ou post pe ganny *advertise*, ou vwar lo Nasyon.

So ler nou pe koz lo valoriz servis sa bann dimoun, valoriz zot lekspertiz, ankadre zot leksperyans lekspertiz dan en sistenm, nou bezwen osi get sa. *Public Service Bureau* i bezwen get sa serye e pa la ouswa arive dan lefitir.

Nou get Mr Speaker lo kote *service allowance*; si nou pe koz lo rekonnet *prior learning* bann dimoun, rekonnet zot sertifika, rekonnet zot bann keksoz ki zot annan, bagaz ki zot annan, e nou pe dir ki avek bi pour ganny en travay swa en promosyon, ouswa en reminerasyon an plis, *then long service allowance* ti sa, ti enn sa bann reminerasyon ki ti donn ou, malgre ou ti napa serten sertifika. Me i ti rekonnet ou abilite, ou servis, ou letan servis.

Me malerezman Mr Speaker, ozordi *long service allowance* in ganny *discontinue*. So letan Onorab petet i *sum up*, i bezwen kapab petet fer en prononsman lo la dan son *summing up* e dir nou si i santi, i krwar poudir dan *spirit* son Mosyon si krwar poudir *long service allowance* petet devret ganny re-

entrodwir, rekonnet bann dimoun ki'n travay ki'n kontribye 10an,20an,30an, 40an avek en reminerasyon pour son abilite, pour son abilite ki'n annan ki'n donner.

Letan nou get *Scheme of Service* Mr Speaker, *Scheme of Service* osi parey mon'n dir boner, i relye avek sa zafer bann dimoun ki annan, ki'n anmas leksperyans lekspertiz *over the years*.

Me ozordi zot pa pe *feature* or zot pa pe benefisye as much lo *Scheme of Service* akoz napa en rekaliyman, zot abilite, zot kalifikasyon, or zot leksperyans zot anmase e met li dan en nivo parey sa enn ki annan kalifikasyon papye.

So tousala i en louvraz ki *PSB* ozordi i devret pe gete, pe fer. Mon pa dir en louvraz ki devret vin dizour a landmen, me i en louvraz ki devret, ki devret pe ganny fer e donn lespwar nou bann travayer sirtou dan servis piblik.

Mr Speaker malgre serten rezon dan lafason ki mannyer Mosyon in ganny prezante parey mon'n dir boner mon krwar i annan en serten, serten merit sa Mosyon, Onorab ou annan serten merit ek sa Mosyon, e nou Mr Speaker ler en keksoz i annan merit nou, nou siporte nou, nou koz dan laliny merit sa Mosyon.

Me solman Mr Speaker i malere malgre, malgre nou, nou *extend* sa lanmen, nou pa neserman souvandfwa ganny sa repons ki nou anvi. Mr Speaker bomaten nou pe rod serten leklersisman, mwan mon menm mwan mon pa'n kapab fini demann mon kestyon.

Nou pe sey travay ansanm dan linite, me parfwa sa ki nou *extend* nou pa neserman ganny li *back*. Ok mon sey fer pase mon pwen, mon pa kapab fer pase mon pwen mon ganny koupe. Taler Mr Speaker letan ou'n fer referans lo sa de Mosyon ki ti ganny table, e ou'n dir nou pour vin avek en Mosyon bipartisan, ti dan menm lespri travay ansanm. E nou, nou pare pour travay ansanm dan lespri, dan lespri linite Mr Speaker. Nou pare pour travay ansanm. Me parfwa se zot ki blok nou. Ou konpran?

Se zot ki blok nou Mr Speaker e i malere. Me solman avek sa Mosyon ki la Mr Speaker Onorab Labrosse, mon koleg Plaisance, *MNA* Plaisance, mon pour donn ou sipor akoz i annan serten merit. Sirtou lo sa kote kot nou rekonnèt bann dimoun ki'n travay anmas leksperyans, lekspertiz atraver bann lannen.

So Mr Speaker avek sa de mo mon pour termin la. Me

selman mon krwar *once* ki sa Mosyon i pase si i pase, mon krwar Gouvernman i bezwen fer en travay bokou pli vit dan sa laliny.

Akoz i annan en kantite dimoun ozordi probableman kot Lasanble, dan servis piblik, dan bann departman, dan bann Minister partou ki mon krwar sa zafer pour enteres zot e mwan mon *full* an faver ek sa Mr Speaker. Mersi bokou

MR SPEAKER

Mersi. Mersi Onorab. Mon krwar ariv en moman kot ti a bon pran en poz, pour nou kontinyen apre. Nou a retourn dan Lasanble 4er. Mersi.

(BREAK)

MR SPEAKER

Mon a donn laparol Onorab Michel Roucou.

HON MICHEL ROUCOU

Mersi Mr Speaker. Bonn apre midi a tous. Mr Speaker, mwan osi mon pour partisip dan sa Mosyon anmennen par Onorab Labrosse, akoz mon'n vwar poudir i annan son nesite e i annan son lenportans an term pour ankouraz bann travayer la deor.

Mr Speaker ler mon'n asize mon'n ekoute Mosyon

anmennen par Onorab Labrosse ki ou kapab dir i mon vwazen akoz i *MNA* pour distrik Plaisance. Mon pour donn mon sipor e osi mon pa pour long lo sa Mosyon.

Mr Speaker pa bokou letan pase mon deza dir oparavan se ki mon ganny aproses par lekol Mont Fleuri Segonder pour mwan zwenn avek en group etidyan, ki zot annan serten problem ou kapab dir, problem sosyal e pour donn zot enn pti pe bann lankourazman li menm li.

E dan konversasyon ki mon'n gannyen ek sa group etidyan, laplipar zot ti bann garson, se ki zot osi zot ti annan en rev demen, ler zot pour antre dan en dan lemond travay. Mazorite zot ti anvi zwenn avek *SFRSA as a* en Zofisye fireman.

E ti vwar poudir se ki malgre kot i annan tou sa bann defi ki zot pe rankontre, zot ti annan en plan pour lavenir. E mwan mon panse poudir se ki nou bezwen komans dan lekol pour nou kapab idantifye bann zenn la deor ki petet zot napa sa nivo akademikman, me selman zot anvi vwar zot demen pe ganny plase dan landrwa kot demen, zot menm zot blend dan sa lemond travay.

E ozordi ler ou pa pas dan mazorite landrwa travay, enkli Gouvernman e prive, ou

pour vwar poudir se ki nou annan bokou dimoun la ki pe tenir serten pozisyon akoz zot annan serten leksperyans travay, be selman lo en baz mon kapab dir zot pe *acting*.

E mwan mon konn ende, mon mazin en zenn madanm ki li in donn, in aprofondir plis leksperyans e dan aprofondir plis leksperyans in pous son lekor devan Mr Speaker, kot la in vwar li kot in kapab ganny serten kalifikasyon e menm vwar li ganny propoze pour al serten *course*.

E ki nou vwar poudir ler i tournen, dan plas ki li i pe vwar li pe bouze, i vwar li ganny kit lanmenm, e li aprezan i vin sa dimoun, ki ou kapab dir, i vin en fason pour li *train* bann ki vini aprezan ki pour pas par lao li.

E la nou vwar Mr Speaker, ladan menm i kapab vin en form dekourazman, akoz sa dimoun li menm li apre ki in akimil, sa leksperyans, i vwar li aprezan i *stuck* lanmenm i pa bouze.

E souvandfwa dan plizyer departman Gouvernman i annan sa bann pratik, kot i annan dimoun ki'n la, e zour ariv son tour pour li monte i vwar poudir son departman, ouswa son landrwa travay i deside pour li, swa rod en lot dimoun an deor, ki li aprezan i vwar li dan en

pozisyon kot li aprezan i bezwen *train* sa dimoun ki pe vini.

E mwan mon panse poudir bann tel pratik koumsa nou bezwen dekouraze. Nou bezwen dekouraze aköz i pa pour fer sa lorganizasyon dibyen demen. E osi petet i osi pa pour ankouraz lezot dimoun pour zot avans devan.

E osi Mr Speaker, i annan lezot dimoun osi tou ki ou kapab dir ki zot annan sa lentelizans, sa karakter, sa determinasyon, dan zot landrwa travay malgre ki petet akademikman zot pa, zot pa lo sa nivo ki petet sa pozisyon pe demande, be selman toultan ou vwar zot dan *frontline*.

Zot ki'n pare pour donn, ki'n ede. Zot ki'n pare pour pran, pour donn lanmen pran serten desizyon. Be selman zot, zot toultan vwar zot pe ganny kit deryer. E mon panse poudir avek sa Mosyon, ki Lasanble pe demann ek Gouvernman, pour nou get enn pti pe lo kote ledikasyon tersyer e osi ankouraz bann Seselwa pour zot kapab ganny bann serten pozisyon, sa i kapab ed bann dimoun ki la deor ki petet zot ti annan serten doutans pour zot kapab donn enn pti pe plis ankor.

Mr Speaker leksperyans parfwa dan en landrwa travay i vremen enportan. Ozordi ki nou vwar dan plizyer landrwa

travay espesyalman prive ler mon ti pe koz avek en manman, i dir mwan poudir son zenn fiy, in fer bokou letan lotel li.

Aprè ki in al ganny son baba, i ti'n pran enn pti *break* i deside pour li retourn ankor dan lemonn travay, i vwar li dan en serten sityasyon aköz kot i al *apply* pour li ganny serten travay, se ki zot pe demann li leksperyans.

Me selman souvandfwa pour ou kapab ganny leksperyans ou bezwen antre dan sa domenn li menm li. E mwan mon krwar se ki atraver Minister Lanplwa, petet i annan serten dyalog ki vini la, e sa i ava ankouraz osi bann lezot zenn ki pe rod en plas travay demen, kot zot, zot kapab akimil enn pti pe bann leksperyans dan serten landrwa kot zot, zot ti a voudre vwar zot ladan.

E mon'n ganny en sans Mr Speaker, pour mwan fer enn pti resers kot *Guy Morel Institute*. I annan en *course* ki bokou bann landrwa travay, oubyen bann endividi, zot ale pour zot kapab aprofondir enn pti pe *leadership*, bann lezot konponan ankor.

E dan sa laklas laba, i napa en - ki mannyer mon kapab dir ou sa - i pa gete ki ou pozisyon travay li. Ou kapab dan menm laklas, ou kapab vwar en travayer ki pe

travay *PUC*, ou kapab vwar en dimoun ki sorti dan lasirans, ou kapab vwar en dimoun dan lezot domenn, i pa get pozisyon.

Me selman ou al laba pour kapab aprofondir enn pti pe ou konesans, ganny enn pti pe sa bagaz e ankourazman osi tou. E sa i en bon linisyativ kot la ler mon'n ekout Mosyon, i pa vedir ki nou pe dekouraz, bann dimoun pour zot ale al rod en sertifika.

Nou pe plito dir zot se ki, nou pe plito dir ek Gouvernman pour donn zot sa loportinite, donn sa sans, bann ki pe prouv zot lekor dan en lot fason. E osi an menm tan, e bann ki ganny sa sans osi pour zot bouz devan, servi bann loportinite, ki kapab ganny met zot dispozisyon.

Akoz bann ki'n koze oparavan ki in koz avan mwan, mon kapab vwar poudir i annan bokou pozisyon, ki la deor nou vwar etranze zot pe okipe, ki nou menm nou, nou Seselwa, i annan bokou nou la ater ki ou kapab dir, nou annan sa abilite, pour nou kapab fer li.

Be selman nou, nou bezwen prouv nou lekor, an menm tan bann ki annan ban serten responsabilite, *HR*, bann direkter, bann *manager*, idantifye bann ki dan bann lorganizasyon, bann landrwa travay ki annan sa lanvi, ki i

annan sa ou kapab dir sa lanvi pour zot kapab bouz devan, pour zot donn plis Mr Speaker.

E mwan mon kapab dir se ki, mwan mon pour ankouraz nou bann frer e ozordi Mr Speaker mon a donn ou en legzanp. Sak fwa nou vwar lafet travayer vini, i annan en pti program ki *SBC* i fer, e souvandfwa ki nou vwar, nou vwar plis bann ou kapab dir bann *interview* nou fer pli ek bann dimoun ki pe travay dan bann biro.

Nou annan bann larestan dimoun ki dan bann lezot domenn la deor parey zis mon mazin en madanm ki tou le bomaten ler mon desann mon vwar li Marie-Andre en zabitan Perseverance, byen serye ou vwar li ek son balye onor semen pe debourye Mr Speaker.

E sa bann dimoun koumsa osi ler nou vini nou kapab donn zot enn pti, enn pti *limelight* ou kapab dir e ankouraz zot, montre zot poudir zot pe kontribye zot osi.

E nou pa zis get bann dimoun ki petet ki dan serten pozisyon oubyen sa. E nou annan bann lezot dimoun ankor ki nou kapab ankouraze, nou kapab ed zot pour zot bouz devan e osi pour zot kapab persevere dan landrwa travay.

E mwan mon pour ankouraz bann ki petet ozordi

zot napa sa sertifika, pour zot bouz devan. Servi bann loportinite e menm servi bann loportinite ki zot landrwa travay i donn zot, oubyen serten sakrifis ki zot, zot fer pour zot kapab bouz enn pti pe pli devan.

Mr Speaker mon pour donn mon sipor sa Mosyon. E sa Mosyon i en bon Mosyon. E mon swete ki bann ki la deor zot pe ekout nou byen. Nou nou'n pare pour nou donn zot tou sipor e osi nou ankouraz bann ki dan bann serten pozisyon pour zot osi idantifye bann ki pe seye, bann ki kapab, bann ki annan sa kapasite, ki'n pare ki travay dir, pour donn zot sa lankourazman Mr Speaker. Mersi.

MR SPEAKER

Mersi Onorab. Onorab Rocky Uranie.

HON ROCKY URANIE

Mersi Mr Speaker. Bonn apre midi tou koleg Onorab. Mr Speaker sa Mosyon i annan son merit e mon dir sa akoz i annan plizyer dimoun ki tonm dan sa kategori ozordi dan pei. Zot annan kantite leksperyans me zot napa sertifika, diplom oubyen degre, ki montre ki zot in swiv bann kour dan sa domenn ki zot aktyelman pe fer.

E i osi annan plizyer travayer ki annan diplom, ki annan sertifika, degre me dan en serten *field* me ki avek letan zot vwar poudir zot pa kontan sa *field* ki zot ladan - sa travay ki zot ladan. Zot deside sanz karyer pou al fer en travay dan en lot *field* ki donn zot sa satisfaksyon.

E petet la sa sertifika ki zot deza annan i pa relevan avek sa *field* travay ki zot pe fer. E sa Mosyon i a ede petet pou rezourd zot problem.

Mr Speaker dan listwar nou'n vwar dan lepase kot plizyer dimoun ti lekol ziska P6, e apre P6 bokou pa ti ganny sans al kolez zot ti al travay e la zot al aprann en metye avek zot paran, avek vwazen ek msye entel oubyen madanm entel.

Zot ti al aprann en metye ki zot in debourye ladan. Nou kapab dir zot in vin profesyonnèl dan sa metye e zot pe donn en bon servis dan lakominote e pei an zeneral. E san ki zot in bezwen al fer okenn letid teori oubyen pratik dan en sistenm formel, zot ganny sertifika

E sa group dimoun menm ki sa Mosyon pe fer referans osi avek pou ed zot; met zot an konformite pou zot kapab ganny rekonnèt dan en sistenm formel avek en sertifika ki kapab ed zot ganny en promosyon pou en travay.

Mr Speaker sa bann dimoun zot dan preski tou distrik dan pei Sesel e zot dan bann *field* vokasyonnel, e zot osi dan bann *field* pli akademik; dan bann lenstitisyon gouvènmantal oubyen dan bann biznes prive, so zot partou.

E parey nou dir Mr Speaker zot donn bokou, zot devlop bann *skills* avek leksperyans e zot eksepsyonnel dan zot travay. E ki zot vwar parfwa Mr Speaker, kot zot pe travay sa bann dimoun zot ganny defavorize dan en fason. Akoz zot in kapab vwar zot annan leksperyans 10an, 15an dan en *field*. me akoz zot napa sa sertifika zot pa ganny promosyon pou mont pli o.

Me zot plito war en etranze ki antre avek en sertifika e zot la zot vwar zot pe bezwen zot ki pe montre sa etranze travay e zot dekouraze dan en fason. Zot vwar zot ki pe pouse pou montre sa etranze travay e finalman sa etranze i pli byen peye, pli byen ganny tou keksoz ki zot. Me zot tou sa letan zot in la, san sa etranze zot ti pe fer marse sa landrwa sa lanvironnman, sa lanvironnman travay.

E zisteman Mr Speaker nou Gouvènmant ti pran li en desizyon pou entrodwir SQA e byensir SQA ti vin avek sa

prosesis, sa program *RPL* zisteman pou ede nou'n vwar nesosite pou ede, ed bann dimoun ki tonm dan sa kategori kapab ganny en rekonesans, ok?

Mr Speaker nou'n vwar ki sa program *RPL* ki'n vin avek *Recognition of Prior learning* i en program ki ti ganny etabli i annan plizyer dimoun ki'n al lo la, me petet i annan enn de pti defayans avek. Zot bezwen vin en pe pli kler pou eksplik dimoun ki mannyer ou antre lo sa program e fer dimoun konnen poudir lo sa program ou osi ganny *monitor e assess*, e *asses* pou ou nivo ganny etabli.

E ler ou nivo i ganny etabli ou a kapab ganny ou sa rekonesans atraver en sertifika petet pou, san ki ou bezwen al swiv en kour kot en lenstiti dan en laklas formel. Akoz pa tou dimoun ki santi zot alez apre en serten larz pou zot retourn lo ban parey nou dir lo ban lekol pou zot al asize pou re-al swiv laklas.

Alors Mr Speaker, nou'n vwar ki plizyer dimoun i annan bann sityasyon ki'n ganny kree, sirtou bann sityasyon ekonomik sosyal ki fer ki zot pa kapab; zot pa'n kapab fini lekol parey zot ti devret.

E nou'n vwar osi bann paran sirtou bann ki annan zanfan la zot pa pe ganny osi

sa lasistans ki zot bezwen, parey lot fwa ti annan en Mosyon ki paran i bezwen angaz li plis.

Me sityasyon i anpese ki paran i kapab i ganny difikilte pou angaz li plis ki son zanfan, pou ki i fer ki son zanfan osi i fini lekòl byen pou ki i a kapab ganny en sertifika ou vwar? E la nou war kot zanfan i devlop bokou problemn disiplin e zot pa fini, zot pa fini lekòl.

Mr Speaker nou, nou ti a kontan ki Minister i vin avek bann program en pe pli serye, en pe pli adapte avek fason ki keksoz i ete aktyel dan pei; ki fer ki i pli gide anver demann ki annan avek nou zanfan e sosyete ozordi.

Akoz pa tou zanfan ki kapab vin swiv menm kour parey nou dir *one-size-fits-all*, menm size, menm keksoz, menm kantite letan pou li kapab fini sa lekòl pou li ganny sertifika. Nou'n vwar ki sa i pa posib. nou pa pou zanmen arive fer sa.

Alors nou bezwen vin avek bann nouvo program. Gouvernman i bezwen vin avek bann nouvo program pou ede ki plis zanfan i kapab - bann etidyan i kapab fini lekòl ganny en sertifika ki ganny rekonnèt avek SQA ki kapab fer zot ganny sa travay nesesser ki zot bezwen.

Mr Speaker sa Mosyon i ankadre bann dimoun ki napa

vreman - ki'n akimil leksperyans ek *skills* pou ed zot; pou ed zot santi zot pli alez, pli konfortab. Akoz mwan, menm mwan mon'n tann plizyer dimoun kot pe koz zot sertifika - zot pe *brag* parey nou dir lo zot sertifika, zot lakonplisman. Me parmi lezot dimoun ki napa.

Me selman sa bann lezot dimoun osi pe travay osi tan dir la dan menm departman avek zot. E menm pe perform bokou pli byen ki zot. Me akoz zot napa sa sertifika, sa papye, sa regognisyon. Zot ganny pou met en pti pe anba dan landrwa travay e zot santi zot en pti pe anbarase. E nou war en bann ki bezwen petet al peye prezan pou sey fer bann kour, pou sey lev son nivo pou li kapab ganny, ganny sa rekonesans.

Mr Speaker mwan mon swe se ki mon swete ki nou bann zenn zenerasyon ki monte, nou met bann fasilite an plas; pou ki nou bann zenn adilt i kapab fini zot letid a en nivo kot zot kapab ganny en sertifika, ki ganny rekonnèt pou zot kapab ganny en lanplwa. Nou pa oule war bokou zot i sorti nou bann nouvo zenerasyon ki sorti, la ki bezwen al atraver RPL pou zot ganny travay.

Nou swe se pou ki tou nou bann zenn ki dan lekòl la ti a kapab *make it* avek en

sertifika pou lo serten nivo. Petet sa Mosyon li i ava ankadre bann ki pa'n ganny sans en pe pli zenerasyon pli avan, me zenerasyon pli modern nou ti a swete ki zot tou zot ganny, zot ganny ankadre anba sa sistenm. Mersi Mr Speaker.

(APPLAUSE)

MR SPEAKER

Mersi Onorab. Onorab Doyace Porice ou annan laparol.

HON DOYACE PORICE

Mersi Mr Speaker. Mr Speaker tou bann koleg *MNAs* e tou dimoun a lekout bonswar. Mr Speaker mon vreman apresye sa Mosyon anmennen par mon koleg Onorab Labrosse ki fer mwan santi ki sa size i annan partou dan landrwa travay, dan distrik oubyen nasyonal. E lo nou zil Praslin pa'n ganny eparnye lo sa size.

Wi, nou annan bokou travayer ki annan leksperyans travay pratikman me ki napa en sertifika tersyel e sa i anpes zot ganny en pli bon travay menm en promosyon. Sa bann travayer parey nou bezwen servi zot atraver zot konesans, zot leksperyans ki zot annan. Parfwa Mr Speaker nou konpran ki nou bezwen en sertifika.

Me sa i depan ki kalite ledikasyon zot in gannyen

oubyen ki kalite *training* apre zot letid skoler ki zot in *achieve*. Se sa fason ki bann travayer in resevwar en sertifika si vreman zot pa dan sa bann tradisyon skoler. Nou osi annan bann travayer ki petet dan lepase zot in aprann travay ek paran ou gran paran, e zot annan bokou leksperyans travay ki asiz dan lekol.

Travay ek paran in enteres zot plis ki pran zot ledikasyon o serye, me parfwa zot menm dan en pe letan travay zot al rod laklas apre ler pou zot ganny plis bagaz. Me pa neserman zot ganny en bon sertifika Mr Speaker ouswa zis en *Certificate of Attendance* pou zot sa ti ase pou kontinyen zot travay.

Atraver sa bann pti travay in ed zot ariv lwen. I fer mwan mazin mon defen papa Mr Anthony Stravens ki ti en mekanisyon profesyonnel lo Praslin, kot bokou zenn in pas dan son lanmen pou aprann travay. E ozordi zot annan zot prop garaz menm si zot ti napa en sertifika avanse.

Me dan sa masin loto ti pli enteres zot e debourye pou ganny en saler. E mon papa pa ti kapab donn zot en sertifika dan sa letan, me zot ti travay dir pou zot dipen aköz sa letan lavi pa ti fasil. Sirtou si ou pa ti kapab al letid avanse ou ti

bezwen al fer deboury pou ede kot lakour.

Mon osi Mr Speaker menm si mon ti ganny letid avanse pou al lekòl Mahe *Regina Mundi* sa letan mon pa ti kapab ale, akòz nou ti mizer, mon papa ti'n kite avek mon manmi avek 11 zanfan. Mon bann gran ser ek frer avan mwan ti bezwen al travay, sirtou bann ki ti annan zanfan e mwan mon ti bezwen kit letid pou al rod travay pou ed manmi ek lafanmir.

Me, mon ti bezwen al swiv laklas apre ler travay pou kontinyen mon ledikasyon, e osi servi bann pti *course* atraver Minister Ledikasyon sa letan kot mon ti en asistan miss lakres Baie Ste Anne Praslin. Apre sa mon'n travay lezot landrwa ki'n pous mwan dan sa ledikasyon pou ganny plis Sertifika Nasyonal e osi Enternasyonal ki'n ed mwan ariv kot mon ete ozordi.

Me Mr Speaker pa tou travayer ki kapab fer parey mwan ou lezot dimoun pou annan en kontinyasyon pou ganny en sertifika tersyer oubyen en promosyon. Par leksperyans travay i ed nou ariv lwen, me nou bezwen pran kont ki nou bezwen en sertifika sirtou lavi konmela dan travay kot promosyon i konsernen, letid aletranze e osi pou vin ansarz en lakonpanyen eksetera.

Avek lavi konmela ou bezwen rod en fason pou *achieve* en sertifika si vreman ou anvi ariv pli devan dan ou travay. Alor sa Mosyon pe demann Gouvernman pou met en mekaniz an plas, ed sa bann travayer ki annan leksperyans e ki napa sertifika, pou zot ariv pli lwen, san ki zot repet sa ki zot deza konnen atraver zot leksperyans.

La deor i annan bokou zot ki pe rankontre sa bann tel probleman. E nou koman bann Manm Lasanble nou konsernen avek sa. E nou vwar bokou sa bann tel travayer ki vreman aktiv dan kominote. Se sa ki sa Mosyon pe demande. Akòz nou anvi war sa bann tel travayer pou zot osi ganny en promosyon oubyen ariv pli lwen. Sirtou apre ki zot in kapab ganny zot sertifika tersyer.

Sa bann tel travayer eksperyanse a kapab anmenn plis reveni kot lakour, anmenn sa determinasyon dan travay e prodwir plis senserman e ki pou ed zot osi pran zot travay o serye. Wi, Mr Speaker nou anvi war sa bann travayer zot osi ariv pli lwen e vin sa vre travayer serye e anmenn sa bon fri pou nou pti pei Sesel.

I vre ki nou annan bokou. I fer mwan mazin enn mon zanmi ki ti antre koman en *cleaner* dan Minister

Lanplwa sa letan, ozordi avek determinasyon dan son travay in promote e li ki pe donn *training* lezot travayer atraver son leksperyans.

Pa i gou Mr Speaker, ler ou ariv sa zistans dan nou pti pei ler ou komans ba, e ou ariv en oter kot plizyer nou i benefisye atraver son *training* ki in donner.

E sa in montre nou ki nou annan ankor sa bann tel travayer, ki kapab fer menm parey mon zanmi ki ozordi i en *trainer* dan plas en *cleaner*.

E la mon pou enplor avek bann lezot travayer ki napa sertifika e ki anvi avans pli devan pou profite, profit sa lokazyon pou vin devan montre zot lentere anver en pli bon sertifika.

La ki Mosyon pe demann Gouvernman pou met an plas en mekanizm, pou siport zot e nou koman Manm Lasanble nou pare pou siport zot totalman. Avek sa 2 mo Mr Speaker mon pou siport sa Mosyon. Mersi.

MR SPEAKER

Mersi Onorab. Onorab Sylvanne Lemiel ou annan laparol.

HON SYLVANNE LEMIEL

Mersi Mr speaker. Bonn apre midi tou dimoun a lekout. Mr Speaker mon krwar bokou

keksoz in ganny dir lo sa Mosyon e bokou bann bon pwen relevan in sorti lo sa Mosyon e mwan mon pou komans dir par ledikasyon li menm nou konnen bon ledikasyon en dimoun i lakle sikse.

Ledikasyon li menm i kapab fer ou realiz ou *goal* ki ou anvi e osi i kapab ed en dimoun *achieve* sikse. So, san bliy son rev osi Mr Speaker akoz ler ou edike ou kapab annan ou en plan. E ozordi letan nou pe gete leksperyans i zwe en gran rol dan travay ozordi. E ler mon regard Mosyon li menm ki pe demande, mwan mon pou pran sa pti bout kot i dir “kot leksperyans travay dimoun, kot leksperyans travay ki dimoun i annan i ganny rekonnnet par lotorite nesese.”

Rekonnet par lotorite nesese i enportan Mr Speaker akoz zis dan *break* ozordi bann dimoun pe ekoute zot pe tann nou pe diskite lo sa Mosyon, *calls* ki mon’n gannyen bann dimoun i dir *it is a very good Motion* zot kontan pe debat lo la. Me selman mon pou vin lo kontrent ki pe arive ler bann dimoun in fer zot *RPL* sirtou en?

Problenm ki pe arive la i se ki bokou dimoun mon’n ganny enformen zot in al pou *training* kot *SBSA*, par egzanp *SBSA* i dir ou in *train* over 50

dimoun. Mazorite sa bann dimoun in *graduate* swa en *Diploma* zot in ganny zot papye zot in anmenn dan zot landrwa travay.

Me ler zot in ganny sa sertifika la petet sa ki Gouvernman i bezwen revwar *or* bann landrwa travay i bezwen revwar, pou gete ki manner zot kapab ed sa bann travayer ki'n anvi al agrandi en pti pe zot konesans. Akoz pou sa *RPL* i annan son bout dan laklas tou ki zot ale pou zot ganny zot *training*.

So, i enportan petet ki sa bann landrwa travay i vwar en pti pe fason ki manner zot akeyir sa diplom *or* sa sertifika *or whatever* dokiman menm ziska lo nivo degre tou anba sa *RPL*.

So, landrwa travay i merit vin en pti pe pli proaktiv. Zot merit prepare pou sa travayer ki'n ale ki'n ganny son *training*.

Zot merit fer sir ki i annan sa pti larzan an plas pou donn li son *increment* letan in vin avek son sertifika. Akoz bokou zot ozordi ki'n ale ki in al fer *training* zot dir ou ziska konmela i annan i annan 6 mwan. I annan, i annan plis ki 6 mwan i dir ou pa tann naryen.

Sa pti sertifika papye in ganny met laba, me napa naryen an term monneter *or*

en promosyon li menm ki vin avek.

Petet zot ti'n ganny ankouraze pou al fer li pou zot kapab mont en pti pe pli o ki parey dan Mosyon pe dir i kapab ankouraz zot pou ganny en promosyon. Me zot war ki promosyon li menm i pa vini menm. I kapab annan sa *post* la zot in ganny sa sertifika. Me sa promosyon li menm li i pa vini, e sa larzan li menm ki sipoze vin avek sa sertifika, i pa vini.

Alors bann dimoun ki'n pas dan sa leksperyans e ki ankor pe fer sa leksperyans, zot pe demann nou pou pas en mesaz avek zot bann anplwayer, poudir be get en pti pe dan zot ka osi. akoz in dir letan zot pe diskit lo la bann Manm Lasanble in dir nou fer en pledwari pou dir ek zot bann sef rekonnèt.

Nou'n ale nou'n al fer sa ki fodre fer menm si atraver *RPL* i vin sa leksperyans travay. E apre sa bout dan laklas ki'n fer zot ganny zot diplom ozordi.

E in akoursi zot kantite letan ki zot ti sipoze al asiz dan en laklas, akoz dan en laklas par egzanp si zot ti pou fer en *diploma* i 3an.

Ozordi avek zot leksperyans travay ki zot annan ler zot fer zot *profiling* e tou sa 1an edmi *or* 18 mwan i

fer ki zot in fini ganny, ganny zot diplom e zot in *graduate*.

Letan nou lo sa Mosyon osi, i enportan pou nou ankouraz bann landrwa travay pou zot investir dan *training* zot travayer. Akoz toultan nou dir travayer i *asset* en landrwa travay li ki fer bouze keksoz.

Alor nou bezwen valoriz nou bann travayer nou bezwen fer sir ki nou met larzan dan sa vot ki apel *training* pou nou ankouraz nou bann dimoun pou li *train*.

Ler i annan son *RPL* pou al fer petet sa landrwa travay ki pey sa *RPL* pou li mon dir felisitasyon bann landrwa travay ki ozordi zot ki peye pou zot bann dimoun al fer sa *RPL*.

Sa i byen, me selman donn zot sa pti regognisyon osi an term en pti *increment* lo zot larzan.

So, apre osi Mr speaker ler ou pe get bann vot par egzanp la nou pe al ganny *Mid-year Review*. *Most of* bann votes ki ganny koup bokou larzan ladan ler ou regarde, i bann vot *training* kekfwa ki bann landrwa travay pa ankou kapab anvoy *training* zot bann dimoun.

Ou vwar sa bann larzan i ganny pran. E sa bann travayer li menm i perdi zot pa ganny sans ale sa bann *training*.

So, i enportan ki ler nou met larzan pou *train* travayer,

pou *train* dimoun dan nou landrwa travay nou investir ladan e nou fer sir ki nou bann travayer i ale sa bann *training*.

I byen note ki nou annan bokou madanm nou vwar ki pe partisip dan sa bann *training* li menm *RPL*. *SBSA* in fer nou konpran i annan bokou madanm aktyelman la zot pe komans ganny enn de msye ki pe vini, ki petet pe rod pozisyon lo nivo *management*.

E zot deza annan en bout leksperyans. E zot pe vini zot pe rod sa lot bout atraver sa bout lo kote dan laklas kekfwa ki zot a gannyen pou zot kapab sit en legzanmen. Zot pas e ki zot pe mazin zot ganny zot promosyon.

Ler nou lo sa size mon ti a kontan konnen *or* nou ti a kontan rekomande petet ki lo kote *SQA*, mon'n ganny dir ki zot pa pe ganny tro bokou problem an sa ki konsern par egzanp pou *RPL*.

But what about validation of bann lezot sertifika sorti dan bann lekol tersyer *or* bann lekol possegonder osi ki eski sa bann keksoz pe mars byen kot *SQA*.

Eski i annan en evalyasyon ki'n ganny fer kot *SQA* pou nou vwar si tou sa bann keksoz li menm pe mars byen. Si i annan keksoz ki byen wi nou dir annou kontinyen amelyor lo la.

E an menm tan si i annan serten pti problemn kot nou fer rekomandasyon osi ki petet SQA i aranze, SQA i amelyor en pti pe pou fasilite keksoz *or* pou fer keksoz vin en pti pe, en pti pe pli byen.

So, dan sa laliny Mr Speaker parey mon dir, nou tou nou'n koz en kantite lo sa size. Mon panse ki loter Mosyon in kapab ganny en bon pe rekomandasyon li menm, ki letan pou li fer son *right of reply*, nou ava kapab tann li avek bann rekomandasyon ki in gannyen sorti dan sa bann deba ki nou'n debat lo la ozordi.

Me mon mo final ki vin lo sa Mosyon, i se ki bann landrwa travay, nou redir ankor get byen dan *welfare* zot bann travayer. Sirtou sa bann travayer ki'n al fer zot *training*.

Parey zot in demann nou pou fer sa pledwari Mr Speaker, mon dir nou dir ek zot donn sa bann travayer ki'n al fer zot bann *diploma* donn zot, zot pti larzan ki zot, zot pe espere si petet ou napa en *post* pou met li ladan. Me selman al *least* valoriz sa sertifika ki'n kapab vin avek.

Akoz ozordi parey bann travayer i dir Mr Speaker zot tou zot pe kontribye pou pous zot lorganizasyon devan.

Zot tou zot pe kontribye sakenn pe atrap en bout pou zot kapab fer zot lorganizasyon

travay marse osi pe tous Sekter Prive.

So, dan sa ka mon krwar nou merite pli valoriz nou travayer nou ankouraz zot ale al fer. Me an retour nou osi rekonpans zot byen, pou ki zot a kontinyen ganny sa lankourazman pou zot fer pli byen dan nou travay.

Mersi Mr Speaker.

(APPLAUSE)

MR SPEAKER

Mersi Onorab i reste mwan 2 Manm Onorab Pillay e Onorab Loze, mon ti a kontan konnen si i annan mon ti a kontan konnen si i annan okenn lot Manm ki pou entervenir pou nou konnen ki mannyer nou pou fini. Bon, si napa personn mon a pas Onorab Loze avan apre mon a les ou sef ganny dernyen parol? Onorab Loze.

HON JOHAN LOZE

Mersi Mr Speaker. Mon pa pou long. Mr Speaker rekonpans ki en travayer i gannyen, i normalman devret an valer avek valer sa servis ki sa travayer i donnen. Rekonpans i bezwen ganny mezire direkteman avek valer ki ou donnen pou sa servis, se koumsa ki keksoz i merit ganny mezire.

Now, i annan en lot bout avek sa pli ki ou spesyalize pli ki ou valer ki ou donnen i

ogmante. I ogmante akoz *entry point basic service* ki nou donnen i annan plis dimoun ki kapab donnen. I annan plis konpetisyon i annan plis presyon pou ganny sa bann *post at a basic level*.

Alors, vi ki i annan plis dimoun i annan plis konpetisyon, i annan plis presyon son valer i mwens e ou ganny peye mwens. Me pli ki en Seselwa i spesyalize, i grenpe, i ekspekte ki son rekonpans i ogmant an relasyon avek sa valer ki li i pe *provide* pou sa servis e sa i normal.

Now, lo sa keston bouze, grenpe e spesyalize nou tant pandan bokou lannen Sesel nou *equate* li avek diplom, sertifika ek letid akademik.

E nou'n get li koumsa, e sa in ariv a en pwen kot i afekte menm bann paran ki paran ki fors zanfann pou viz ver bann karyer akademik. Si en zanfann i kapab vin en ners nou pous li nou dir li "non fodre ou vin en dokter, fodre ou a vin en avoka, fodre ou a vin en mon pa konnen mwan".

Be si en zanfann i doue parey Onorab Porice in dir pou li vin en mekanik *then* nou devret ankouraz sa zanfann pou non selman vin en mekanik, me pou li vin meyer mekanik ki li i santi i kapab vini.

Si en zanfann i santi ki i anvi vin en *operator* bann *heavy plants* mon krwar nou devret ankouraz li pou vin pou spesyaliz dan sa ki i pe fer e vin meyer *heavy plant operator* ki i annan lo sa zil Sesel.

En fason ki son *skill level* i a sitan rar e pou toultan annan en plas pou li *on the job market*. E son rekonpans ki li i gannyen i ava ogmant an relasyon direk avek sa servis ki i pe *provide* avek lasosyete Seselwa.

E Mosyon ozordi mon get li osi koman en gidans pou nou bann zenn, e en gidans pou nou bann paran osi lo ki mannyer nou oryant nou zanfann ver landrwa travay.

Akoz *sad to say* i annan bokou nou bann zenn pou en rezon ou en lot zot pa konpran *upwards mobility*, zot pa ankor *unlock* sa sekre ki mannyer zot kapab grenpe.

I annan bokou nou bann zenn dan bann landrwa travay ki i asize e esper promosyon, i esper son *upwards mobility* vin koman en keksoz ki pou ganny donnen avek li dan plas fors en spesyalizasyon lo son lekor atraver travay dir, travay *smart* e disiplin dan son lanvironnman.

So, mon krwar i annan en mesaz kle nou bezwen pe profit lo sa Mosyon osi pou anvoye se ki nou fason enterakte vizavi nou prop

lanvironnman travay; vizavi sa rekonpans ki nou gannyen lafen dimwan i pa en keksoz ki nou bezwen asize pe espere pou li ogmante.

Nou bezwen nou osi sers fason pou nou vin meyer dan sa ki nou fer dan sa zil Sesel. Le meyer spesyaliz nou ki nou rekonpans a lafen dimwan tou le mwan i ava ogmante, sa i enn.

Lot keksoz Mr Speaker *Chief Secretary* ti asiz dan Lasanble en zour i ti dir ek nou poudir sa bann zistwar *Scheme of Service* la in ler pou revwar, akoz bann kondisyon i de fwa tro restriktir i anpay nou menm nou.

Scheme pe demann kalifikasyon astronot pou fer bann louvraz ki nou annan Seselwa la ater ki parfetman kalifye ki kapab fer sa bann travay.

E souvan nou vwar ki Seselwa in investir tan, tan lannen dan landrwa travay. In spesyalize, in pous son lekor in avanse. E ler *posting* ti ouver, i pa kapab gannyen akoz i ganny anpaye avek bann kondisyon ki'n ganny met an plas; pa par bann dimoun ki neserman fer sa louvraz ki li i pe fer.

Me par bann dimoun ki asiz pli o zot *delve dans la theorie* landrwa travay zot met bann kondisyon, bann demann sertifika e

kalifikasyon. Me ki zot, zot menm zot enn zot pa'n zanmen fer sa travay. 2enm zot pa konn bann legzizans sa louvraz, be i koumsa.

So, mwan mon oule siport sa ki *Chief Secretary* ti dir isi anndan dan Lasanble ki petet fodre nou revwar sa bann keksoz. Anmenn li anliny avek realite.

Nou pa kapab kontinyen annan bann *post* Sesel ki pe demann bann kalifikasyon astronot pou bann louvraz ki nou bann Seselwa i parfetman kapab fer.

Mon lot pwen ki mon oule tous lo la Mr Speaker, se ki konmela Sesel tou dimoun pe fer lapel pou linite. Me nou koz lo linite dan bann fason teorik e souvan ou vwar ki sel group dimoun ki ganny akize ki pa pe anmenn linite, se nou tou isi anndan; enkli ou Mr Speaker.

Be person pa dir ki mannyer pou anmenn linite zis i montre ledwa lo nou dan Lasanble i dir nou pa pe anmenn linite, be les mwan met li en lot fason. En fason anmenn linite, en fason anmenn linite.

Ler nou asiz otour en latav en etranze i dir pou dir li i idantifye en dimoun dan son pei pou vin ranpli en tel *post*. E nou koman Seselwa nou otour sa latav nou, la en fason anmenn linite.

Lev nou lanmen annan kouraz dir non, nou pa dakor. I annan Seselwa, Seselwa i a fer donn en Seselwa. Akoz sa i pe ariv tro souvan kot nou pe anmenn etranze pou pran *management positions*, zot asize otour *management table*. E la mon pa pe koz pou LDS la ganny mwan en konpran mon pa pe koz pou Gouvernman, ni pou LDS, mon pe koz an zeneral akoz as pe ariv partou Sesel konmela.

Nou anmenn en etranze nou met li lo en *high managerial positions*, ler i pe asiz lo sa *management table* la deswit i servi tou loportinite ki i vwar, pou kre loportinite pou son dimoun dan son pei vini, vin eksplwat larises nou pei. E nou Seselwa de fwa nou napa kouraz pou obzekte sa bann keksoz ouswa nou pa santi li nou responsabilite nou bezwen e nou drwa pou nou fer li.

Be bon annou annan linite e solidarite antre nou, nou tou ansanm ki nou kapab lev lanmen obzekte dir be mon arete la. Nou annan Seselwa ki kapab ganny *elevated* pou li fer sa keksoz. I napa kalifikasyon ozordi? *Hold li against the post e train* li, met li dan sa pozisyon, *hold li against the post*.

Train li zour i kalifye pou sa pozisyon, ou donn li son *full* saler, son rekonpans, tou son

reminerasyon ki i bezwen, ki i *deserve* e ki i kapab gannyen pou fer sa travay.

Mon krwar sa i en direksyon pou nou annan linite, anmenn linite, aport linite dan nou pei. Annou komans debout a kote kanmarad, siport kanmarad donn soutyen nou travayer Seselwa a tou sans e loportinite ki nou gannyen.

Having said that mon pa kont etranze dan nou pei mwan en, mon napa naryen kont etranze. Mwan mon *fully believe* ki en etranze i aparet Sesel, *fully grown, able body*, i kapab travay nou pa'n zanmen donn li ni en gout manze, ni en vaksen. Nou pa'n edik li. Nou pa'n depans en sou lo li.

Si i aparet devan nou laz 24an i konmsi i napa sa mazik deswit i kapab komans kontribye dan lekonomi pey *tax* fer son kontribisyon, i byen.

Me bout ki mwan mon pou dir mon pli dakor avek, se mwan mon ti a kontan war en Seselwa pe fer travay 10 etranze, ki mon vwar 1 etranze pe fer travay 10 Seselwa. Selman si mon war en Seselwa pe fer 10 etranze debous en lanmar, mwan pou mwan i *ok*.

Me si mon pou war en etranze pe fer 10 Seselwa debous en lanmar, la mon komans kestyonnen la.

So, mon pa konn etranze, me selman mon anvi sa solidarite e linite ki komans diriz nou ver en linite antre nou koman en pep.

Annan *practical application of* sa linite ki nou koz lo la en fason ki nou kapab delivre li pou benefisye sa pep ki apel Seselwa. Nou pa kapab annan linite ki zis efemer, i anler laba *dans la theorie*. Nou tou nou pe koz lo linite teori konmsi i en keksoz relizyez.

Mon lot dernyen bout Mr Speaker i SQA li menm, nou pa kapab zis anmenn Mosyon ler SQA i met demann e legzizans lo ledò sa malere. Me san ki nou gete ki son kondisyon nou bezwen konnen ki pe pase laba

Validasyon sertifika i pa zis pou sa Seselwa dan landrwa travay, me tou sa GOP kot i al valide sa? Apre biznes i kri lasasen i dir GOP i an retar i pa ganny GOP, GOP i tarde.

Be ki kapasite SQA pou delivre lo tou sa bann legzizans ki lo son ledò, konbyen *file* i annan kot SQA e konbyen *desk officers* eski i annan pou delivre lo sa bann keksoz?

La ki nou'n anmenn en Mosyon, eski koman parti sa rezolisyon sa Mosyon Lasanble Nasyonal, nou kapab ganny en leksplikasyon avek Minister konsernen, lo kapasite SQA

pou delivre lo tou sa bann legzizans; enkli sa bann nouvo legzizans ki nou isi anndan nou le met lo ledò sa malere SQA.

Si i kapab, dakor. Be si i pe eksperyans difikilte, si i annan desk anndan kot SQA ki deza plen avek *file* e i napa ase *boots on the ground* pou klersi sa bann *file* lo sa bann desk. *What is the next step?*

An relasyon avek Mosyon ki devan nou, mon pe demande ki mannyer eski nou *give legs to the Motion* konmsi? Onorab Georges mon konnen i pa kontan letan mon dir mon pran en gal banbou nou pous sa kartye maron devan.

Me ki mannyer nou pran en gal banbou e nou ede pou pous sa kartye maron sa Mosyon en pe pli devan, ouswa sa *superyacht* avek son 10 masin roket tes la deryer? Nou bezwen pran Mosyon dan tou son lanpler en fason ki Lasanble nou tonm dakor, nou'n agree, nou'n napa kontansyon be nou bezwen annan en fason pou annan en laplikasyon.

Be si sa masin ki sipoze delivre fer laplikasyon, li menm li napa ase delwil koko dan tenk pou fer li roule, nou pou annan en problem la. Mr Speaker an terminan, mon dernyen keksoz ki mon annan pou dir - mon swete nou pe

pas Mosyon byen i komans byen i fini byen.

Nou pa pas Mosyon apre demen nou tande poudir i annan dimoun in vin psikanaliz avek *short course*. Nou pa ti ava swete nou al dan sa bann direksyon koumsa.

Annou ratifye sertifika ki sertifika e annou annan respe pou profesyonnel medikal. Si nou pa'n anrezistre avek en Konsey Langleter nou pa koz manti devan Lasanble poudir in anrezistre ek en Konsey Langleter, apre zour Loze i *email* zot, zot dir Loze zanmen zot in deza tann nonm sa madanm zot. Mersi Mr Speaker.

(APPLAUSE)

MR SPEAKER

Mersi Onorab. Onorab Sebastien Pillay ou annan laparol.

HON SEBASTIEN PILLAY

Mersi Mr Speaker e bonswar tou dimoun, e bonswar tou koleg Onorab. Mr Speaker Mosyon devan nou i en Mosyon tre enteresan. I en Mosyon tre enteresan, akoz dan son merit sa ki pe demande, i en keksoz ki nou lo sa kote latab, nou'n koz lo la plizyer fwa, E nou'n fer plizyer reprezantasyon avek Gouvernman pou nou kapab fer li realize.

Me malerezman in difisil pou nou kapab konvenk Gouvernman lo serten *move*, ki i ti pe fer an relasyon avek sa Mosyon, ki inevitableman sa pou anmenn bann konsern. E ki ozordi mon'n war Onorab in bezwen anmenn en Mosyon pou li demann Gouvernman pou fer keksoz davantaz.

Par egzanp sa ki mon war i drol se ki Onorab i koz lo pe demann Gouvernman pou asire ki ledikasyon tersyer, ki Seselwa i gannyen; oubyen pey dan zot pos; ensi ki leksperyans travay ki dimoun i annan, i ganny rekonnet par lotorite nesese.

Me Onorab i a rapel ler nou ti pe fer deba pou *repeal ANHRD*. Sete sa *cornerstone* oubyen en labaz deba ki nou ti gannyen avek Minis Valentin dan sa Lasanble.

E Onorab pa ti siport nou kote latab, ler nou ti dir Minis Valentin poudir sa *move* pou *merge ANHRD* anvoy en bout kot Lanplwa, anvoy en bout kot Ledikasyon, pou kre en dekoneksyon zisteman dan etabli ki bann *course* i *meet* nesese. E dezyenmman, rekonnet leksperyans ki bann travayer i annan.

Onorab ti osi pa siport nou ler nou ti dir avek *Public Service Bureau* aret fer sa bann prononsman lo *long service allowance*, akoz *long service allowance*, se li ki fer ki

leksperyans nesaser i ganny rekonnet atraver en landrwa travay. Akoz sa dimoun pa pou kapab ganny en promosyon.

So, mon pe siport ou Mosyon ozordi, akoz ou Mosyon i demann egzakteman sa ki mon ti oule. Me sa ki dezapwentan, se ki ou pa ti donn mwan ou sipor, ler mwan mon ti pe *raise* sa bann *issues* ler nou, nou ti pe *raise* sa bann *issues* ek Gouvernman.

Ki fer ki sa ti dir dan sa *meeting* piblik, annou arete pran en pti group e dir sa i sa pti group. E nou, nou annan nou mazorite nou pou prosed dan sa fason, sa i dezapwentan Mr Speaker.

I dezapwentan akoz ler nou regard sa Mosyon i pe koz lo en eleman esansyel, e sa se rekonnet leksperyans. Ou rekonnet leksperyans i annan diferan fason. Me si ou striktir, ou sistenm ki ou annan an plas, pa permet sa dimoun ki annan sa leksperyans pou li mont sa mars leskalye, ou bezwen rekonnet li en lot fason

E se sa ki ti vin atraver sa ki nou apel en *long service allowance*, e mon war i drol ki apre sa *Chief Secretary, Public Service Bureau* i vin devan e i dir evantyelman nou bezwen *phase out long service allowance* ki pa fer sans.

Me ki'n arive an plis ki sa nou'n osi retir *marketable*

skills allowance koman en *allowance* lo li tousel, e enkorpor li dan *package* en dimoun ki fer ki si en dimoun i kontinyen grandi dan son landrwa travay son benefis pa pou ogmante.

E se sa ki fer mwan demande, be kot ou ti ete sa letan ki nou ti pe pas sa bann provizyon Polisi dan Lasanble? E akoz ou pa ti siport nou ler nou ti pe koz lo la nou pa'n dir ou al kont ou Minis.

Me nou dir *own up* sa ki dimoun pe dir ou. akoz i bezwen annan dimoun - i bezwen annan *constituents* ki'n vin kot ou, ki'n demann ou pou vin avek sa Mosyon dan Lasanble e ou'n bezwen war en merit.

E mwan mon war en merit ladan, me mon konsernen avek lafason ki ou'n *word* li. Akoz mon pa santi poudir pou donn nou e pou donn Gouvernman en *platform* kler, lo ki ou bezwen reakte, lo ki i bezwen travay.

Par egzanp Mr Speaker ler nou koz ledikasyon tersyer, nou pe osi koz liniversite. Mon pou konsernen si ozordi Gouvernman Sesel. Akoz baze lo sa ki Minis Valentin ti dir, nou pa pe fer en travay, pou asire ki bann etidyan ki kalifye pou al liniversite, pa pe al liniversite baze lo en *manpower needs* ki Sesel i annan.

Mon pou konsernen Mr Speaker, akoz se sa ki lot kote latab i bat lanmen ler i vin dan Lasanble pou dir. Me en lot keksoz ki enportan se ki ledikasyon tersyer i osi enkli bann *professional centers* dan sa konteks ki nou pe koz li la, e ki sa i pran i mars atraver bann *intake* ki nou pran *from* bann lekol pos segonder.

E ki arive prezan dan travay ozordi? Ou annan bann dimoun ki bezwen al fer bann *in-service training*, pou kontinyen ogmant zot kapasite dan zot travay, pou devlop bann lezot konpetans; ki a fer zot vin pli *employable* si zot deside sorti dan sa landrwa travay. Oubyen pou zot grandi atraver sa dan travay.

Alors i annan tout en seri keksoz ki ou bezwen met ansanm, pou nou kapab realiz lentansyon sa Mosyon. Mwan mon krwar personnelman enn bann keksoz ki nou bezwen met an perspektiv.

Par egzanp, ler ou koz lo par landrwa travay piblik ensi ki prive, i pou en pe difisil pou Mosyon realiz sa. Akoz ozordi pli gro problem ki nou annan avek Sekter Prive dan bokou sironstans, se ki sa ki nou apel en *succession plan* pa pe ganny swiv par sa bann landrwa prive.

Malgre i annan bokou landrwa ki fer zot mye, me i

annan landrwa par egzanp serten gran lotel ki ozordi travayer pe konplent en kantite tretman ki zot pe gannyen. Mon pou nonm enn la Mr Speaker zot kapab anvoy en *right of reply* apre e sa se North Island par egzanp, bokou konplent ou tande bann travayer North Island pe koze. E menm dan bann *meeting* in monte menm Minis Lanplwa in ganny met ou kouran.

So, nou bezwen annan en lapros diferan ou Mosyon Onorab. Kote i en bon Mosyon, kote ki annan en merit, se son lentansyon, se fer ki dan plas en Seselwa ki pe aranz sa lasanm; sa Seselwa i *supervise* sa etranze ki pe aranz sa lasanm.

Dan plas sa Seselwa netway sa lans, sa Seselwa i ansarz sa etranze ki pe netway sa lans, se sa ki nou bezwen *aim* pou nou vwar.

Ou konnen bokou zot lo lot kote pa kontan ki mannyer mon pe koze Mr Speaker, i *ok*. Bomaten nou'n vwar ankor enn fwa ki Lasanble i pran en lapros, kot nou pa oule met presyon lo Gouvernman e nou krwar nou osi Lasanble nou form par Legzekitiv.

Pou sa Mosyon ganny relevans Mr Speaker, fodre ki Departman Lanplwa, Departman Ledikasyon i sanz lafason ki zot pe fer keksoz ozordi.

E ki *Public Service Bureau* i osi sanz lafason ki i pe fer keksoz Mr Speaker. Mr Speaker enn bann keksoz ki fondamantal ozordi par egzanz mon vwar *Public Service Bureau* in vin en antite sitan enportan, sitan for dan pei e li ki pe desid lo striktir e kad lamazorite lorganizasyon. I byen.

Be ler mon vwar li pe menm anvoy sirkiler Lasanble Nasyonal mon konsernen akoz i napa okenn lotorite lo Lasanble Nasyonal li. Lasanble Nasyonal i en brans endependan avek Gouvernman. I a kapab donn serten gidans me pa direktiv Lasanble Nasyonal.

E se sa problem ki nou pe rankontre ozordi kot bann lotorite pe *overstep* zot bann *boundaries* e zot pe kre en kondisyon ki pe fer keksoz difisil pou nou kapab realiz bann ve ki bann travayer i annan dan Servis Piblik.

E lo kote Sekter Prive *once* nou komans aranz keksoz dan Servis Piblik, *then* Sekter Prive a kapab swiv *at their own pace*. Mr Speaker mon dir sa akoz bomaten mon'n vwar esansyelman ki malgre tou lesey ki nou pou fer pou sey rod laverite dan serten sirkonstans nou pou ganny problem. Si mazorite dan sa Lasanble pa pare pou ed nou pou fer li.

Par egzanz bomaten nou pe koz lo en - i annan en kestyon ki'n vini nou annan bann regilasyon dan nou pei ki dir ou pa kapab fer vini en loto dezyenmmen; ou pa kapab fer vini en loto ki dray lo kote gos. Gouvernman i decide pou fer li i dir ou in ganny en *waver*, ou pa war *waver* Se sa en latitid ki pe fer ki mon war Onorab, Onorab Richard Labrosse in decide pou anmenn sa Mosyon.

Akoz sa i al drwat *to the essence of* lafason ki Gouvernman pe konport li ozordi, kot i pa pe *respond to* nesosite bann keksoz ki travayer pe fer fas avek. E sanmenm bann size ki nou pe war de zour an zour kontinyen remonte sak fwa bann dimoun i ganny sans koze.

Mr Speaker ler nou koz lo ensi ki leksperyans travay ki dimoun i annan i ganny rekonnet par lotorite nesaser, mon pe prezimen Onorab pe *mean Seychelles Qualification Authority*.

Seychelles Qualification Authority i pou annan en manda baze lo sa Mosyon pou li al regard dan sa ki nou apel *Recognition of Prior Learning*. Me sa i en keksoz ki ekstrememan kompleks pou fer vizavi diferan landrwa travay.

Se pou sa rezon ki dan plas servi en sistenm

Recognition of Prior Learning ou servi en sistenm kot ou rekonnèt leksperyans *within* sa lorganizasyon, *either* atraver en *long service allowance* or *either* atraver lezot *incentive* ki ou donn sa anplwayer, pou sa letan e sa konesans ki in develop dan sa domenn ki i ladan.

An sa ki konsern en dimoun ki travay dan Sekter Prive bokou landrwa i rekonnèt zot bann *long service staff* osi dan sa fason. Ler nou koz lo ede dan plas dan plas bann travayer ensi ki promosyon e redwir gaspiyaz finans ek letan, mon ti a kontan Onorab i eksplike kwa ki pe sey dir egzaktaman par redwir gaspiyaz finans avek letan.

Mon ganny en lide ki pe sey al ver pou pa al dan bann *course* ki pa neser ale, me ou konnen? Lanatir i en pei ki demokratik e ki lib, napa naryen ki anpes en dimoun ki anvi al fer en *course* dan *spa*, pou al fer en *course* dan *spa*, si i annan en *course* dan *spa*.

I pou ekstrememan difisil pou ou kapab kontrol tou sa ki dimoun i anvi fer *unless* ki ou etabli poudir an sa ki konsern bann depans ki Gouvernman pou fer; an sa ki konsern larzan ki Gouvernman pou met a kote pou *training*, ou le ki ou bann dimoun i al *train* dan sa domenn.

Par egzantp si nou annan nou bann dimoun ki travay ek sekirite kot Lasanble, zot *training* par egzantp i ava bezwen al dan ver *customer relation*, i ava bezwen al dan bann eleman ki ed zot anplifye bann travay ki zot fer. Ler en dimoun i pey dan son pos i pou en pe difisil pou ou deside ki *course* i anvi fer, i annan dimoun Sesel ki annan leksperyans ki annan kalifikasyon dan domenn ki zanmen mon ti pou ekspekte zot annan.

E sa i fer ki zot annan en lib *ability* pou zot kapab swazir kote zot le ale, kwa ki zot oule fer. Me *when it comes to* rekonnèt leksperyans dan landrwa travay, enn bann keksoz ki mon osi mon konsernen avek, se lefe ki i annan bokou dimoun tre eksperyanse ozordi ki pa pe travay, ki menm annan kalifikasyon e degre liniversiter ki pa pe travay.

Mon pa konnen ki kalite *breakdown* ki'n arive ki Gouvernman menm pa le pran sa bann dimoun pou travay. *Whatever reason* politik or *otherwise*, zot pa le pran sa bann dimoun. E i annan plizyer dimoun ki mwan mon'n zwenn avek ki'n dir mwan poudir be mon'n anvoy mon CV, mon'n anvoy mon laplikasyon e mon pa ganny okenn repons.

Nou annan nou par egzantp *social worker* kalifye nou ti pe koz lo problemn *social work* ki pa pe ganny louvraz. So, eski nou annan en problemn reel ki nou'n adrese oubyen nou oule zis debat sa Mosyon dan en fason kosmetik?

Mwan mon pou siport ou Mosyon akoz ou Mosyon i al drwat ver en keksoz ki mon krwar ladan, se ki ou bezwen donn en dimoun loportinite pou li avanse *but at the same time* ou bezwen osi rekonnèt lavansman ki en dimoun in fer san ki ou pran lezot konsiderasyon an zwe.

E sa i enportan sa Mr Speaker. I enportan ki nou viv dan en pei ki al ver en meritokrasi. Ki nou *reward* en dimoun pou son abilite, pou son kapasite, pou sa ki i kapab fer e non pa pou sa ki i ete oubyen sa ki i konnen. Sa ki enportan pou nou.

Taler Mr Speaker mon ti pe zwenn avek bann zenn *Independence School* ki la, e ler mon ti pe ganny en kestryon enteresan ki en zenn ti demann mwan se ki i ti dir mwan "i anvi form en parti politik" e mon demann li rezon akoz? Enn bann rezon akoz Mr Speaker *truth be told* se ki pou vin en politisyen ou pa bezwen annan en kalifikasyon.

Si nou get nou konstitisyon Mr Speaker,

bann dimoun i asize la anndan nou le sel group dimoun ki ler nou al debout dan en eleksyon napa en CV ki ganny met devan pou dir ou bezwen annan sa, sa, sa. Ou annan 18an ou annan dwa partisip dan lavi politik e lavi Gouvernman ou pei.

Me selman, me selman nou annan drwa fer en desizyon pou lezot dimoun ki souvandfwa dan zot domenn i pli kalifye ki nou. E sa i en pouvwar enportan ki nou annan. E si ou rod en mazorite legzizans lo ou i devret plis ki ler ou dan en minorite.

E se pou sa rezon ki mon pe dir avek Onorab i enportan ki ou apros konklizyon lo ou Mosyon dan laliny ki nou bezwen anmenn bann sanzman fondamantal e mazer, ki ava fer ki bann lotorite konsernen i take onboard bann propozisyon ki nou annan.

Akoz apre tou sa nou pa fer li koumsa zanmen nou pou kapab fer li e zanmen nou pou kapab vin ansanm pou nou dir pou dir nou oule fer sa ki pli byen, sa ki meyer pou pep Seselwa ki la deor.

Mr Speaker an terminan mon oule, mon oule *remind* Lasanble Nasyonan en keksoz tre enportan ki nou ti fer *pledge*. I annan 2 Lartik dan Konstitisyon mon krwar si nou pa tronpe Lartik 41 ek Lartik

42 si mon pa tronpe Lartik 42, i dir ou, “Tou Seselwa i annan drwa travay dan en louvraz, i devret travay pou li kontribye pou son pei.” I enn bann Lartik pli enportan dan nou Konstitisyon.

Mon konnen mon koleg *Leader* osi i kontan fer referans avek sa Lartik Konstitisyon, e nou, nou bezwen realiz sa rol sa ve e sa lanbisyon pou tou Seselwa. Donk, sa lanbisyon pou tou Seselwa aköz tou Seselwa i enportan. Mr Speaker ozordi apre midi nou, nou’n montre poudir kan en keksoz i bon i annan en merit nou pou siporte, mon swete Mr Speaker ki dan lefitir mazorite i azir parey. Mersi Mr Speaker.

(APPLAUSE)

MR SPEAKER

Mersi. Mersi Onorab. Mon ava prezan apel loter Mosyon pou fer son repons e konklizyon, Onorab Labrosse.

HON RICHARD LABROSSE

Mersi Mr Speaker. Dabor Mr Speaker avan mon komanse mon ti a kontan remersi tou bann Manm ki’n partisip dan sa deba. Tou lede kote latab manti pa bon i annan bann bon sizesyon ki’n ganny sorti e i en deba ris. Me selman dernyen entervenans ki’n koz dernyen la Mr Speaker, mon’n

war li in koz ek en pe lakoler in al dan konmsi li menm in al dan tou direksyon, ki ti napa naryen pou fer ek sa Mosyon.

In konpletman, in konpletman fo ki in annan bann keksoz fo osi ki in dir Mr Speaker par egzanp lo Mosyon ki nou pe koze ozordi zour nou pa ti pe koz lo, lo latak lo Minis Ledikasyon, me ler mon pe get li paretman li i annan en problem ek Minis Ledikasyon. So, la i pa ti le moman pou nou vin koz lo sa la, nou pe koz lo en Mosyon serye ozordi.

Mr Speaker ankor enn fwa mon ti a zis kontan dir avek dernyen entervenans ki’n koze osi Mr Speaker, bon fer rekonnèt fer resorti mon rapel dernyen fwa ki nou ti tann li pe dispit parey i pe dispit la mon krwar ti en 20an pase, kot i ti mon Profeser Matematik dan laklas, e ozordi mon’n pas devan li mon’n vin en Manm Elekte e li ozordi i lo en tiket proporsyonnel.

(APPLAUSE)

HON RICHARD LABROSSE

Mr Speaker prezan mon retourn lo Mosyon, ankor enn fwa mon oule remersi ankor bann Manm ki’n partisipe e mon pou donn mon bann sizesyon enkli nou parey mon pe dir nou pa zis koze, oubyen nou zis kritike *or whatsoever*

nou donn en pe sizesyon. Mon premye sizesyon ki mon pou al lo la i kot SQA.

SQA i devret bokou pli sever lo kote akreditasyon. Si en lenstitisyon pa pe swiv regilasyon i devret fer fas avek penalti nesaser pou li aranz son travay parey i devret. Se program pa laoter i pa pe fer fason zwenn kriter pa dir i *under review*, dir ki i pa akredite.

E sa lekol i ava aranz son bann sistenm parey i devret. Sa i ava anpes ki marmay apply pou fer sa bann *course* ki napa lotorizasyon e gaspiy zot letan e osi gaspiy larzan *tax* Sesel, larzan *tax* Seselwa Onorab Pillay ou ti pe rode taler.

I ava osi asire ki program ki zot pe dir i pe ganny ofer i akredite e bann kandida ki bezwen i ava kapab servi pou fer *RPL*. Si fodre ki SQA i ganny plis Bidze e plis *staff* parey bokou Manm in ganny dir pou ed li fer son travay pli byen, annou regarde si sa pa kapab ganny realize akoz i plis ki enportan.

Dezyenm Mr Speaker, konsernan *Public Service Bureau*; i devret annan en plan konkret pou rekonnet leksperyans travayer ki'n travay pou bokou lannen dan en pozisyon dan Sekter Piblik. Si fodre zot travay avek SQA pou met anmars en sistenm

formel ki ava kapab ganny rekonnet enternasyonalman, nou fer li.

Annou arete ek sa zafer ki fodre ou annan zis en degre Liniversite oubyen diplom pou ganny en promosyon, ganny sertifye dan en pozisyon oubyen menm ganny en plas travay. Byensir sa mon pe koz pou dimoun avek ase leksperyans travay e bon rikord, bon *tract record* parey nou dir. E si sa sistenm i efikas Departman Lanplwa i a kapab ankouraz bann biznes prive pou servi enn ki parey.

Mon konnen ki aktyelman i annan bokou biznes ki gete, get leksperyans ki e ki servi sa plis ki sertifika formel, me i ankor annan en ta ki servi zis sertifika menm e ki servi leskiz mank sertifika pou donn en lapey ki parfwa i pa ogmant lapey sa travayer.

Sa sistenm par egzanp i ava annan son lalis keksoz ki sa dimoun i devret kapab fer pou montre ki i konn sa travay byen. I ava annan son kard normal parey en program normal. Son *training plan*. I ava annan son evalyasyon li osi parey nenport program.

E ler mon dir evalyasyon mon pa pe dir asize ek en bolpenn ek papye e reponn kestyon lo en papye. Mon pe dir evalyasyon pratik bann keksoz ki sa dimoun i sipoze fer toulezour. Koman son

louvraz byensir i pou bezwen annan keksoz pou fer pou elev son nivo. Par egzanp al serten laklas parey in ganny dir osi dan deba, sa osi i a kapab form parti son *on the job training* formel.

Nou bezwen dir avan al pli lwen ki ler mon'n nonm *on job training* la konmela bokou fwa, sa i en ekivalan en *induction*. Sa kot sa *staff* i asize get en dimoun ki pe travay oubyen eksplik li serten prosedir, pas lo kek *manual* ki zot annan.

Ler mon pe dir *on the job training* mon pe dir en *training* formel ki ganny met ater avek bann lobzektif kler ki devret ganny *attend*. Ler sa dimoun i *attend to* sa lobzektif i ava ganny sertifika konmkwa in fini sa formasyon e zot ganny rekonnet ki sa i legal en tel nivo kalifikasyon. Sa laba kot SQA ki a kapab ede avek.

Mon trwazyenm sizesyon osi dernyen, si sa 2enm sizesyon 2enm pa posibil malgre ki mon krwar i posibil ki en sistenm i devret ganny met an plas pou ankouraz plis dimoun pou fer *RPL*.

Par egzanp en fon i kapab ganny kree parey en nespes labours si nou pe dir zis pou fer prosedir *RPL*, ki sa ki sa dimoun li menm i pa ava vwar li dan en, akoz parey nou dir ledikasyon pa sipoze mars avek larzan. E i a kapab vwar

li en kekfwa i ava annan en mekaniz ki ganny met an plas ki kapab ed en dimoun. Par egzanp ozordi ki pa a vwar li dan en difikilte pou li kapab fer son *RPL* avek parey nou'n dir ek sa pti pri ki annan avek konmela.

Olye pey en *course* 3an, pey en labsans pou *study leave* en dimoun i kapab pas atraver prosedir *RPL* pandan detrwa mwan e fini.

Mr Speaker mon a fini par rapel mon bann koleg Onorab ki malgre nou pa dan sistenm ledikasyon direkteman, nou tou nou annan en rol tre enportan pou zwe dan direksyon ki ledikasyon pe ale Sesel e bokou nou la i annan zanfan ki pe pas atraver sa sistenm ledikasyon aktyel.

Avek sa antet mon ava remersi zot tou pou zot sipor pou sa Mosyon. Mersi Mr Speaker.

(APPLAUSE)

MR SPEAKER

Mersi Onorab. Mon ava apel bann Manm pou vot lo Mosyon. Manm ki an faver lev lanmen silvouple? Mersi. Tou bann Manm in vote, alor mon pa bezwen apel pou bann ki vot kont. E lo Mosyon ki'n anmennen par Onorab Richard Labrosse, 31 Manm in vot pour, 0 kont e 0

abstansyon alor Mosyon in pase avek inanimite par Lasanble. Felisitasyon Onorab ou'n ganny en Mosyon avek sipor inanim.

E apre ki, apre ki mon'n tir sa 2 Mosyon *TRNUC*, nou napa lot biznes pou sa semenn alor nou pa pou bezwen zwenn demen, selman mon asire ki bann Manm pa pou manke louveraz zot annan rapor *TRNUC* ki sa oter. E mon'n osi remarke ki nou annan en *Bill 101* paz, so, zot annan dekwa non selman pou demen me pou larestan lasemenn.

So, mon a dir zot mersi pou travay sa semenn e bonn kontinyasyon. Wi, bann komite, bann Komite Lasanble i kontinyen parey labitid e Madanm Clerk in dir mwan in met komite, met *Assembly Business Committee* pou 10er, *right?* 10er *demain matin ok?* *Bills Committee* i annan lanons pou fer? I pe met? Ki ler?

HON JOHN HOAREAU

Nou zwenn letan *lunch time* parey nou abitye zwenn.

MR SPEAKER

Ok. Bill Committee osi i *on target. Good*, mersi bokou mon a swet zot bonn rantre tanto e bonn kontinyasyon pou larestan lasemenn. Zedi i konze piblik so, *enjoy* sa ki zot kapab. Nou a *Adjourn*.

Lasanble a zwenn Mardi prosen 9er.

(ADJOURNMENT)